

**MESYUARAT PERTAMA, PENGGAL KEEMPAT
PARLIMEN KEEMPAT BELAS**

2021

HARI SELASA : 28 SEPTEMBER 2021

KANDUNGAN

JAWAPAN-JAWAPAN BAGI PERTANYAAN-PERTANYAAN JAWAB

LISAN YANG TIDAK DIJAWAB DI DALAM DEWAN

(SOALAN NO. 5, 12 HINGGA NO. 84)

**[SOALAN NO 5 DIJAWAB BERSEKALI DENGAN
SOALAN NO 15 DAN NO 54]**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI BUNG MOKTAR BIN RADIN
[KINABATANGAN]**

TARIKH : 28 SEPTEMBER 2021 (SELASA)

SOALAN

Minta **MENTERI PEMBANGUNAN USAHAWAN DAN KOPERASI** menyatakan apakah usaha Kementerian dalam memastikan para peniaga kecil sederhana mampu berhadapan dengan cabaran perniagaan di kala pandemik COVID-19 dan apakah statistik perniagaan yang telah 'gulung tikar' ekoran terkesan dengan pandemik COVID-19.

JAWAPAN

Tuan Yang di-Pertua,

1) Saya mohon izin untuk menjawab soalan daripada YB Kinabatangan bersekali dengan soalan daripada YB Pontian dan YB Jerlun pada tarikh 28 September 2021 kerana isunya sama.

2) Untuk pengetahuan YB, MEDAC telah membentuk satu jawatankuasa khas atau Taskforce di peringkat Kementerian bagi membantu usahawan pasca pandemik COVID-19. Melalui pembentukan taskforce, pihak Kementerian sedang mengambil tindakan segera dalam tempoh jangka pendek di bawah sasaran KPI 100 hari dengan memberi fokus kepada 3 pendekatan utama seperti berikut:

(i) Memulihkan usahawan dan koperasi terjejas melalui bantuan pembiayaan di mana sebanyak 26 program dengan peruntukan

SOALAN NO : 5

sebanyak RM7.06 billion (ini termasuk moratorium yang diberi kepada usahawan) melibatkan 192,541 penerima manfaat.

(ii) Membantu golongan yang hilang pekerjaan, belia dan graduan, golongan asnaf dan OKU yang menceburि bidang keusahawanan yang mengandungi pelaksanaan 15 program dengan peruntukan sebanyak RM40.4 juta dan melibatkan 2,570 penerima manfaat; dan

(iii) Memperkuuhkan daya tahan Perusahaan Mikro, Kecil dan Sederhana (PMKS) melalui adaptasi teknologi digital yang merangkumi pelaksanaan 11 program dengan peruntukan sebanyak RM14.8 juta dan melibatkan 8,950 penerima manfaat.

3. Antara program yang telah dilaksanakan:

(i) Program Pemasaran Online TEKUN

(ii) Program Tunas Usahawan Belia Bumiputera (TUBE)

(iii) Program Pembangunan Usahawan Mikro (BizME) Micro Connector

4. **Kajian Impak Perintah Kawalan Pergerakan (PKP) 3.0 ke atas Landskap Usahawan di Malaysia pada 15 hingga 28 Jun 2021** menunjukkan terdapat hampir 37,415 perniagaan telah gulung tikar, di mana majoritinya adalah usahawan mikro iaitu sebanyak 26,007 dan diikuti dengan perusahaan kecil dan sederhana sebanyak 2,738.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB DATO' ABDULLAH SANI B. ABDUL HAMID
(KAPAR)**

TARIKH : 28 SEPTEMBER 2021

SOALAN

DATO' ABDULLAH SANI BIN ABDUL HAMID [KAPAR] minta **MENTERI DALAM NEGERI** menyatakan berapa jumlah terkini Pendatang Asing Tanpa Izin (PATI) yang masih berada di negara ini dan berapa ramai dari kalangan mereka yang telah menerima sekurang-kurang satu dos suntikan vaksin.

JAWAPAN

Tuan Yang Di Pertua,

Untuk makluman Ahli Yang Berhormat, Kerajaan amat serius untuk mengekang kemasukan pendatang asing tanpa izin (PATI) ke dalam negara. Berhubung dengan persoalan yang dikemukakan oleh Ahli Yang Berhormat Kapar, Kementerian ini sedang melaksanakan pendataan PATI di dalam negara dengan kerjasama Kementerian Kesihatan Malaysia dan Kementerian Sains, Teknologi dan Inovasi.

Saya merakamkan penghargaan kepada semua pegawai dan anggota Jabatan Imigresen Malaysia yang sentiasa komited untuk menjaga keselamatan dan ketenteraman awam selaras dengan fungsi Kementerian Dalam Negeri. Komitmen Kementerian ini dibuktikan dengan tindakan

SOALAN NO : 12

proaktif yang diambil termasuk melaksanakan operasi penguatkuasaan secara berterusan serta tindakan pencegahan bagi mengelakkan berlakunya peningkatan jumlah PATI di negara ini. Antara operasi yang dilaksanakan oleh Kementerian ini adalah seperti OP Patuh dan OP Benteng.

Pada tahun 2021 iaitu sehingga 23 September 2021, Jabatan Imigresen Malaysia telah melaksanakan 3,011 operasi dengan tangkapan seramai 8,037 orang PATI. Manakala pada tahun 2020, Jabatan Imigresen Malaysia telah melaksanakan 6,877 operasi dengan tangkapan seramai 22,671 orang PATI. Justeru, menjadikan jumlah keseluruhan operasi dan tangkapan dalam fasa pandemik COVID-19 adalah sebanyak 9,888 operasi dan 30,708 tangkapan PATI.

Usaha pengusiran PATI dalam Depot Imigresen juga dipergiatkan oleh Jabatan Imigresen Malaysia dengan kerjasama kedutaan asing. Pada tahun 2020, Kerajaan telah mengusir 37,032 orang PATI. Manakala bagi tahun 2021, Kerajaan telah mengusir seramai 17,313 orang PATI ke negara asal. Ini menjadikan jumlah keseluruhan pengusiran dalam fasa pandemik seramai 54,345 orang PATI.

Merujuk kepada jumlah PATI yang telah menerima sekurang-kurangnya satu dos suntikan vaksin, hal ini diselaraskan di bawah Program Imunisasi COVID-19 Kebangsaan (PICK) yang dikendalikan oleh Kementerian Sains, Teknologi dan Inovasi.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : DATUK ROBERT LAWSON CHUAT [BETONG]

TARIKH : 28 SEPTEMBER 2021 (KHAMIS)

SOALAN

DATUK ROBERT LAWSON CHUAT [BETONG] minta MENTERI PERDAGANGAN DALAM NEGERI DAN HAL EHWAL PENGGUNA menyatakan :-

- (a) langkah yang diambil oleh Kementerian bagi memastikan keberadaan atau kecukupan minyak masak untuk keperluan pengguna; dan
- (b) apakah Kementerian mempunyai satu nilai penggunaan yang menjadi rujukan bagi memastikan kecukupan bekalan terutama penggunaan isi rumah dan langkah-langkah yang akan diambil pada masa hadapan supaya harga minyak masak sentiasa berada pada paras yang tidak membebankan pengguna. Apakah penambahbaikan oleh Kementerian bagi memastikan bekalan sentiasa cukup berada di pasaran.

JAWAPAN

Yang di-Pertua,

1. Bagi memastikan keberadaan atau kecukupan minyak masak untuk keperluan pengguna, Kerajaan telah memperuntukkan sebanyak 60 ribu tan metrik minyak masak bersubsidi setiap bulan.
2. Ketetapan ini dibuat dengan anggaran penggunaan minyak masak oleh rakyat Malaysia secara purata sebanyak 1.5kg hingga 2kg bagi setiap bulan. Pengagihan juga mengambil kira nisbah penduduk mengikut negeri di dalam negara.
3. Bagi memastikan harga minyak masak terus stabil dan berada di paras yang tidak membebankan, Kerajaan masih meneruskan Program Skim Penstabilan Harga Minyak Masak (COSS) dengan memastikan harga jualan minyak masak bersubsidi dijual pada harga yang ditetapkan iaitu pada harga yang ditetapkan oleh Kerajaan iaitu RM2.50 bagi setiap pek polibeg 1kg.
4. Sebagai langkah penambahbaikan untuk memastikan bekalan minyak masak mencukupi di dalam negara, Kementerian bekerjasama dengan pelbagai agensi seperti Kementerian Perusahaan Perladangan dan Komoditi (KPPK) dan Lembaga Minyak Sawit Malaysia (MPOB) serta persatuan pengusaha minyak masak di dalam negara seperti *Malaysia Edible Oil Manufacturers Association* (MEOMA) untuk memastikan keperluan rakyat Malaysia diberikan keutamaan. Sebagai contoh, Program Mekanisme Kawalan Harga Minyak Masak (MKHMM) adalah merupakan kawalan harga minyak masak di dalam botol yang telah dilaksanakan hasil kerjasama pelbagai pihak untuk memastikan minyak masak di dalam bungkus botol 1kg, 2kg, 3kg dan 5kg juga dapat disediakan pada harga yang berpatutan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN

DARIPADA : TUAN WILLIAM LEONG JEE KEEN (SELAYANG)

TARIKH : 28 SEPTEMBER 2021 (SELASA)

SOALAN

TUAN WILLIAM LEONG JEE KEEN [SELAYANG] minta **MENTERI SUMBER MANUSIA** menyatakan langkah-langkah yang diambil oleh Kerajaan untuk menyelesaikan masalah pekerja asing dan pendatang haram secara tetap untuk mengawal aliran keluar wang, membebani sistem kesihatan awam dan masalah-masalah lain.

JAWAPAN

Tuan Yang Di Pertua,

Kementerian Sumber Manusia (KSM) sedar senario kebanjiran pekerja asing dan Pendatang Asing Tanpa Izin (PATI) di Malaysia masih menjadi isu nasional yang belum dapat diatasi secara holistik. Masalah ini menimbulkan kebimbangan di kalangan masyarakat kerana ia bukan sahaja menyentuh aspek keselamatan negara dan keselamatan persempadanan, tetapi turut memberi impak yang cukup besar terhadap masalah sosial, sistem kesihatan awam dan peluang pekerjaan rakyat tempatan serta pertumbuhan ekonomi.

Dalam menangani permasalahan ini, Kementerian ini turut bekerjasama dengan agensi penguatkuasa lain terutamanya Jabatan Imigresen (JIM), Polis Diraja Malaysia (PDRM), Agensi Penguatkuasaan Maritim Malaysia (Maritim Malaysia) dan Pihak Berkuasa Tempatan (PBT) untuk terus menjalankan operasi penguatkuasaan di lokasi yang dikenalpasti menjadi tumpuan

SOALAN NO: 14

warganegara asing. Majikan yang dikesan menggaji pendatang asing tanpa izin akan diambil tindakan undang-undang di bawah Akta Imigresen 1959/63, Akta Anti Pemerdagangan Orang dan Penyeludupan Migran 2007 (Pindaan 2010) (ATIPSOM) dan Akta Kerja 1955.

Semenjak Pelaksanaan Perintah Kawalan Pergerakan (PKP) tiada kemasukan baharu pekerja asing ke dalam negara berikutan daripada penutupan pintu sempadan sehingga 31 Disember 2021. Bagi menangani kekurangan tenaga kerja yang dihadapi oleh pihak industri susulan daripada pembekuan pengambilan pekerja asing baharu dalam negara, Kerajaan menerusi Kementerian Dalam Negeri dan Kementerian Sumber Manusia telah merangka pelan **Program Rekalibrasi**. Objektif utama pelaksanaan pelan ini adalah:

- a) membenarkan PATI pulang ke negara asal secara sukarela melalui **Program Rekalibrasi Pulang (PRP)**; dan
- b) meregularisasikan PATI yang ada dalam negara sebagai pekerja asing yang sah melalui **Program Rekalibrasi Tenaga Kerja (RTK)**.

Program Rekalibrasi Pulang merupakan inisiatif Kerajaan bertujuan untuk memberi peluang kepada PATI yang telah melakukan kesalahan tinggal lebih masa dan berada di Malaysia tanpa pas yang sah untuk balik ke negara asal secara sukarela. Program ini secara tidak langsung boleh menyelesaikan masalah pendatang haram. Sehingga Ogos 2021, seramai **96,809 PATI telah dihantar pulang** ke negara masing-masing menerusi Program Rekalibrasi Pulang.

Manakala Program Rekalibrasi Tenaga Kerja pula merupakan suatu program khas untuk meregularisasikan PATI di negara ini sebagai pekerja asing yang sah digajikan oleh majikan yang layak tertakluk kepada syarat-syarat ketat yang diputuskan oleh Kerajaan melalui JIM dan KSM. Lambakan pekerja asing khususnya pendatang tanpa izin turut meningkatkan pengaliran keluar wang, sekali gus melemahkan nilai tukaran mata wang negara. Oleh itu, kerajaan sedang mengkaji mekanisme untuk mengurangkan kebergantungan kepada tenaga kerja asing, sekali gus mengawal aliran keluar wang negara untuk jangka masa panjang. Antara langkah awal adalah dengan paras gaji

SOALAN NO: 14

minimum dinaikkan kepada RM1,200 sebulan di wilayah bandar utama dan RM1,100 sebulan di kawasan selain wilayah bandar utama agar rakyat tempatan berminat untuk mengisi peluang pekerjaan yang ada.

Pelaksanaan Perintah Kawalan Pergerakan (PKP) dalam membendung pandemik COVID-19 yang menjadi ancaman besar kepada kesihatan awam dan ekonomi kali ini masih perlu diperhalusi, terutama faktor kewujudan kluster tempat kerja. Mengikut rentetan perkembangan COVID-19, kadar keberjangkitan membabitkan tenaga kerja warga asing sukar diturunkan akibat sikap acuh tidak acuh majikan terhadap prosedur operasi standard (SOP) yang digariskan KSM dan Kementerian Kesihatan Malaysia (KKM).

Perkara ini meningkatkan risiko jangkitan COVID-19 di penginapan pekerja. Justeru, Jabatan Tenaga Kerja telah menguatkuasakan Akta Standard Minimum Perumahan dan Kemudahan Pekerja 1990 [Akta 446] di mana majikan perlu mematuhi piawaian ditetapkan dalam menguruskan penginapan pekerja supaya kluster berkaitan tempat kerja dapat dihapuskan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB PUAN NURUL IZZAH BT. ANWAR
(PERMATANG PAUH)**

TARIKH : 28 SEPTEMBER 2021 (SELASA)

SOALAN

**PUAN NURUL IZZAH BINTI ANWAR [PERMATANG PAUH] minta
MENTERI DALAM NEGERI menyatakan :-**

- (a) komitmen Kerajaan melindungi pengkritik dan pemberi maklumat daripada tindakan intimidasi; dan
- (b) langkah-langkah untuk memastikan undang-undang tidak digunakan sebagai senjata untuk mendiamkan *legitimate dissent* menerusi pindaan atau pemansuhan Akta Hasutan 1948 dan Seksyen 233 Akta Komunikasi dan Multimedia.

JAWAPAN

Tuan Yang Di Pertua,

Kementerian Dalam Negeri (KDN) melalui penguatkuasaan pihak Polis Diraja Malaysia (PDRM) sentiasa komited dalam mendukung hak kebebasan bersuara, selagi mana mematuhi peraturan-peraturan yang telah ditetapkan. Walau bagaimanapun, PDRM akan mengambil tindakan tegas dengan melakukan tangkapan dan pendakwaan terhadap mana-mana individu yang melakukan kesalahan menghina, mempersenda atau memainkan isu-isu Institusi Diraja, agama atau perkauman berdasarkan peruntukan undang-undang sedia ada seperti Akta Hasutan 1948, Kanun Keseksaan dan Akta Komunikasi dan Multimedia 1998.

Kementerian Dalam Negeri dari semasa ke semasa sentiasa mengkaji perundangan tersebut untuk ditambah baik. Selain itu, pihak polis juga akan terus melakukan pemantauan ke atas penyebaran maklumat dan tindakan segera akan diambil sekiranya terdapat elemen yang melibatkan sensitiviti Institusi Diraja, agama atau perkauman. Ini kerana, isu-isu sensitif tersebut boleh menjaskan ketenteraman dan keharmonian rakyat jika tidak dibendung.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

DARIPADA : TUAN SABRI BIN AZIT [JERAI]

TARIKH : 28 SEPTEMBER 2021 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan peranan atau usaha-usaha sanitasi oleh pihak bomba ke atas premis-premis Kerajaan.

JAWAPAN

Tuan Yang di-Pertua,

1. Untuk makluman Ahli Yang Berhormat, Jabatan Bomba dan Penyelamat Malaysia (JBPM) telah melaksanakan operasi sanitasi dan disinfeksi ke atas premis-premis Kerajaan sejak 30 Mac 2021. Sehingga 25 Ogos 2021, JBPM telah melaksanakan operasi sanitasi dan disinfeksi ke atas **12,598 premis Kerajaan** di seluruh negara merangkumi premis-premis dan bilangannya adalah seperti berikut:

- (i) 2,266 sekolah Kerajaan;
- (ii) 861 pejabat/balai PDRM;
- (iii) 324 balai JBPM;
- (iv) 39 penjara;
- (v) 35 depoh imigresen;
- (vi) 316 pusat tahfiz; dan

SOALAN NO : 17

(vii) 8,757 lain-lain premis Kerajaan.

2. Selain melaksanakan operasi sanitasi apabila terdapat kes jangkitan COVID-19 di bangunan-bangunan Kerajaan, JBPM juga mengambil inisiatif memberi latihan sanitasi atau disinfeksi kepada kakitangan premis-premis Kerajaan supaya mereka boleh melaksanakan operasi sanitasi atau disinfeksi di premis masing-masing.
3. Pada masa yang sama, JBPM juga melaksanakan sebanyak **11,968 operasi** sanitasi dan disinfeksi melibatkan premis yang menjadi tumpuan orang ramai di bawah kategori lain-lain seperti berikut:
 - (i) 2,589 kawasan perumahan/PPR;
 - (ii) 3,674 tempat ibadat;
 - (iii) 464 stesen pengangkutan awam;
 - (iv) 906 pasar awam;
 - (v) 404 pasar raya; dan
 - (vi) 3,931 pusat perniagaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN

**DARIPADA : PUAN RUSNAH BINTI ALUAI
[TANGGA BATU]**

TARIKH : 28 SEPTEMBER 2021 (SELASA)

SOALAN

PUAN RUSNAH BINTI ALUAI [TANGGA BATU] minta **MENTERI SUMBER MANUSIA** menyatakan sejauh mana keberkesanan Program MyFutureJob berdasarkan kepada data statistik membantu golongan yang memerlukan pekerjaan semenjak ianya dilancarkan.

JAWAPAN

Tuan Yang Di Pertua,

Sejak pelancaran portal **MyFutureJobs** pada tahun 2020 sehingga 10 September 2021, seramai **1.13 juta pencari pekerja telah didaftarkan** manakala sebanyak **2.31 juta kosongan jawatan telah diiklankan** di portal tersebut.

Melalui portal MyFutureJobs, seramai **377,076 orang** pencari kerja **telah berjaya mendapatkan pekerjaan**. Seramai **64,766 orang** adalah daripada **golongan** pencari kerja yang telah kehilangan pekerjaan dan menuntut faedah di bawah **Sistem Insurans Pekerjaan (SIP)** manakala sebanyak **312,310 orang** adalah daripada golongan pencari kerja **awam**.

Selain itu, portal MyFutureJobs adalah merupakan **portal pekerjaan sehenti** bagi semua pencari kerja dalam negara yang menghimpunkan pelbagai **peluang pekerjaan, program reskilling dan upskilling** serta **program-program keusahawanan** daripada pelbagai agensi.

MyFutureJobs merupakan portal **berteknologi tinggi** dan terkini bagi membuat **padanan pekerjaan** berdasarkan kelayakan, kemahiran, pengalaman, gaji dan lain-lain mengikut keperluan majikan (*job matching*).

Portal MyFutureJobs telah melancarkan lagi proses perkhidmatan pekerjaan dan juga telah digunakan sebagai **platform** dalam melaksanakan **Program Insentif Pengambilan Pekerja (Hiring Incentive Programme)**.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : DATO' SERI TIONG KING SING [BINTULU]

TARIKH : 28 SEPTEMBER 2021 (SELASA)

SOALAN

DATO' SERI TIONG KING SING [BINTULU] minta **MENTERI KESIHATAN** menyatakan adakah Kerajaan akan memberi suntikan ketiga vaksin kepada rakyat dan penduduk Malaysia sebelum hujung tahun 2021 bagi meningkatkan tahap imuniti.

JAWAPAN

Tuan Yang di-Pertua,

1. YAB Perdana Menteri telah mengumumkan pada 19 September 2021 bahawa kerajaan telah bersetuju untuk melaksanakan pemberian dos ketiga vaksin COVID-19 bagi meningkatkan perlindungan kepada golongan rentan daripada risiko jangkitan COVID-19.
2. Keutamaan akan diberikan kepada kumpulan yang berisiko tinggi terlebih dahulu seperti anggota barisan hadapan kesihatan, pesakit kurang daya tahan imun (*immunocompromised*), warga tua dengan komorbiditi dan individu yang tinggal atau bekerja di pusat jagaan jangka panjang (*long-term care facilities*). Pemberian dos ketiga vaksin COVID-19 akan dilaksanakan apabila liputan imunisasi populasi dewasa di seluruh negara melebihi 80%. Bagi tujuan tersebut, panel pakar perubatan dan kesihatan sedang membangunkan garis panduan pelaksanaan pemberian dos ketiga dan pada yang sama permohonan untuk mendapatkan kelulusan Pihak Berkuasa Kawalan Dadah sedang dilaksanakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN SIVAKUMAR VARATHARAJU NAIDU
[BATU GAJAH]**

TARIKH : 28 SEPTEMBER 2021 (SELASA)

SOALAN

TUAN SIVAKUMAR VARATHARAJU NAIDU [BATU GAJAH] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan tentang inflasi yang melanda di negara kita. Apakah langkah-langkah yang telah diambil oleh Kerajaan untuk mengawal peningkatan kos sara hidup yang dihadapi oleh seluruh rakyat Malaysia.

JAWAPAN

Yang di-Pertua,

Untuk makluman Ahli Yang Berhormat, Jabatan Perangkaan Malaysia melaporkan **bahawa Indeks Harga Pengguna (IPH) pada Julai 2021 meningkat dengan perlahan pada kadar 2.2% kepada 122.5 berbanding 119.9 pada bulan yang sama tahun sebelumnya**. Dalam hubungan ini, Kementerian Perdagangan Dalam Negeri dan Hal Ehwal Pengguna secara khususnya telah melaksanakan pelbagai inisiatif bagi menangani kos sara hidup rakyat melalui:

- (i) Penguatkuasaan **Akta Kawalan Harga dan Antipencatutan 2011** bagi mengawal pengambilan keuntungan secara tidak munasabah oleh peniaga;

- (ii) Pelaksanaan **Skim Harga Maksimum Musim Perayaan** (SHMMP) pada musim perayaan utama;
- (iii) **Penguatkuasaan Perintah Kawalan Harga Dan Antipencatutan** (Penandaan Harga Bagi Barang Dan Caj Bagi Perkhidmatan) 2020 bagi mewajibkan peniaga meletakkan tanda harga bagi barang dan caj bagi perkhidmatan;
- (iv) **Program Penyeragaman Harga** turut diperkenalkan bagi membolehkan rakyat di kawasan pedalaman dan terpencil menikmati harga barang keperluan asas yang sama dengan kawasan bandar;
- (v) **Pemantauan harga barang keperluan asas di seluruh negara** di bawah **Program Pemantauan Harga** oleh **Pegawai Pemantau Harga Kementerian**;
- (vi) Kerjasama antara Kementerian dan pengguna sebagai ejen penyaluran dan sebaran maklumat kepenggunaan, terutama mengenai isu harga barang contohnya inisiatif **Rakan KPDNHEP**; dan
- (vii) Promosi **medium interaktif** bagi memudahkan rakyat membuat perbandingan harga melalui aplikasi pintar **PriceCatcher** dan mengemukakan aduan melalui aplikasi **Ez Adu**.
- (viii) Pelaksanaan Program **Food Bank Malaysia** yang telah memberi manfaat kepada 627,237 isi rumah dan 17,954 orang pelajar. Program ini juga telah dilaksanakan di 27 IPTA/IPTS/Politeknik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJAH AZIZAH BINTI DATUK SERI
PANGLIMA HAJI MOHD DUN [BEAUFORT]**

TARIKH : 28 SEPTEMBER 2021 (KHAMIS)

SOALAN

DATUK HAJAH AZIZAH BINTI DATUK SERI PANGLIMA HAJI MOHD DUN [BEAUFORT] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah tindakan yang telah diambil oleh pihak Kementerian bagi menangani masalah kekurangan bahan-bahan mentah utama seperti gula, minyak masak, beras dan sebagainya terutamanya di musim pandemik COVID-19.

JAWAPAN

Usaha-usaha yang dilakukan oleh Kementerian ini bagi memastikan barang keperluan asas seperti gula, minyak masak dan telur sentiasa mencukupi di pasaran adalah seperti berikut:

- a) Menjalankan **pemeriksaan harian ke premis-premis perniagaan runcit, borong dan juga pengilang** bagi memantau tahap keberadaan (*availability*) dan kedudukan bekalan 10 jenis barang asas di pasaran. Kementerian memantau ke atas 2,711 peruncit daerah terpilih, 1,039 pemborong daerah terpilih dan 223 pengilang daerah terpilih yang meliputi 222 Parlimen dan 576 DUN.
- b) Mewujudkan **pangkalan data perbekalan barang keperluan asas** melalui mekanisma kutipan data pengeluaran, pengedaran dan kedudukan bekalan daripada peniaga-peniaga terpilih. Hasil analisa data-data tersebut akan diterjemah dalam bentuk *trend* pengeluaran, pengedaran dan kedudukan bekalan bagi memantau situasi semasa bekalan barang di pasaran.
- c) Memberi kebenaran kepada peniaga (peruncit dan pemborong) yang terlibat dengan Program Bantuan Bakul Makanan untuk **menambah stok simpanan (*stockpile*) barang kawalan sehingga 30 peratus (%)** melebihi had simpanan dalam syarat lesen. Langkah ini diharapkan dapat menangani masalah kekurangan bekalan di samping membantu melancarkan program kerajaan bagi membantu rakyat yang terjejas akibat pandemik COVID-19.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MOHD. SALIM SHARIF
[JEMPOL]**

TARIKH : 28 SEPTEMBER 2021 (SELASA)

SOALAN

DATO' HAJI MOHD. SALIM SHARIF minta **MENTERI KESIHATAN** menyatakan faktor peningkatan kes 'brought-in-dead' (BID) sejak kebelakangan ini dan langkah Kementerian untuk mengatasinya.

JAWAPAN:

Tuan Yang di-Pertua,

1. Kadar kematian yang disebabkan oleh COVID-19 di Malaysia termasuklah kategori BID adalah selari dengan kadar peningkatan kes positif COVID-19 terutamanya melibatkan kawasan Lembah Klang. Berdasarkan analisis kematian BID, 95% kes yang berlaku hanya diketahui positif COVID-19 setelah ujian diadakan ke atas jenazah apabila sampai ke hospital.
2. Ini bermakna, pesakit tidak mengetahui telah dijangkiti dan tidak sempat untuk hadir ke klinik kesihatan/ hospital bagi tujuan mengadakan ujian saringan dan seterusnya mendapatkan rawatan. Hanya 5% daripada kes-kes tersebut yang telah menjalani ujian COVID-19 dan didiagnosis sebelum meninggal dunia di rumah.
 - i) Bagi tempoh 1 Mei 2021 hingga 22 Ogos 2021, sebanyak 69.1% (150 kes) dari 217 kematian BID telah dibincangkan di peringkat Jawatankuasa Kecil Pemantauan Kematian COVID-19. Kebanyakan kes BID yang berlaku adalah melibatkan individu yang masih belum hadir ke Pusat Penilaian COVID-19 (CAC) untuk penilaian melibatkan sebanyak **110 (73%)** kes. Ianya meliputi **47 (43%)** kes yang telah dinotifikasi ke PKD manakala **63 (57%)** kes belum dinotifikasi ke PKD. Hanya sejumlah **40 (27%)** kes BID berlaku dalam kalangan pesakit yang berada dalam pemantauan oleh CAC.
 - ii) Antara faktor penyumbang dalam kalangan **57%** kes yang belum sampai ke pengetahuan PKD adalah berlakunya jangkitan yang melibatkan kontak rapat (*close contact*) kepada pesakit yang mana kontak rapat ini tidak pergi atau lewat mendapatkan ujian dan rawatan, pesakit yang bergejala tidak pergi mendapatkan ujian swab dan rawatan dimana-mana fasiliti yang menyediakan perkhidmatan tersebut, pesakit yang hadir dengan gejala ke klinik swasta

tidak dibuat ujian COVID-19 dan kegagalan untuk mendapatkan pengangkutan atau perkhidmatan ambulans kerana bilangan kes yang tinggi yang memerlukan perkhidmatan ambulan.

- iii) Manakala faktor penyumbang dikalangan kes yang berlaku di peringkat PKD dan CAC adalah pesakit belum diberi tarikh temujanji di CAC disebabkan peralihan antara PKD, kelewatan PKD membuat verifikasi kes yang dinotifikasi kerana bebanan kes yang tinggi berbanding sumber manusia yang ada, PKD tidak dapat menghubungi pesakit kerana maklumat yang tidak lengkap ataupun nombor telefon yang salah, kes yang telah diberi tarikh temujanji di CAC tetapi menunggu untuk kemasukan ke wad kerana bilangan katil yang telah penuh digunakan, pesakit enggan dirujuk ke hospital dan pesakit yang mengalami kemerosotan tahap kesihatan yang berlaku dalam jangka masa yang singkat semasa dalam pengawasan di rumah. Susulan dari isu-isu yang dikenal pasti, beberapa langkah pencegahan dan penambahbaikan dalam proses kerja di Pusat Pemantauan COVID-19 (CAC) serta pemantauan pesakit COVID-19 yang diletakkan di bawah pemantauan dan pengawasan di rumah telah diambil, antaranya:-
- i. Memperkuatkan proses kerja di Pusat Penilaian COVID-19 (CAC) dalam mengenalpasti kes yang sesuai untuk menjalani pemantauan dan pengawasan di rumah terutamanya Kategori 1 dan Kategori 2. Manakala kes berisiko tinggi seperti warga emas, mempunyai komorbid dan imuniti yang rendah akan dirujuk ke PKRC atau hospital.
 - ii. Memperkuatkan komunikasi antara petugas kesihatan dan pesakit bagi memudahkan petugas kesihatan menghubungi pesakit bagi menilai keadaan semasa pesakit serta membantu pesakit memaklumkan kemerosotan gejala yang dialami seterusnya

SOALAN NO : 22

mendapatkan nasihat tindakan segera yang perlu diambil.

- iii. Memastikan pesakit memaklumkan tahap kesihatan serta perubahan gejala menggunakan *Health Assessment Tool (HAT)* sehingga habis tempoh kuarantin.
- iv. Pelaksanaan *Virtual CAC*

Pada 23 Julai 2021, KKM telah mengaktifkan pemantauan secara maya melalui inisiatif *Virtual CAC* untuk individu yang disahkan positif COVID-19 tetapi tidak bergejala di negeri Selangor, WP Kuala Lumpur & Putrajaya dan Seremban, N.Sembilan. Pegawai perubatan akan sentiasa membuat penilaian keadaan pesakit secara maya dari semasa ke semasa.

- v. Bekalan *pulse oxymeter* turut dipinjamkan kepada pesakit bagi membantu pesakit memantau keadaan kesihatan mereka sepanjang menjalani kuarantin di rumah. Selain itu, KKM turut memperkuuhkan jalinan kerjasama dengan sektor swasta dengan melibatkan lebih ramai pengamal perubatan swasta dalam pemantauan pesakit di rumah melalui penubuhan CAC GP dan CAC Swasta.

Sekian, terima kasih.

**MESYUARAT PERTAMA, PENGGAL KEEMPAT
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

DARIPADA : TUAN SABRI BIN AZIT [JERAI]

TARIKH : 28 SEPTEMBER 2021 (SELASA)

SOALAN

minta **MENTERI PEMBANGUNAN LUAR BANDAR** menyatakan adakah Kementerian bercadang untuk meningkatkan peruntukan baik pulih rumah e-Kasih kepada RM20,000 sejajar dengan kos barang yang semakin meningkat kini berbanding tahun 2016.

JAWAPAN

Tuan Yang di-Pertua,

Kementerian mengambil maklum dan menyambut baik cadangan Yang Berhormat untuk meningkatkan kos siling baik pulih rumah kepada RM20,000 disebabkan oleh kenaikan harga bahan binaan pada masa ini.

Untuk makluman Yang Berhormat, perkara ini akan diperhalusi dan perlu diangkat untuk kelulusan Jemaah Menteri kerana ia melibatkan implikasi kewangan dan bilangan penerima bantuan yang akan menerima manfaat daripada program bantuan berkenaan. Walau bagaimanapun, buat masa ini Kementerian sedia mempertimbangkan kos baik pulih melebihi siling sedia ada berdasarkan kepada tahap keperluan terutama melibatkan keselamatan struktur rumah.

Kadar siling bantuan baik pulih rumah di Semenanjung Malaysia adalah sebanyak RM13,000 seunit manakala di Sabah/ Sarawak/ W.P Labuan adalah sebanyak RM15,000 seunit.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TENGKU ZULPURI BIN RAJA PUJI [RAUB]

TARIKH SOALAN : 28 SEPTEMBER 2021 (SELASA)

SOALAN

Minta **MENTERI PEMBANGUNAN USAHAWAN DAN KOPERASI** menyatakan langkah-langkah yang diambil oleh pihak Kementerian dalam membantu golongan seperti M40 khususnya sektor SME telah jatuh kepada golongan B40.

JAWAPAN

Tuan Yang di-Pertua,

- Kementerian Pembangunan Usahawan dan Koperasi (MEDAC) komited dalam usaha untuk membantu perusahaan Mikro, Kecil dan Sederhana (PMKS) yang terjejas termasuk yang telah jatuh kepada golongan B40 akibat penularan wabak COVID-19.
- Pelbagai program dan langkah dilaksanakan oleh pihak Kementerian bagi membantu golongan usahawan PMKS tersebut yang melibatkan **moratorium pinjaman, bantuan pembiayaan, bantuan geran dan juga khidmat nasihat dan latihan**.

MORATORIUM PINJAMAN

- Agensi di bawah MEDAC telah melaksanakan moratorium bagi membantu usahawan yang terkesan dengan pandemik Covid-19 yang melibatkan moratorium pembayaran pinjaman dan bayaran sewa oleh penyewa-penyewa yang menyewa permis-permis agensi di bawah MEDAC yang melibatkan kos keseluruhan sebanyak RM 5.4 billion.

BANTUAN PEMBIAYAAN

- Dalam aspek bantuan pembiayaan, Kementerian ini melalui agensi menyediakan bantuan pembiayaan kepada usahawan mikro, kecil dan sederhana yang keseluruhannya berjumlah RM1.6 billion. Antara agensi yang terlibat dalam memberi bantuan pembiayaan adalah

- Tekun Nasional
- SME Corp
- SME Bank
- Bank Rakyat
- UDA
- Pernas
- PUNB
- AIM

BANTUAN GERAN

- MEDAC melalui SME Corp menyediakan bantuan geran melibatkan bumiputera melalui program BEEP dan juga bukan bumiputera melalui program BAP yang melibatkan kos sebanyak RM14.5 juta

KHIDMAT NASIHAT DAN LATIHAN

- Bagi aspek khidmat nasihat, SME Corp. Malaysia telah membangunkan **Portal MyAssist MSME**, salah satu inisiatif di bawah Pelan Jana Semula Ekonomi Negara (PENJANA), iaitu sebuah platform dalam talian untuk membantu PKS mendapatkan khidmat nasihat perniagaan, penyertaan dalam sesi webinar, meluaskan pasaran dan mempromosikan produk melalui e-dagang.
- Bagi aspek latihan, INSKEN menyediakan beberapa skim khidmat latihan seperti Kursus Asas Keusahawanan, Insken e-Biz Clinic, E-Board, IBT dan IBBC yang melibatkan kos keseluruhan sebanyak RM3.7 juta.

PENUBUHAN JAWATANKUASA KHAS

- Selain itu, Kementerian juga mewujudkan satu jawatankuasa khas bagi membantu usahawan yang terkesan akibat pandemik COVID-19. Jawatankuasa khas ini diketuai oleh KSU MEDAC dan melibatkan semua agensi di bawah MEDAC bagi menyelaraskan dan memudahkan program sedia ada agar lebih tersusun dan sampai kepada usahawan yang memerlukan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

DARIPADA : YB TUAN SHAHARIZUKIRNAIN KADIR (SETIU)

TARIKH : 28 SEPTEMBER 2021 (SELASA)

SOALAN

TUAN SHAHARIZUKIRNAIN BIN ABD. KADIR [SETIU] minta **MENTERI DALAM NEGERI** menyatakan relevan untuk mengaktifkan semula program Malaysia Rumah Keduaku (MM2H) memandangkan negara masih lagi berada dalam pandemik COVID-19.

JAWAPAN

Tuan Yang Di Pertua,

Untuk makluman Ahli Yang Berhormat, Kerajaan telah bersetuju dengan penambahbaikan dasar dan syarat-syarat penyertaan baharu Program Malaysia Rumah Keduaku (MM2H) sebagai salah satu strategi untuk membantu pelaksanaan Pogram Pemulihan Negara (PPN) bagi menjana semula ekonomi negara. Sehubungan itu, sepertimana yang telah diumumkan dalam sidang media yang diadakan pada 11 Ogos yang lepas, Program MM2H akan diaktifkan semula dan permohonan baharu akan diproses serta dikendalikan oleh Jabatan Imigresen Malaysia (JIM) mulai Oktober 2021, iaitu setelah semua proses berkaitan perundangan selesai.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN

**DARIPADA : PUAN NURUL IZZAH BINTI ANWAR
(PERMATANG PAUH)**

TARIKH : 28 SEPTEMBER 2021 (SELASA)

SOALAN

**PUAN NURUL IZZAH BINTI ANWAR [PERMATANG PAUH] minta
MENTERI SUMBER MANUSIA menyatakan:-**

- (a) pelan Kerajaan menyusun keperluan tenaga kerja memenuhi keperluan industri terpilih; dan
- (b) perancangan pewujudan kursus TVET rentas semua Kementerian dan agensi yang disasar pasca-pandemik beserta gaji setimpal dan pencapaian HRDF menerusi kursus latihan yang ditawarkan beserta status mobiliti kerjaya setiap peserta.

JAWAPAN

Tuan Yang Di Pertua,

Majlis Pekerjaan Negara atau *National Employment Council* (NEC) telah ditubuhkan oleh Kerajaan bagi merealisasikan strategi menjana dan mengekalkan pekerjaan. NEC memainkan peranan yang penting bukan sahaja bagi meneruskan momentum pemuliharan ekonomi dan meningkatkan penciptaan pekerjaan bahkan untuk menangani isu-isu lain yang berkaitan seperti kekurangan pekerja di sektor tertentu (*underemployment*), kesaksamaan peluang untuk golongan rentan dan penggajian.

SOALAN NO : 26

Majlis Ekonomi Digital dan 4IR Negara dengan struktur tadbir urus yang bersepadu telah ditubuhkan bagi meningkatkan keupayaan negara dalam mengoptimumkan perkembangan teknologi 4IR dan memastikan pertumbuhan ekonomi digital sejajar dengan Wawasan Kemakmuran Bersama 2030 dan Agenda Pembangunan Mampan 2030.

Menerusi Majlis ini, Kementerian Sumber Manusia (KSM) telah diberi tanggungjawab untuk mengetuai Kluster Bakat Digital yang berperanan dalam mengenal pasti keperluan dan merancang program-program penyediaan bakat digital untuk disalurkan kepada pasaran pekerjaan negara yang mencakupi pelbagai cabang industri.

Berikutan itu, KSM bercadang untuk memperkenalkan **sistem pengesahan bersepadu (*integrated tracer*)** yang berperanan untuk memantau keberkesanan latihan kemahiran yang disediakan sebagai nilai tambah kepada peserta untuk penempatan pekerjaan mereka dan **platform digital sehenti** bagi latihan peningkatan kemahiran dan kepelbagaian kemahiran.

Tuan Yang di-Pertua,

Kerajaan menyediakan pelbagai platform dan peruntukan dana untuk membolehkan para pekerja mahu pun bakal pekerja menyertai pelbagai program latihan kemahiran. KSM melalui jabatan dan agensi seperti Jabatan Tenaga Manusia (JTM), Jabatan Pembangunan Kemahiran (JPK) dan Pembangunan Sumber Manusia Berhad (PSMB) berperanan aktif dalam menawarkan program-program latihan secara berstruktur termasuk TVET bagi membantu melengkapkan tenaga kerja dengan kemahiran-kemahiran yang diperlukan oleh industri.

PSMB contohnya sentiasa memberi fokus kepada latihan peningkatan kemahiran dan latihan semula kemahiran pekerja melalui pelbagai skim dan program khas Kerajaan seperti Skim Bantuan Latihan-Khas (SBL-Khas), Skim Latihan Industri, PENJANA HRDCorp dan lain-lain lagi.

Lima (5) skim telah diperkenalkan melalui inisiatif PENJANA HRDCorp iaitu *Place & Train*, *B40 Development*, *SME Development*, *Industrial Revolution 4.0* dan Gerak Insan Gemilang (GIG.) Skim-skim ini diwujudkan dengan tujuan untuk membantu rakyat mendapat penempatan pekerjaan, *self-*

SOALAN NO : 26

employed serta menambah dan meningkatkan kemahiran mereka. Setakat 31 Ogos 2021, sebanyak 85,527 pelatih dengan bantuan kewangan berjumlah RM475 juta (geran padanan) telah diluluskan bagi mengikuti skim-skim ini. Daripada jumlah tersebut, 67,255 pelatih dengan bantuan kewangan berjumlah RM376 juta telah diluluskan yang melibatkan penempatan pekerjaan dan pekerjaan kendiri.

Menerusi skim *B40 Development, SME Development, Industrial Revolution 4.0* dan Gerak Insan Gemilang (GIG.), peserta dilengkapkan dengan pelbagai latihan kemahiran dan ilmu baru bagi membolehkan mereka terus menyumbang kepada produktiviti syarikat dan seterusnya menyumbang kepada pertumbuhan ekonomi negara. Menjelang tahun 2030, kerajaan mensasarkan peningkatan 35 peratus tenaga kerja berkemahiran tinggi baharu dalam sektor ekonomi masa hadapan dan 60 peratus lepasan SPM memasuki aliran TVET bertujuan mengurangkan permasalahan ketidakpadanan kemahiran dan kebergantungan kepada buruh asing. Pada masa ini, program TVET ditawar dan dilaksana oleh pelbagai agensi pelaksana merentasi pelbagai Kementerian.

Bagi tujuan menambah baik penyelarasan ekosistem TVET, Kerajaan telah bersetuju dengan penubuhan Majlis Pendidikan dan Latihan Teknikal dan Vokasional Negara (MTVET). MTVET merupakan badan tertinggi dalam membuat keputusan berkaitan hala tuju TVET negara serta memperhalusi apa jua isu berkaitan TVET.

Bagi menyokong inisiatif ini, kolaborasi strategik merentasi kementerian yang disokong oleh penglibatan pihak industri akan dilaksanakan secara berterusan bagi memastikan institusi latihan dapat merancang serta menghasilkan modal insan dengan ilmu dan kemahiran yang memenuhi keperluan industri, dan seterusnya dapat memasuki pasaran pekerjaan dengan gaji yang setimpal.

Sekian, terima kasih.

**MESYUARAT PERTAMA, PENGGAL KEEMPAT
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : TUAN RAMLI BIN DATO' MOHD NOR
[CAMERON HIGHLANDS]**

TARIKH : 28 SEPTEMBER 2021 (SELASA)

SOALAN

minta **MENTERI PEMBANGUNAN LUAR BANDAR** menyatakan adakah pelantikan Pengarah Jabatan Kemajuan Orang Asli (JAKOA) yang baru telah dilaksanakan dan adakah individu yang dilantik itu merupakan dalam kalangan masyarakat Orang Asli.

JAWAPAN

Tuan Yang di-Pertua,

Untuk makluman Ahli Yang Berhormat, pihak Kementerian telah melantik Ketua Pengarah Jabatan Kemajuan Orang Asli (JAKOA), pelantikan ini adalah selaras dengan Seksyen 5(1), Akta Orang Asli 1954 (Akta 134) setelah mendapat perkenan daripada Kebawah Duli Yang Maha Mulia Seri Paduka Baginda Yang di-Pertuan Agong.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS TAHUN 2021**

PERTANYAAN : JAWAB LISAN

**DARIPADA : DATO' WIRA HAJI MOHD. ANUAR BIN MOHD.
TAHIR [TEMERLOH]**

TARIKH : 28 SEPTEMBER 2021 (SELASA)

SOALAN

YB DATO' WIRA HAJI MOHD. ANUAR BIN MOHD. TAHIR [TEMERLOH] minta **MENTERI SUMBER MANUSIA** menyatakan mohon penjelasan Kementerian adakah cadangan 'Penempatan Pekerja Secara Berpusat' telah dilaksanakan dan langkah ini tidak akan mengakibat kos pembinaan meningkat serta menyebabkan projek tidak berdaya maju dan boleh disiapkan dengan jayanya.

JAWAPAN

Tuan Yang Di Pertua,

Kerajaan bercadang agar penginapan berpusat ini dijadikan syarat utama dalam pemilihan penginapan pekerja oleh majikan pada masa akan datang. Tujuan utama penyediaan penginapan secara berpusat disarankan adalah demi menjaga kebijakan dan keselamatan pekerja serta mengekalkan ketenteraman dan keharmonian sosial masyarakat di samping mematuhi standard dalam negara dan antarabangsa berhubung perumahan dan penginapan pekerja.

Selain itu, langkah ini juga bertujuan untuk mewujudkan penginapan pekerja yang lebih sistematik dan kondusif bagi tujuan perancangan pembangunan negara, melindungi hak dan kebijakan pekerja berkaitan penginapan. Penginapan berpusat dapat melindungi pekerja daripada elemen buruh paksa serta meningkatkan kawalan dari segi keselamatan dan kesihatan pekerja.

Selaras dengan pindaan **Akta Standard Minimum Perumahan, Penginapan dan Kemudahan Pekerja 1990 [Akta 446]** berkuatkuasa mulai 1 Jun 2021, maka Akta ini telah terpakai untuk semua sektor pekerjaan. Akta 446 ini mewajibkan majikan-majikan yang menyediakan penginapan kepada pekerja mendapatkan **Perakuan Penginapan** daripada Jabatan Tenaga Kerja Semenanjung Malaysia (**JTKSM**). Penginapan ini sama ada disediakan sendiri, disewa atau menggunakan perkhidmatan penyedia penginapan berpusat (**centralised labour quarters, CLQ**).

Untuk makluman Dewan Yang Mulia ini,

Penginapan Berpusat (CLQ) merupakan modul atau pendekatan yang terbukti berjaya di dunia terutamanya di Singapura dan Emiriah Arab Bersatu (UAE) dalam menyediakan penginapan yang kondusif kepada pekerja terutamanya pekerja asing.

Pertubuhan Buruh Antarabangsa (ILO) menerusi Konvensyen Perburuhan Antarabangsa menggariskan bahawa semua pekerja perlu

disediakan tempat penginapan yang kondusif. Dalam konteks ini, Malaysia sering dikritik oleh pihak antarabangsa berkaitan dengan kegagalan dalam mematuhi konvensyen tersebut.

Kementerian Sumber Manusia (KSM) berhasrat untuk melaksanakan pembinaan CLQ ini dan dianggarkan negara kita memerlukan kira-kira 24,000 CLQ yang boleh menjadi tempat penginapan kepada semua pekerja asing di negara kita. Pelaksanaan CLQ ini akan dipantau secara khusus oleh KSM dan KDN dalam memastikan keselamatan dan kesihatan pekerja termasuk persekitaran terjamin.

Cadangan pembinaaan CLQ yang bersesuaian perlu mengambilkira tempoh perjalanan yang optimum iaitu di antara 15 minit ke 30 minit daripada CLQ ke tempat pekerjaan. Pembinaan keseluruhan CLQ ini dijangka akan mengambil masa selama 5 tahun. CLQ ini akan membantu kerajaan mengawalselia pekerja asing yang sah dan dalam masa yang sama boleh mengesan PATI kerana semua pekerja asing yang sah akan tinggal dalam CLQ.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN

**DARIPADA : PUAN RUBIAH BINTI HAJI WANG
[KOTA SAMARAHAN]**

TARIKH : 28 SEPTEMBER 2021 (SELASA)

SOALAN

PUAN RUBIAH BINTI HAJI WANG [KOTA SAMARAHAN] minta **MENTERI SUMBER MANUSIA** menyatakan statistik kehilangan pekerjaan di kalangan rakyat sejak pandemik COVID-19 melanda dan apakah tindakan Kerajaan menanganinya.

JAWAPAN

Tuan Yang Di Pertua,

Untuk makluman Ahli-Ahli Dewan Yang Mulia ini, berdasarkan **statistik Sistem Insurans Pekerjaan (SIP) PERKESO**, jumlah pekerja yang **kehilangan pekerjaan** bagi tempoh **Mac 2020 sehingga 20 Ogos 2021**, adalah seramai **140,608 orang** pekerja.

Kerajaan sedar serta amat prihatin terhadap impak COVID-19 di kalangan rakyat yang serius dan dalam tempoh tidak menentu ini ramai pekerja yang kehilangan pekerjaan atau diberhentikan memerlukan sokongan dan bantuan.

Sehubungan itu, antara tindakan kerajaan bagi menangani kehilangan pekerjaan adalah menyalurkan bantuan dengan **membantu Orang Berinsurans yang telah kehilangan pekerjaan**. Bantuan

tersebut adalah di bawah Sistem Insurans Pekerjaan (SIP) iaitu faedah berbentuk kewangan dan bantuan pencarian pekerjaan seperti berikut:

i. Elaun Mencari Pekerjaan (EMP)

menyediakan elaun mencari pekerjaan bagi tempoh 3 hingga 6 bulan tertakluk kepada syarat kelayakan caruman. Jumlah EMP yang dibayar adalah berdasarkan Gaji Bulanan Anggapan pada kadar seperti berikut:

- a. 80% bagi bulan yang pertama;
- b. 50% bagi bulan yang kedua;
- c. 40% bagi bulan yang ketiga dan keempat;
- d. 30% bagi bulan yang kelima dan keenam;

ii. Elaun Bekerja Semula Awal (EBSA)

insentif untuk menggalakkan Orang Berinsurans untuk kembali bekerja dengan segera. Kadar bayaran EBSA adalah sebanyak 25% daripada baki EMP dan dibayar secara pukal;

iii. Elaun Pendapatan Berkurangan (EPB)

disediakan kepada Orang Berinsurans yang bekerja dengan lebih daripada satu majikan dan telah kehilangan pekerjaan daripada salah satu majikan tersebut. Kadar dan tempoh bayaran adalah sama dengan EMP;

iv. Orang Berinsurans yang menjalani latihan akan mendapat **Elaun Latihan** di antara RM10 hingga RM20 sehari selama 6 bulan;

v. **Membiayai Fi Latihan** orang berinsurans yang dibayar kepada Penyedia Latihan yang berdaftar dengan jumlah maksimum sebanyak RM4,000; dan

- vi. Bantuan pencarian pekerjaan untuk membantu Orang Berinsurans dapat kembali bekerja semula iaitu dengan **sokongan secara individu** oleh Pegawai Perkhidmatan Pekerjaan PERKESO kepada Orang Berinsurans.

Semua elaun dan bantuan ini telah diperuntukkan oleh Akta Sistem Insurans Pekerjaan 2017 yang telah berkuatkuasa pada 1 Januari 2018.

PenjanaKerjaya 3.0 adalah penambahbaikan dan lanjutan daripada program PenjanaKerjaya 2.0. Menerusi kategori **Malaysianization** di bawah PenjanaKerjaya 3.0, insentif ditambah baik dengan merendahkan kadar gaji minimum daripada RM1,500 kepada RM1,200 sebulan untuk semua kumpulan pekerja yang digajikan bagi jawatan yang kebiasaannya diisi oleh pekerja asing. Permohonan bagi program PenjanaKerjaya 3.0 dibuka mulai 15 Julai 2021 sehingga 31 Disember 2021 dan dijangka akan menjana sebanyak 180,000 penempatan pekerjaan sehingga akhir tahun ini.

Selain itu, Program PenjanaKerjaya diperluaskan lagi kepada golongan yang bekerja sendiri atau melakukan pekerjaan gig iaitu **KerjayaGig** di mana insentif diberikan kepada Orang Bekerja Sendiri selama 6 bulan.

Menerusi PEMULIH, Kerajaan telah memperkenalkan bantuan kewangan SIP PRIHATIN 2.0 iaitu dengan **memperluaskan Elaun Mencari Pekerjaan Tambahan (EMPT)** kepada **golongan bukan pencarum PERKESO termasuk graduan baharu, lepasan sekolah dan pekerja sektor tidak formal**.

Bagi melayakkan mereka menerima bantuan ini, mereka **perlu mendaftar di portal pekerjaan MyFutureJobs** yang diuruskan PERKESO agar usaha pencarian pekerjaan mereka dapat dibantu dan dipantau oleh PERKESO. Pencari kerja juga perlu menghadiri sekurang-kurangnya tiga temuduga dalam sebulan, sama ada secara fizikal atau dalam talian bagi melayakkan mereka menerima insentif EMP sebanyak RM300 sebulan selama tempoh 2 bulan. Sekiranya pencari kerja berjaya memperoleh pekerjaan melalui portal MyFutureJobs, insentif tambahan

sebanyak RM400 akan diberikan kepada mereka. PERKESO **menyasarkan seramai 229,000 pencari kerja** akan mendapat manfaat daripada bantuan ini. Pendaftaran untuk program ini bermula pada 15 Julai 2021.

PERKESO turut mempergiatkan **Karnival Kerjaya** atau *Job Carnival* di beberapa negeri agar program pengambilan pekerja dapat dilaksanakan dengan berkesan.

Pada masa yang sama, pekerja yang telah diberhentikan kerja, mereka boleh mendaftar dengan **Portal MyFutureJobs** iaitu portal pekerjaan yang membantu mereka mendapatkan pekerjaan baharu secara percuma. MyFutureJobs merupakan portal berteknologi tinggi dan terkini bagi membuat padanan pekerjaan berdasarkan kelayakan, kemahiran, pengalaman, gaji dan lain-lain mengikut keperluan majikan (*job matching*). Sehingga kini lebih 1 juta pencari kerja yang telah berdaftar di Portal Pekerjaan MYFutureJobs. Secara keseluruhan, dari 1 Januari 2021 sehingga Ogos 2021 seramai **203,102 yang telah berjaya mendapat pekerjaan**.

Portal ini telah dapat melancarkan lagi proses perkhidmatan pekerjaan dan juga telah digunakan sebagai platform dalam melaksanakan Program Insentif Pengambilan Pekerja (*Hiring Incentive Programme*).

Selain itu, SIP juga menyediakan **kaunseling kerjaya, Skills Profiling, penulisan resume, mock interview, latihan kemahiran bahasa** dan penyampaian serta **seminar pekerjaan** bagi mereka yang telah kehilangan pekerjaan ini.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN MORDI BIMOL [MAS GADING]

TARIKH : 28 SEPTEMBER 2021 (SELASA)

SOALAN

TUAN MORDI BIMOL minta **MENTERI KESIHATAN** menyatakan status naik taraf Hospital Daerah Bau yang sudah pun diluluskan di peringkat Jabatan Kesihatan Negeri Sarawak.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian ini telah meluluskan peruntukan berjumlah RM299,997.00 untuk tujuan Naiktaraf, Ubah Suai dan Pembaikan di Hospital Bau bagi tempoh 2016 hingga 2020.

2. Antara projek naik taraf yang dilaksanakan dan siap beroperasi adalah Naik Taraf Sistem Logistik Jabatan Farmasi, Naiktaraf Jabatan Dietetik dan Sajian untuk tujuan Pensijilan *Goods Manufacturing Practice* (GMP), Kerja-kerja Naik taraf Sistem Telefon, Naik Taraf Siling dan Dinding Bilik Bedah dan Kerja-kerja Menaik Taraf dan Mengubah Suai Unit Kecemasan dan Trauma.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN CHE ALIAS BIN HAMID [KEMAMAN]

TARIKH : 28 SEPTEMBER 2021 (SELASA)

SOALAN

TUAN CHE ALIAS BIN HAMID [KEMAMAN] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan perancangan Kementerian untuk mengawal bekalan rantaian kit ujian kendiri COVID-19 yang dijual di farmasi dan klinik bagi mengelakkan penjualan bahan tiruan yang tidak menepati piawaian kesihatan.

JAWAPAN

Yang di-Pertua,

Kementerian telah menetapkan harga maksimum kit ujian pantas antigen covid-19 (ujian sendiri) bagi borong RM16.00 seunit dan runcit RM19.90 seunit. Penetapan harga maksimum telah diwartakan dan berkuatkuasa pada 5 September 2021 melalui P.U (A) 348 Perintah Kawalan Harga Dan Antipencatutan (Penentuan Harga Maksimum) (No.7) 2021.

Sepanjang tempoh pemeriksaan serta pemantauan ke atas penjualan kit ujian kendiri COVID-19 selepas diwartakan, iaitu bermula 5 sehingga 14 September 2021, sebanyak 1443 premis telah diperiksa membabitkan 74 premis borong dan 1,087 premis runcit dan daripada pemeriksaan tersebut sebanyak 10 amaran dikeluarkan kerana menjual melebihi harga maksimum yang ditetapkan.

Bagi mengekang penjualan kit ujian kendiri palsu di pasaran, KPDNHEP telah mengambil langkah-langkah seperti berikut:

- i. Penguatkuasaan berterusan di seluruh negara sama ada melalui penguatkuasaan bersama dengan pemilik cap dagang (*trade mark owner*), penguatkuasaan secara proaktif atau tindakan penguatkuasaan berdasarkan aduan yang diterima daripada pemilik cap dagang mahupun daripada orang ramai;
- ii. Menjalankan operasi bersepada bersama agensi kerajaan yang berkaitan termasuk Pihak Berkuasa Peranti Perubatan (MDA), Kementerian Kesihatan Malaysia, pihak berkuasa tempatan (PBT) dan Polis Diraja Malaysia;
- iii. Penguatkuasaan secara preventif iaitu melalui taklimat pengecaman ciri-ciri produk tiruan kepada anggota penguatkuasa oleh pemilik cap dagang; dan
- iv. Selain itu juga, laman sesawang, penyedia platform perniagaan dan media sosial berorientasikan perniagaan atas talian seperti Facebook, Instagram, Mudah.my dan lain-lain, turut dipantau berkaitan aktiviti penjualan dan pemasaran barang-barang tiruan termasuk kit ujian kendiri COVID-19.

Sekian, terima kasih.

**MESYUARAT PERTAMA, PENGGAL KEEMPAT
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

DARIPADA : TUAN NOOR AMIN BIN AHMAD [KANGAR]

TARIKH : 28 SEPTEMBER 2021 (SELASA)

SOALAN

minta **MENTERI PEMBANGUNAN LUAR BANDAR** menyatakan berapakah daripada jumlah Paket Rangsangan Kerajaan yang diumumkan diperuntukkan untuk pembangunan luar bandar. Minta perincikan jenis projek-projek yang dilakukan, khususnya untuk negeri Perlis.

JAWAPAN

Tuan Yang di-Pertua,

Untuk makluman Yang Berhormat, sejumlah RM225 juta telah diperuntukkan di bawah Paket Rangsangan Ekonomi (PRE) kepada Kementerian ini melibatkan lima (5) projek iaitu Jalan Perhubungan Desa (JPD), Bekalan Elektik Luar Bandar (BELB), Projek Ameniti Sosial (PAMS), Baik Pulih Premis-premis Kemas dan Baik Pulih Premis-premis Perniagaan MARA.

Bagi negeri Perlis, sejumlah RM5.69 juta telah diperuntukkan dan kesemua projek-projek berkenaan telah berjaya disiapkan. Projek-projek di negeri Perlis yang telah disiapkan ini merangkumi 24 projek Jalan Perhubungan Desa (JPD), 19 projek di bawah Program Ameniti Sosial (PAMS), 70 projek di bawah Projek Perumahan Rakyat Termiskin (PPRT), 21 projek baik pulih premis-premis KEMAS dan 39 projek baik pulih premis-premis perniagaan MARA bagi manfaat masyarakat luar bandar.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN CHE ALIAS BIN HAMID [KEMAMAN]

TARIKH : 28 SEPTEMBER 2021 (SELASA)

SOALAN

TUAN CHE ALIAS BIN HAMID [KEMAMAN] minta **MENTERI KESIHATAN** menyatakan pelan tindakan bagi mengatasi kebimbangan penularan virus COVID-19 kepada kanak-kanak susulan kelonggaran sekatan secara berperingkat oleh pihak Kementerian.

JAWAPAN

Tuan Yang di-Pertua,

1. Pihak Kementerian Kesihatan Malaysia (KKM) memantau secara rapi pelaporan dan peningkatan kes-kes COVID-19 di seluruh Malaysia. Bagi memastikan keseimbangan antara nyawa dan mata pencarian, antara kesihatan awam dan pemulihan ekonomi, Malaysia kini telah beralih ke pelaksanaan Pelan Pemulihan Negara (PPN) secara berfasa bagi mengekang penularan COVID-19 dengan lebih teratur dan selamat.
2. Melalui pelaksanaan PPN, setiap lapisan masyarakat diambil kira dalam aktiviti-aktiviti membendung penularan jangkitan COVID-19 termasuk dalam kalangan kanak-kanak. Kanak-kanak merupakan kumpulan berisiko tinggi dan sekiranya dikesan positif COVID-19, kumpulan ini akan dimasukkan ke hospital atau Pusat Kuarantin dan Rawatan Berisiko Rendah (PKRC) untuk pemantauan serta rawatan selanjutnya. Tambahan pula, aktiviti surveyan dari semasa ke semasa akan dijalankan di institusi jagaan kanak-kanak.
3. Seterusnya dalam hal ini juga, Kerajaan telah memutuskan untuk melaksanakan Program Imunisasi COVID-19 Kebangsaan (PICK) Remaja. Program tersebut telah dimulakan di Sarawak pada 8 September dan Wilayah Persekutuan Labuan pada 11 September memandangkan kedua-dua negeri telah mencapai 80% liputan imunisasi COVID-19 dalam kalangan populasi dewasanya. Bagi tujuan ini, arahan pelaksanaannya telah digariskan melalui Surat Pekeliling Ketua Pengarah Kesihatan Bilangan 13/2021 mengenai Pelaksanaan Program Imunisasi COVID-19 Di Kalangan Remaja Tertentu Berumur 12 Hingga 17 Tahun bertarikh 12 Ogos 2021 dan Surat Pekeliling Ketua Pengarah Kesihatan Bilangan 15/2021 mengenai Pelaksanaan Program Imunisasi COVID-19 Kebangsaan (PICK) Remaja Berumur 12 Hingga 17 Tahun bertarikh 20 September 2021.
4. Pada 20 September 2021, Kick-Off Program Imunisasi COVID-19 Kebangsaan remaja (PICK Remaja) telah dilaksanakan di Sekolah Menengah Kebangsaan Putrajaya Presint 8 (1).

SOALAN NO : 33

5. Pelaksanaan PICK Remaja adalah menggunakan vaksin Comirnaty keluaran Pfizer BioNTech. Sebanyak dua dos (30 microgram setiap dos) perlu diberikan kepada seorang remaja 12 hingga 17 tahun dengan sela masa sekurang-kurangnya 21 hari antara kedua dos tersebut.

6. Kumpulan sasaran PICK Remaja adalah golongan remaja berumur 12 hingga 17 tahun yang bermastautin di Malaysia tanpa mengira status kewarganegaraan. Remaja berumur 12 tahun bermaksud remaja yang mencapai umur 12 tahun mengikut tarikh lahir. Matlamat PICK Remaja adalah seperti berikut:

- (i) Melindungi remaja dari penyakit teruk dan kematian akibat jangkitan COVID-19;
- (ii) Membolehkan sekolah dibuka dan beroperasi dengan selamat;
- (iii) Mengurangkan risiko penularan jangkitan kepada remaja di sekolah yang tidak layak menerima vaksin atas sebab kesihatan;
- (iv) Meningkatkan liputan vaksinasi COVId-19 dalam populasi Malaysia bagi meningkatkan imuniti kelompok.

Sekian, terima kasih.

**MESYUARAT PERTAMA, PENGGAL KEEMPAT
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : DATUK DR. HASAN BIN BAHROM
[TAMPIN]**

TARIKH : 28 SEPTEMBER 2021 (SELASA)

SOALAN

minta **MENTERI PEMBANGUNAN LUAR BANDAR** menyatakan bagaimana Kementerian mengatasi kejatuhan ekonomi masyarakat luar bandar. Apakah terdapat kajian menyeluruh tentang kemerosotan ekonomi mereka kesan daripada pandemik COVID-19.

JAWAPAN

Tuan Yang di-Pertua,

Inisiatif dan langkah yang telah di ambil oleh Kementerian Pembangunan Luar Bandar (KPLB) bagi membantu mengatasi kesan kejatuhan ekonomi masyarakat luar bandar dalam mendepani impak pandemik COVID-19 ialah dengan menyediakan pelbagai bantuan kepada kumpulan bersasar melibatkan kumpulan B40 ke bawah, golongan usahawan, pelajar dan masyarakat Orang Asli. Antara inisiatif yang telah dilaksanakan ialah seperti berikut:

- i. Penyediaan bantuan bantuan bakul makanan khusus kepada Ketua Isi Rumah masyarakat Orang Asli kepada 62,269 isi rumah melibatkan peruntukan sebanyak RM12 juta;
- ii. Kemudahan penjadualan semula bayaran dan moratorium pinjaman pelajaran sehingga Disember 2021;

- iii. Menyediakan inisiatif latihan keusahawanan secara atas talian dengan tumpuan mendaya perniagaan;
- iv. Kemudahan penjadualan semula bayaran balik pinjaman;
- v. Pengecualian sewaan premis perniagaan sehingga Disember 2021 kepada usahawan di luar bandar;
- vi. Pengecualian bayaran sewa tanah;
- vii. Penangguhan bayaran sewa rumah; dan
- viii. Program Vaksinasi Luar Bandar.

Secara keseluruhannya, KPLB telah memperuntukkan sebanyak RM231.6 juta di bawah pelbagai inisiatif sepanjang tempoh pandemik ini bagi membantu mempertukuh ekonomi masyarakat luar bandar melibatkan 833,197 penerima manfaat.

Tuan Yang di-Pertua,

KPLB ada melaksanakan kajian penilaian outcome program-program kementerian bagi melihat kesan pandemik COVID-19 ini terhadap masyarakat luar bandar.

Berdasarkan dapatan kajian penilaian outcome program KPLB, 60.5 peratus peserta B40 dapat meningkatkan pendapatan selepas menerima bantuan pada tahun 2020. Manakala dari segi pekerjaan, pada tahun 2020, kebolehpasaran bagi graduan lepasan institut pengajian MARA ialah sebanyak 90.3 peratus.

KPLB juga telah melaksanakan inisiatif melalui institusi TVET@KPLB bagi membantu belia mendapatkan pekerjaan dalam bidang kemahiran melalui skim penjana kerjaya MARA (pinjaman boleh ubah). Pada tahun 2021, MARA telah diluluskan peruntukan berjumlah RM19.5 juta bagi pelaksanaan program di bawah PENJANA 2021.

Selain inisiatif-inisiatif yang dinyatakan, KPLB juga telah meminda kaedah pelaksanaan beberapa program kementerian sebelum ini bagi

kemudahan masyarakat luar bandar khususnya. Tindakan ini diyakini akan membantu dalam melonjakkan semula ekonomi di luar bandar serta meningkatkan pendapatan masyarakat luar bandar.

Antara pindaan yang dibuat adalah pemberian geran penuh tunai di bawah Skim Pengukuhan Keusahawanan Luar Bandar (SPKLB) berbanding geran padanan 70:30 sebelum ini khusus untuk usahawan di luar bandar. Selain itu, had pembiayaan Skim Pembiayaan Perniagaan Khusus Untuk Wanita (DanaNita) di bawah MARA pula telah dinaikkan kepada RM150,000 berbanding RM50,000 sebelum ini.

Inisiatif dan usaha ini merupakan usaha berterusan KPLB dalam membantu masyarakat luar bandar yang terjejas berikutan pandemik yang sedang melanda ini seterusnya meningkatkan semula ekonomi mereka.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN

**DARIPADA : DATO' HAJI MOHD FASIAH BIN HAJI MOHD
FAKEH [SABAK BERNAM]**

TARIKH : 28 SEPTEMBER 2021

SOALAN

DATO' HAJI MOHD FASIAH BIN HAJI MOHD FAKEH [SABAK BERNAM] minta **MENTERI SUMBER MANUSIA** menyatakan bilangan pekerja terutamanya pekerja tempatan yang diberhentikan atau *retrenched* semasa pandemik COVID19 dari awal tahun 2021 hingga terkini mengikut sektor dan nyatakan langkah Kerajaan bagi membantu pekerja-pekerja ini untuk mendapatkan pekerjaan semula serta nyatakan langkah Kerajaan bagi membantu golongan pekerja ini untuk menyara kehidupan mereka dan keluarga selepas mereka diberhentikan kerja.

JAWAPAN

Tuan Yang Di Pertua,

Berdasarkan statistik Sistem Insurans Pekerjaan (SIP) bagi tempoh Januari 2021 sehingga 3 September 2021, rekod kes kehilangan pekerjaan bagi pekerja tempatan adalah sebanyak 46,191 kes. Manakala jumlah kehilangan pekerjaan mengikut sektor-sektor ekonomi adalah seperti berikut:

- a. sektor pembuatan 8,387 orang pekerja,
- b. sektor perdagangan borong dan runcit 7,948 orang pekerja,
- c. sektor aktiviti profesional dan teknikal 3,945 orang pekerja
- d. sektor penginapan dan perhotelan 4,022 orang pekerja,
- e. sektor maklumat dan komunikasi 3,890 orang pekerja,

SOALAN NO: 35

- f. sektor pembinaan 3,892 orang pekerja,
- g. sektor aktiviti pentadbiran dan khidmat sokongan 3,356 orang pekerja,
- h. sektor pengangkutan 2,547 orang pekerja,
- i. sektor kewangan 1,491 orang pekerja,
- j. sektor aktiviti perkhidmatan lain 1,486 orang pekerja,
- k. sektor pendidikan 1,417 orang pekerja,
- l. sektor aktiviti hartanah 1,354 orang pekerja,
- m. sektor kesenian, hiburan dan rekreasi 573 orang pekerja,
- n. sektor perlombongan 559 orang pekerja,
- o. sektor aktiviti kesihatan kemanusiaan 460 orang pekerja,
- p. sektor pertanian 375 orang pekerja,
- q. sektor bekalan elektrik 286 orang pekerja,
- r. sektor bekalan air 117 orang pekerja,
- s. sektor pentadbiran awam 55 orang pekerja,
- t. sektor aktiviti badan dan pertubuhan luar wilayah 29 orang pekerja; dan
- u. aktiviti isi rumah sebagai majikan 2 orang pekerja.

Kerajaan sedar dan prihatin bahawa impak pandemik COVID-19 adalah serius menyebabkan ramai pekerja yang kehilangan pekerjaan atau diberhentikan amat terkesan dan memerlukan sokongan serta bantuan. Antara bantuan Kerajaan bagi menangani isu kehilangan pekerjaan adalah dengan menyalurkan bantuan seperti berikut:

- i. Elaun Mencari Pekerjaan (EMP);
- ii. Elaun Bekerja Semula Awal (EBSA);
- i. Elaun Pendapatan Berkurangan (EPB);
- ii. Orang Berinsurans yang menjalani latihan akan mendapat Elaun Latihan;
- iii. Pembiayaan Fi Latihan; dan
- vi. Bantuan pencarian pekerjaan oleh Pegawai Perkhidmatan Pekerjaan PERKESO.

Selain itu, Kerajaan turut mengambil inisiatif untuk membantu pekerja-pekerja ini untuk mendapatkan pekerjaan semula antaranya;

SOALAN NO: 35

- i. Program Penjana Kerjaya 3.0 di bawah PEMULIH yang bermula 15 Julai 2021 hingga 31 Disember 2021 iaitu;
 - a. *Malaysianization* adalah satu program untuk menggalakkan majikan menggantikan pekerja asing dengan pekerja tempatan;
 - b. Inisiatif tempoh kontrak penggajian kepada kategori pekerja berusia 40 tahun ke atas, OKU dan bekas banduan;
 - c. Perluasan insentif pengambilan pekerja di bawah Program KerjayaGig; dan
 - d. Insentif Penempatan Pekerjaan oleh Agensi Pekerjaan Swasta (APS).

- ii. Program SIP Prihatin 2.0

- a. Perluasan Elaun Mencari Pekerjaan (EMP).

Disamping itu, Kementerian Sumber Manusia melalui PERKESO turut mempergiatkan beberapa program bagi mengawal kenaikan paras pengangguran rakyat secara keseluruhan serta menaikkan kualiti hidup rakyat termasuk kepada golongan graduan tanpa kerja dan belia tidak berkemahiran seperti;

- i. Program Karnival Kerjaya atau *Job Carnival*;
- ii. Program Insentif Pengambilan Pekerja (*Hiring Incentive Programme*); dan
- iii. Program latihan (*reskilling* dan *upskilling*) melalui Penyedia Latihan yang dilantik.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB MARIA CHIN ABDULLAH
(PETALING JAYA)**

TARIKH : 28 SEPTEMBER 2021 (SELASA)

SOALAN

PUAN MARIA CHIN ABDULLAH [PETALING JAYA] minta **MENTERI DALAM NEGERI** menyatakan bilakah isteri/ wanita warga Malaysia akan mempunyai hak yang sama seperti lelaki/ suami warga Malaysia Ketika memberikan kewarganegaraan untuk anak-anak mereka yang dilahirkan di luar negara kerana proses birokrasi yang ada mengambil jangka masa yang panjang dan memberi tekanan kepada wanita dan kanak-kanak yang terlibat.

JAWAPAN

Tuan Yang Di-Pertua,

Untuk makluman Ahli Yang Berhormat, kedua-dua lelaki dan wanita warganegara Malaysia mempunyai hak dan peluang sama rata dalam memperolehi kewarganegaraan Malaysia bagi anaknya yang lahir di luar negara selaras dengan Bahagian III Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, kesahteraan anak, dan peraturan imigresen.

Kementerian juga sedang melaksanakan tindakan segera secara berperingkat terhadap semua permohonan kewarganegaraan yang diterima di Kementerian. Setiap permohonan akan diproses dengan teliti bagi memastikan pematuhan syarat-syarat yang ditetapkan dalam Bahagian III Perlembagaan Persekutuan, *Citizenship Rules* 1964 [LN82/1964] serta perundangan berkaitan yang sedang berkuatkuasa.

Kementerian sentiasa berusaha untuk memudahcara setiap permohonan yang dikemukakan selaras dengan perundangan yang sedang berkuat kuasa. Selain daripada itu, Kementerian juga akan mengkaji perkara ini bagi mendapat polisi baharu Kerajaan bagi memudahkan ibu-ibu melahirkan anak mereka di luar negara walaupun berkahwin dengan warganegara asing.

**PEMBERITAHUAN PERTANYAAN BAGI JAWAPAN LISAN
MESYUARAT PERTAMA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

DARIPADA : TUAN CHANG LIH KANG [TANJUNG MALIM]

TARIKH : 28 SEPTEMBER 2021 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan jumlah wang yang dipinjam oleh rakyat dengan syarikat Kredit Komuniti dan Pemberi Pinjam sepanjang tahun 2021.

JAWAPAN

Tuan Yang di-Pertua,

1. Untuk makluman Ahli Yang Berhormat, berdasarkan rekod dari bulan Januari 2021 sehingga Jun 2021, jumlah pinjaman yang telah diberikan kepada peminjam oleh syarikat kredit komuniti (Pemberi Pinjam Wang) yang berlesen di bawah Kementerian Perumahan dan Kerajaan Tempatan (KPKT) adalah dianggarkan berjumlah RM2.2 bilion. Jumlah ini termasuk pinjaman kepada individu dan syarikat. Jumlah bagi pinjaman individu sahaja adalah sebanyak RM700 juta iaitu 32.1% dari jumlah keseluruhan pinjaman.

2. Untuk makluman Ahli Yang Berhormat juga, KPKT kini sedang dalam tindakan untuk mengumpul maklumat pinjaman daripada syarikat kredit komuniti bagi bulan Julai sehingga Disember 2021.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN SIVAKUMAR VARATHARAJU NAIDU
(BATU GAJAH)**

TARIKH : 28 SEPTEMBER 2021 (SELASA)

SOALAN

TUAN SIVAKUMAR VARATHARAJU NAIDU [BATU GAJAH] minta **MENTERI DALAM NEGERI** menyatakan mengapa jumlah keputusan bulanan yang dikeluarkan melalui laman web rasmi Kementerian Dalam Negeri bagi permohonan kewarganegaraan di bawah perkara 15A,15(2) dan 19(1) Perlembagaan Persekutuan amat tidak memuaskan. Apakah tindakan terkini untuk menyelesaikan permohonan yang telah lama tertangguh.

JAWAPAN

Tuan Yang Di-Pertua,

Kementerian telah menambah baik Prosedur Operasi Standard (SOP) bagi permohonan kewarganegaraan di bawah Perkara 15A dengan pelaksanaan tempoh pemprosesan yang lebih singkat bagi permohonan yang lengkap diterima mulai tahun 2020. Manakala, bagi permohonan kewarganegaraan di bawah perkara lain di bawah Perlembagaan Persekutuan, setiap permohonan akan diteliti mengikut giliran yang sewajarnya sebelum keputusan dikeluarkan.

Kementerian juga sedang melaksanakan tindakan segera secara berperingkat terhadap semua permohonan kewarganegaraan yang diterima dan sentiasa berusaha untuk memudahcara permohonan tersebut.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN KESAVAN A/L SUBRAMANIAM
[SUNGAI SIPUT]**

TARIKH : 28 SEPTEMBER 2021 (SELASA)

SOALAN NO.39

TUAN KESAVAN A/L SUBRAMANIAM minta **MENTERI KESIHATAN** menjelaskan kadar kematian seluruh negara dari tahun 2015 hingga 2020 menunjukkan kadar yang konsisten, dari 5.0% di tahun 2015, 5.3% dari tahun 2017 hingga 2020. Untuk suku pertama tahun 2021, kadar kematian (annualised) adalah 5.3%. Maksudnya, walaupun Malaysia di landa wabak COVID-19, ia tidak menunjukkan kenaikan ketara kematian. Kesimpulannya kematian dari COVID-19 adalah bersama penyakit-penyakit lain (co-morbidities) dan bukannya dari COVID-19 semata-mata. Mohon penjelasan.

JAWAPAN

Tuan Yang di-Pertua,

1. Mengikut statistik daripada Jabatan Perangkaan Malaysia, kadar kematian kasar atau *Crude Death Rate* (CDR) dari tahun 2015 sehingga 2020 adalah 5.1 sehingga 5.3 kematian per seribu penduduk di Malaysia. CDR ini termasuklah semua jenis kematian dan sebab utama kematian di Malaysia adalah seperti penyakit jantung iskemik, pneumonia, *cerebrovascular diseases*, kemalangan jalan raya serta kanser trakea, bronkus dan paru-paru.

2. Seperti yang dilaporkan oleh Jabatan Perangkaan Malaysia, untuk suku tahun pertama 2021, CDR adalah 1.3 kematian per seribu penduduk yang mana adalah konsisten bagi setiap suku tahun.
3. Untuk makluman, sehingga 25 Ogos 2021, Malaysia melaporkan sebanyak 14,818 kes kematian COVID-19 iaitu bersamaan dengan 0.92%. Daripada jumlah tersebut, sebanyak 471 kes kematian dilaporkan pada tahun 2020 dan sebanyak 14,347 kes kematian pada tahun 2021. Punca kematian kes COVID-19 ini adalah kerana penyakit COVID-19. Pada tahun 2020, terdapat sebanyak 100 kes yang meninggal dunia kerana penyakit atau punca lain dan COVID-19 bukannya punca kematian kes tersebut. Pada tahun 2021 pula, terdapat 1,955 kes sedemikian.
4. Jika dilihat pada faktor risiko komorbiditi, sehingga 22 Ogos 2021, daripada jumlah kes kematian COVID-19 yang dilaporkan, 81% kes kematian mempunyai sekurang-kurangnya satu (1) komorbiditi atau lebih seperti penyakit darah tinggi, diabetes mellitus, sakit jantung, sakit buah pinggang, obesiti dan lain-lain.
5. Walaupun terdapat kematian yang disebabkan oleh COVID-19, kadar kematian kasar dilihat tidak banyak berbeza mungkin disebabkan sebab kematian lain seperti kemalangan jalan raya yang menurun susulan pelaksanaan Perintah Kawalan Pergerakan di Malaysia semasa pandemik COVID-19. Tindakan agresif kerajaan untuk mengekang penularan penyakit COVID-19 dan secara tidak langsung mencegah kematian. Walau bagaimanapun, punca penurunan dan bilangan kematian di Malaysia masih dalam pengemaskinian Jabatan Perangkaan Malaysia.

Sekian, terima kasih

SOALAN NO : 40

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB DATO' MOHD AZIS BIN JAMMAN
(SEPANGGAR)**

TARIKH : 28 SEPTEMBER 2021 (SELASA)

SOALAN

DATUK MOHD. AZIS BIN JAMMAN [SEPANGGAR] minta **MENTERI DALAM NEGERI** menyatakan jumlah terperinci Pendatang Tanpa Izin yang ditahan dan diusir bagi tempoh 2017 hingga kini mengikut kategori warganegara, pecahan negeri khususnya di Sabah.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Dalam Negeri melalui Jabatan Imigresen Malaysia komited dalam memastikan keselamatan negara diutamakan dengan melaksanakan operasi penguatkuasaan secara berterusan serta tindakan pencegahan bagi mengelakkan berlakunya peningkatan jumlah pendatang asing tanpa izin (PATI) di negara ini.

Bermula 1 Januari sehingga 29 Ogos 2021, Jabatan Imigresen Malaysia Negeri Sabah telah menangkap sebanyak 1,740 orang PATI. Selain itu, Kementerian Dalam Negeri melalui Jabatan Imigresen Malaysia turut melaksanakan pengusiran secara berkala melalui rundingan dengan negara asal PATI tersebut iaitu Kedutaan Negara Filipina dan Indonesia yang mana warganegaranya merupakan majoriti PATI di negeri Sabah. Komitmen Kerajaan untuk mengatasi isu PATI di negeri Sabah ini dapat dilihat melalui jumlah penghantaran pulang yang dilaksanakan dari tahun 2017 hingga 29 Ogos 2021 yang berjumlah 45,555 orang PATI dengan pecahan kewarganegaraan seperti berikut:

Warganegara	2017	2018	2019	2020	2021	Jumlah
Indonesia	3,755	2,355	3,091	2,399	536	12,136
Filipina	8,348	9,818	8,607	4,311	1,178	32,262
Myanmar	0	0	1	0	0	1
Thailand	13	13	2	1	0	29
India	9	5	3	4	0	21
Vietnam	7	53	204	56	0	320
Nepal	1	0	1	0	0	0
Pakistan	76	76	117	59	26	354
China	7	32	91	108	0	238
Kemboja	1	2	0	0	0	3
Lain-lain	22	38	113	18	0	191
JUMLAH	12,239	12,392	12,230	6,956	1,740	45,555

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : DATUK HAJAH AZIZAH BINTI DATUK SERI PANGLIMA HAJI MOHD DUN [BEAUFORT]

TARIKH : 28 SEPTEMBER 2021 (SELASA)

SOALAN

DATUK HAJAH AZIZAH BINTI DATUK SERI PANGLIMA HAJI MOHD DUN minta **MENTERI KESIHATAN** menyatakan adakah Kementerian bercadang untuk memberikan *booster shot* terutamanya kepada golongan yang berisiko tinggi.

JAWAPAN

Tuan Yang di-Pertua,

1. YAB Perdana Menteri telah mengumumkan pada 19 September 2021 bahawa kerajaan telah bersetuju untuk melaksanakan pemberian dos ketiga vaksin COVID-19 bagi meningkatkan perlindungan kepada golongan rentan daripada risiko jangkitan COVID-19. Pemberian dos ketiga vaksin COVID- 19 akan dilaksanakan apabila liputan imunisasi populasi dewasa di seluruh negara melebihi 80%.
2. Keutamaan akan diberikan kepada kumpulan yang berisiko tinggi terlebih dahulu seperti anggota barisan hadapan kesihatan, pesakit kurang daya tahan imun (*immunocompromised*), warga tua dengan komorbiditi dan individu yang tinggal atau bekerja di pusat jagaan jangka panjang (*long-term care facilities*).

3. Untuk makluman, dos tambahan terdiri daripada dua (2) kategori iaitu:

a. **Dos ketiga**: bertujuan untuk meningkatkan tahap imuniti individu berisiko tinggi, yang mana dos kedua tidak mencukupi untuk memberi perlindungan terhadap jangkitan COVID-19.

b. **Dos penggalak atau booster dose**: diberikan kepada semua individu untuk meningkatkan tahap imuniti yang menurun dalam tempoh tertentu selepas dos lengkap.

4. Sehubungan itu, panel pakar perubatan dan kesihatan sedang membangunkan satu Garis Panduan Pemberian Dos Tambahan, dan pada yang sama permohonan untuk mendapatkan kelulusan Pihak Berkuasa Kawalan Dadah sedang dilaksanakan.

5. Pemberian dos tambahan perlu mendapat kelulusan Pihak Berkuasa Kawalan Dadah (PBKD) terlebih dahulu sebelum ia dapat dilaksanakan. Sehingga kini, pihak Pemegang Pendaftaran Produk masih belum mengemukakan sebarang permohonan bagi kelulusan penggunaan dos tambahan kepada Biro Pengawalan Farmaseutikal Kebangsaan (NPRA).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS TAHUN 2021**

PERTANYAAN : JAWAB LISAN

DARIPADA : DR. MOHD HATTA BIN MD. RAMLI [LUMUT]

TARIKH : 28 SEPTEMBER 2021 (SELASA)

SOALAN

DATUK WIRA DR. MOHD HATTA BIN MD. RAMLI [LUMUT] minta **MENTERI SUMBER MANUSIA** menyatakan apakah langkah Kerajaan dalam menangani lambakan ‘fresh grad’ selain program PROTEGE yang sedia ada tidak menjamin jawatan tetap.

JAWAPAN

Tuan Yang Di Pertua,

Kerajaan melalui Talent Corporation Malaysia Berhad (TalentCorp) terus memainkan peranan melalui mandatnya dalam aspek memperkasakan serta menambahbaik ekosistem takungan bakat negara.

TalentCorp progresif bertindak untuk terus menyokong agenda Kerajaan dalam usaha meningkatkan ketersediaan dan kebolehpasaran bakat melalui pemerkasaan elemen kemahiran kendiri, kemahiran dan kompetensi selaras dengan keperluan pasaran pekerjaan semasa. Usaha ini dilaksanakan dengan kerjasama yang erat dan kolektif merentasi kementerian, industri dan pemegang taruh.

Usaha pemerkasaan ekosistem bakat TalentCorp akan terus berfokus kepada pembangunan kebolehpasaran dan kebolehkerjaan bakat muda negara melalui inisiatif:

a. Nurturing EXpert Talent (MYNext):

MYNext adalah platform setempat solusi bakat bersepadu dan data analitis yang menggabungkan graduan, pekerja, syarikat dan institusi pendidikan, dengan fokus utamanya adalah untuk merapatkan jurang di antara penawaran bakat di Malaysia dengan pekerjaan masa hadapan (*future jobs*).

Sepanjang pelaksanaan MYNext bersama pemegang taruh dan institusi, 270 pegawai unit kerjaya/ kaunselor institusi pengajian tinggi awam dan swasta telah dilatih untuk program ini dan sehingga Ogos 2021, lebih 160,000 profil bakat telah mendaftar bersama inisiatif MYNext.

Seterusnya, MYNext turut akan diperkasa dengan elemen peningkatan kemahiran, modul kompetensi industri dan peningkatan skil kendiri dengan kolaborasi strategik bersama e-Latih yang dibangunkan oleh Pembangunan Sumber Manusia Berhad (PSMB).

b. Program Latihan Industri Berstruktur (*Structured Internship Programme - SIP*):

Selaras dengan aspirasi Kerajaan dalam aspek bakat sedia-industri, inisiatif SIP bertindak sebagai penggalak kepada penyertaan dan penglibatan syarikat dan industri untuk melatih bakat muda negara untuk membuka serta menawarkan lebih banyak peluang penempatan latihan industri berkualiti melalui insentif potongan cukai berganda.

Sejak dilaksanakan bermula tahun 2012, SIP telah memanfaatkan lebih 90,000 bakat graduan untuk menyempurnakan Latihan Industri secara lebih berstruktur bersama syarikat dan pemain industri tempatan.

c. Young Employable Students (YES!):

Sebagai langkah intervensi proaktif dengan penerapan elemen pendedahan aspek kebolehpasaran graduan negara melalui kerjasama rakan kolaborasi strategik dalam usaha meningkatkan ketersediaan bakat graduan sebelum melangkah ke pasaran pekerjaan dengan penerapan elemen kepimpinan, bimbingan kerjaya, bengkel *soft-skills* berkaitan kerjaya, keusahawanan dan pendedahan kepada perkembangan semasa pasaran pekerjaan.

#KisahSiswa merupakan satu inisiatif di bawah kerangka Young Employable Students (YES!) yang telah dilaksanakan secara bersama dengan Kementerian Sumber Manusia, Kementerian Pengajian Tinggi, Institusi Pengajian Tinggi Awam/Swasta dan rakan kolaborasi strategik TalentCorp.

Sejak pelaksanaannya bermula pertengahan Mei 2020 hingga September 2020, #KisahSiswa telah berjaya membantu lebih 1,500 bakat muda dengan keterlibatan lebih 100 jurulatih kerjaya secara sukarela.

d. Kolaborasi Industri-Akademia (*Industry-Academia Collaboration - IAC*):

Jalinan kerjasama industri untuk kebolehpasaran siswazah bagi memastikan bekalan modal insan berprestasi tinggi dan sedia untuk pasaran di Malaysia.

Sehingga Jun 2021, 20 institusi pengajian tinggi dengan keterlibatan lebih 50 industri dari pelbagai sektor ekonomi antaranya elektrik & elektrikal, Global Business Services (GBS), Industri Kesihatan, Keretapi dan Minyak & Gas.

e. Scholarship Talent Attraction & Retention (STAR):

TalentCorp turut berkolaborasi bersama Jabatan Perkhidmatan Awam (JPA) menerajui inisiatif Scholarship Talent Attraction & Retention (STAR) yang berperanan untuk memudahcara transisi graduan tajaan Kerajaan yang tidak berpeluang mendapat penempatan pekerjaan di sektor awam untuk menyempurnakan ikatan perjanjian biasiswa bersama syarikat dan pemain industri terkemuka Malaysia.

Sehingga Ogos 2021, lebih 7,000 graduan JPA telah diluluskan di bawah program STAR dan JPA untuk berkhidmat bersama syarikat berdaftar STAR dengan kerjasama lebih 3,000 majikan berdaftar dan terlibat memantau pelaksanaan inisiatif ini bagi pihak TalentCorp dan JPA.

Bagi pelaksanaan gerak kerja suku keempat 2021, TalentCorp akan berkolaborasi bersama Perbadanan Tabung Pendidikan Kemahiran (PTPK) untuk membantu 2,000 bakat dan tenaga kerja separa mahir di bawah program intervensi *Industry-Driven Career Acceleration Programme* (ID-TAP) dalam elemen peningkatan kompetensi dan kemahiran berteraskan permintaan industri melalui kerjasama strategik Pusat Pembangunan Kemahiran Negeri (PPKN).

TalentCorp juga telah diluluskan oleh Kementerian Pengajian Tinggi (KPT) untuk memudahcara 105 bakat graduan di bawah program intervensi kebolehpasaran graduan Grad2Work, sebuah intervensi yang dibangunkan untuk melatih bakat dengan jaminan kerja dengan gaji permulaan setara kelayakan dalam bidang digital, teknologi maklumat dan industri 4.0.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : DATUK WILSON UGAK ANAK KUMBONG [HULU RAJANG]

TARIKH : 28 SEPTEMBER 2021 (SELASA)

SOALAN

DATUK WILSON UGAK ANAK KUMBONG minta **MENTERI KESIHATAN** menyatakan rancangan Kementerian untuk menaik taraf Klinik Kesihatan Sg. Asap dan Klinik Kesihatan Tubau, menyediakan tempat kuarantin di semua klinik-klinik Kerajaan, menyediakan makmal ujian PCR di semua klinik- klinik Kerajaan dan menambah bilangan Pegawai Epidemiologi di Sarawak .

JAWAPAN

Tuan Yang di-Pertua,

1. Kementerian Kesihatan Malaysia (KKM) tidak mempunyai perancangan untuk mewujudkan pusat kuarantin di Klinik-Klinik Kesihatan termasuklah di Klinik Kesihatan Sg. Asap dan Klinik Kesihatan Tubau kerana fungsi Klinik Kesihatan adalah sebagai tempat untuk memberikan rawatan pesakit luar kepada masyarakat setempat.
2. Berhubung penyediaan makmal ujian PCR di Klinik-Klinik Kesihatan KKM, terdapat sebanyak 341 buah Klinik Kesihatan KKM di seluruh negara yang menjalankan ujian COVID-19 menggunakan RTK Antigen, termasuklah 34 buah klinik kesihatan di Sarawak.
3. Ujian saringan COVID-19 di fasiliti kesihatan primer dapat dijalankan dengan RTK Ag menggunakan sampel *nasopharyngeal swab*

SOALAN NO : 43

(NPS) atau *oropharyngeal swab* (OPS) atau air liur manakala keperluan ujian pengesahan ditampung oleh pusat saringan sekunder di hospital dan Makmal Kesihatan Awam. Bagi fasiliti yang jauh dikawasan pendalamaman, pengesahan COVID-19 juga boleh dibuat menggunakan alat *Point of Care Testing* seperti Genexpert yang menawarkan ujian RT-PCR COVID-19.

4. Pada masa ini terdapat 25 perjawatan Pakar Perubatan Kesihatan Awam di negeri Sarawak yang memberikan perkhidmatan epidemiologi. Walau bagaimanapun, KKM telah menempatkan seramai 27 orang Pakar Perubatan Kesihatan Awam. Selain dari itu, terdapat tambahan 8 orang Pakar Perubatan Kesihatan Awam yang mengisi jawatan strategik di hospital dan Jabatan Kesihatan Negeri Sarawak.
5. KKM juga merancang untuk menempatkan tambahan empat (4) Pegawai Perubatan pra-warta yang kini sedang menjalani tempoh prawarta di negeri Sarawak dan bakal layak menjadi Pakar Perubatan Kesihatan Awam pada Januari 2022.
6. Di samping itu Universiti Malaysia Sarawak turut menghasilkan keluaran graduan Pakar Perubatan Kesihatan Awam di kalangan anak Sarawak. Diunjurkan seramai 10 orang setiap tahun berpeluang untuk berkhidmat di Sarawak di masa akan datang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

DARIPADA : TUAN LIM LIP ENG [KEPONG]

TARIKH : 28 SEPTEMBER 2021[SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan bilangan syarikat peminjam wang berlesen dan proses-proses yang perlu syarikat tersebut lalui sebelum lesen diluluskan memandangkan terdapat banyak ceti-ceti haram dan syarikat ‘ah long’ berjaya merubah status dari peminjam wang tanpa lesen ke peminjam wang berlesen.

JAWAPAN

Tuan Yang di-Pertua,

1. Untuk makluman Ahli Yang Berhormat, sehingga bulan Ogos 2021 terdapat sebanyak 4,816 syarikat Pemberi Pinjam Wang (PPW) atau lebih dikenali sebagai Kredit Komuniti (KK) yang dilesenkan di bawah Kementerian Perumahan dan Kerajaan Tempatan (KPKT). Selaras dengan visi dan misi Kementerian melalui Bahagian Kawalan Kredit Komuniti, KP KT komited dalam memastikan hanya pemberi kredit yang layak sahaja dilesenkan supaya hak peminjam sentiasa terjamin.
2. Sehubungan itu, semua pemohon lesen PPW wajib memenuhi syarat ataupun kriteria seperti berikut:

- (i) Merupakan Syarikat Sendirian Berhad / Berhad;
- (ii) Lulus tapisan Polis DiRaja Malaysia (PDRM);
- (iii) Tidak diisyiharkan bankrap;
- (iv) Bebas daripada aktiviti pengubahan wang haram dan pembiayaan keganasan (AMLA); dan
- (v) Mempunyai keupayaan kewangan yang kukuh (modal berbayar minimum RM2.0 juta).

3. Bagi mengawal dan mengekang sebarang aktiviti yang melanggar peraturan di bawah Akta Pemberi Pinjam Wang 1951 [Akta 400], seramai 36 perjawatan anggota kader PDRM ditempatkan di KPKT bagi menjalankan fungsi siasatan dan pemantauan serta membuat pertuduhan dan mengkompaun premis PPW.

4. Bagi kes-kes di mana terdapat Ah Long yang menyamar sebagai PPW berlesen, KPKT telah mengambil langkah bekerjasama dengan pihak PDRM bagi membanteras kegiatan yang tidak bertanggungjawab ini. Melalui Memorandum Persefahaman (MoU) yang ditandatangani pada tahun 2006, sebarang kes yang melibatkan PPW tidak berlesen atau Ah Long akan ditangani oleh pihak PDRM mulai tahun 2007, manakala bagi kes-kes jenayah atau keingkaran yang melibatkan syarikat PPW berlesen akan ditangani oleh KPKT.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN CHARLES ANTHONY SANTIAGO
[KLANG]**

TARIKH : 28 SEPTEMBER 2021 (SELASA)

SOALAN

TUAN CHARLES ANTHONY SANTIAGO [KLANG] minta **MENTERI KESIHATAN** menyatakan tempoh vaksin akan sampai ke negara kita seperti yang dijanjikan oleh pembekal secara terperinci berdasarkan jenama vaksin dan jumlah kumulatif setakat ini. Mengapa pihak swasta dibenarkan menjual vaksin walaupun negara kekurangan vaksin untuk rakyat.

JAWAPAN

Tuan Yang di-Pertua,

1. Kementerian Kesihatan Malaysia (KKM) bersama-sama dengan Kementerian Sains Teknologi dan Inovasi (MOSTI) telah mewujudkan Program Imunisasi COVID-19 Kebangsaan (PICK) untuk melaksanakan vaksinasi ke atas penduduk di Malaysia bagi melandaikan lekuk COVID-19. Program PICK telah dilaksanakan melalui perolehan beberapa jenis vaksin seperti Pfizer, AstraZeneca dan Sinovac serta CanSino. Dalam hal ini, program PICK ini adalah percuma kepada semua penduduk di Malaysia.
2. Untuk makluman Ahli Yang Berhormat, Kerajaan telah melaksanakan perancangan awal untuk membolehkan perolehan vaksin yang mencukupi untuk program PICK. Pembekalan vaksin ke Pusat Pemberian Vaksin atau fasiliti-fasiliti kesihatan awam akan dilaksanakan secara berperingkat-peringkat, bergantung kepada bekalan vaksin yang diterima daripada pengilang vaksin.
3. Sehingga 23 September 2021, ingin saya maklumkan bahawa sebanyak 48,989,670 dos vaksin telah pun diterima oleh Kerajaan Malaysia. Seterusnya dijangkakan kita akan menerima baki vaksin berjumlah 38,909,630 dos secara berperingkat.
4. Pada masa yang sama, suka saya maklumkan bahawa Kerajaan Malaysia juga telah menerima sumbangan vaksin dari pelbagai negara yang sebanyak 2,913,750 dos. Negara-negara yang telah memberikan sumbangan vaksin ini adalah Jepun, United Kingdom, Amerika Syarikat dan China.

Tuan Yang di-Pertua,

5. KKM telah menandatangani perjanjian dengan syarikat Pharmaniaga Life Science Sdn. Bhd. (Pharmaniaga) untuk pembekalan vaksin COVID-19. Dalam hal ini, Kerajaan tidak menghalang syarikat Pharmaniaga untuk memeterai perjanjian (*enter into agreement*) dengan pihak-pihak lain selepas obligasi syarikat tersebut dengan Kerajaan

telah selesai.

6. Untuk makluman Ahli Yang Berhormat juga, Kerajaan telah mewujudkan satu garis panduan berhubung prosedur pembelian vaksin COVID-19 oleh Kerajaan Negeri dan swasta. Garis panduan ini diwujudkan selaras dengan keputusan Mesyuarat Jawatankuasa Khas Jaminan Akses Vaksin COVID-19 (JKJAV) Bil.11/2021 yang antara lain bersetuju supaya Kerajaan Negeri dan syarikat swasta dibenarkan untuk melaksanakan perolehan vaksin COVID-19, tertakluk kepada syarat-syarat yang ditetapkan. Keputusan ini mengambil kira keperluan untuk membantu mempercepatkan proses vaksinasi untuk mengekang penularan pandemik COVID-19 terutama di negeri dan kawasan yang mempunyai kes yang sangat tinggi seperti di Lembah Klang.

7. Antara syarat yang ditetapkan adalah seperti :

- i. pihak Kerajaan Negeri dan swasta perlu melaksanakan vaksinasi ke atas individu yang telah dikenal pasti terlebih dahulu dan tidak boleh menjual atau membekalkan vaksin COVID-19 yang dibeli kepada pihak lain; dan
- ii. pihak Kerajaan Negeri dan swasta yang ingin membeli vaksin COVID-19 perlu mengemukakan permohonan pembelian kepada *Product Registration Holder* (PRH) vaksin yang berkaitan. PRH kemudiannya akan mengemukakan permohonan pembelian vaksin bersama dengan pengesahan kuantiti vaksin kepada Kementerian Kesihatan Malaysia untuk kelulusan.

8. Penjualan vaksin COVID-19 perlu dipantau bagi memastikan *traceability* stok dan maklumat vaksin dalam sistem. Dalam hal ini, pihak Kerajaan Negeri dan swasta perlu memastikan data penerima vaksin yang menerima vaksin perlu diintegrasikan dengan sistem MySejahtera untuk membolehkan Kerajaan membuat pemantauan menyeluruh ke atas program vaksinasi di Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN ABDUL LATIFF BIN ABDUL
RAHMAN
(KUALA KRAI)**

TARIKH : 28 SEPTEMBER 2021 (SELASA)

SOALAN

Minta **MENTERI BELIA DAN SUKAN** menyatakan apakah status terkini perkembangan kompleks sukan yang akan dibina di Kuala Krai.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Belia dan Sukan (KBS) pada masa ini tiada perancangan untuk membina sebuah pusat kemudahan sukan di daerah Kuala Krai, Kelantan yang baharu. Walau bagaimanapun, Kementerian bersedia untuk mempertimbangkan permohonan ini sekiranya terdapat keperluan untuk pembinaan kemudahan sukan di Kuala Krai, Kelantan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB PUAN KASTHURIRAANI A/P PATTO
(BATU KAWAN)**

TARIKH : 28 SEPTEMBER 2021 (SELASA)

SOALAN

PUAN KASTHURIRAANI A/P PATTO [BATU KAWAN] minta **MENTERI DALAM NEGERI menyatakan :-**

(a) bilangan kematian dalam lokap polis, Pusat Tahanan Imigresen dan penjara pada tahun 2020 dan 2021 mengikut pecahan etnik dan negeri; dan

(b) status pembentangan RUU Koroner berhubung kematian dalam tahanan dan status pemasangan kamera litar tutup atau CCTV dalam semua lokap balai polis dengan peruntukan yang telah diluluskan dalam Belanjawan 2020 melalui kelulusan khas Pusat Governans, Integriti dan Anti-Rasuah Nasional (GIACC).

JAWAPAN

Tuan Yang Di Pertua,

Statistik terkini kematian orang tahanan yang dilaporkan dalam lokap Polis Diraja Malaysia (PDRM), bermula dari **1 Januari 2020 hingga 31 Disember 2020** adalah seramai **13 orang**. Daripada jumlah tersebut, tujuh (7) kematian melibatkan lelaki Melayu iaitu tiga (3) di Kedah, dan masing-masing satu (1) di Kuala Lumpur, Pahang, Kelantan dan Sarawak. Manakala empat (4) kematian melibatkan lelaki Cina iaitu dua (2) di Johor dan satu (1) masing-masing di Kuala Lumpur dan Sarawak. Kematian melibatkan seorang (1) lelaki India dilaporkan di Perak manakala satu (1) kematian melibatkan warganegara asing dilaporkan di Kuala Lumpur.

Sehingga Ogos bulan 2021, jumlah kematian orang tahanan yang dilaporkan dalam lokap PDRM adalah seramai **enam (6) orang**. Daripada jumlah ini, dua (2) kematian melibatkan lelaki Melayu iaitu masing-masing satu (1) di Perak dan Johor. Manakala dua (2) kematian melibatkan lelaki Cina iaitu masing-masing satu (1) di Pulau Pinang dan Kuala Lumpur. Kematian melibatkan seorang (1) lelaki India dilaporkan di Melaka manakala satu (1) kematian melibatkan warganegara asing dilaporkan di Sabah.

Berdasarkan rekod Jabatan Penjara Malaysia, bagi **tahun 2020** terdapat sebanyak **13 kematian** melibatkan banduan manakala sebanyak **lapan (8) kematian** direkodkan **bagi tahun 2021**.

Daripada jumlah kematian tersebut, seramai 19 orang banduan adalah warganegara Malaysia yang terdiri daripada 16 orang banduan Melayu manakala tiga (3) adalah banduan India. Terdapat dua (2) orang banduan warga asing dari negara Filipina dan Nepal. Semua banduan tersebut adalah banduan lelaki.

Bagi pecahan mengikut umur pula, rekod Jabatan Penjara menunjukkan terdapat seorang (1) banduan berumur 25 tahun manakala seramai enam (6) orang berada di dalam kategori umur diantara 31 tahun ke 40 tahun, dan lima (5) orang pula adalah berumur diantara 41 tahun ke 50 tahun. Bagi

banduan yang berumur diantara 51 tahun ke 60 tahun, terdapat seramai enam (6) orang dan tiga (3) orang merupakan banduan berumur 60 tahun ke atas.

Bagi tahun 2020 dan 2021, sebanyak 13 kematian berlaku di negeri Johor dan tiga (3) di negeri Melaka. Terdapat sebanyak satu (1) kematian masing-masing di negeri Kedah, Perak, Selangor, Pahang dan Sabah.

Berdasarkan rekod oleh Jabatan Imigresen Malaysia, jumlah kematian tahanan di Depot Imigresen pada **tahun 2020** adalah seramai **37 orang** dengan jumlah kematian tertinggi di kalangan warganegara Indonesia iaitu 16 orang serta India dan Myanmar dengan jumlah masing-masing lima (5) orang. Warganegara Bangladesh dan Pakistan masing-masing mencatatkan tiga (3) kematian, warganegara Kemboja mencatatkan dua (2) kematian manakala warganegara Kanada, Nigeria dan Vietnam masing-masing mencatatkan satu (1) kematian.

Manakala jumlah kematian tahanan di Depot Imigresen dari **1 Januari sehingga 23 Ogos 2021** adalah seramai **28 orang**. Daripada jumlah tersebut, warganegara Filipina mencatatkan jumlah kematian tertinggi iaitu 20 orang diikuti oleh warganegara India dan Vietnam dengan jumlah masing-masing dua (2) orang. Manakala warganegara Botswana, Indonesia, Iran dan Myanmar masing-masing mencatatkan satu (1) kematian.

Tuan Yang Di Pertua,

Bagi mempertingkatkan integriti agensi penguatkuasaan, melalui Belanjawan 2020, Kerajaan Malaysia telah meluluskan peruntukan RM 50,000,000.00 bagi menambah baik prosedur dan kemudahan tahanan, khususnya perolehan pemasangan kamera litar tutup (CCTV) di pusat tahanan polis dan pintu masuk/keluar imigresen, masing-masing di bawah kawalan Polis Diraja Malaysia (PDRM) dan Jabatan Imigresen Malaysia (JIM). Berdasarkan kelulusan, proses perolehan tersebut perlu diselia oleh Pusat Governans, Integriti dan Antirasuah Nasional (GIACC). Memandangkan peruntukan bagi PDRM dan JIM di kawal oleh Kementerian

SOALAN NO : 47

Dalam Negeri (KDN), proses perolehan tender dan perinciannya telah dilaksanakan sendiri oleh KDN.

Berkenaan dengan status pemasangan kamera litar tutup atau CCTV dalam semua lokap balai polis, PDRM sedang melaksanakan pemasangan CCTV di lokap-lokap yang dipecahkan kepada 5 zon (Utara, Selatan, Timur, Sabah, Sarawak) bermula 15 April 2021. Kemajuan keseluruhan setakat ini telah mencapai 40 peratus. Projek pemasangan CCTV Lokap PDRM dijangka akan selesai pada akhir tahun ini. Berhubung dengan status pembentangan RUU Koroner, perkara adalah di bawah bidang kuasa Jabatan Perdana Menteri.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT, PARLIMEN
KEEMPAT BELAS TAHUN 2021**

PERTANYAAN : LISAN

**DARIPADA : TUAN CHANG LIH KANG
[TANJONG MALIM]**

TARIKH : 28 SEPTEMBER 2021 [SELASA]

SOALAN

minta **MENTERI PERUMAHAN DAN KERAJAAN TEMPATAN**
menyatakan status penggubalan Akta Sewaan Kediaman.

JAWAPAN

Tuan Yang di-Pertua,

1. Untuk makluman Ahli Yang Berhormat, kajian dan penggubalan Akta Sewaan Kediaman/ *Residential Tenancy Act* (RTA) telah bermula pada Jun 2019, selepas diluluskan menerusi Bajet 2019. Rang Undang-Undang (RUU) ini antara lain bertujuan untuk melindungi hak penyewa dan pemilik kediaman.
2. Buat masa kini, perjanjian penyewaan kediaman disediakan menggunakan tatacara Akta Kontrak 1950. Dokumen tersebut bersifat umum dan tidak melindungi sepenuhnya kepentingan serta hak penyewa dan tuan rumah. Cadangan penggubalan RUU RTA telah pun dibentangkan dan diluluskan dalam Mesyuarat Jemaah Menteri pada 23 Jun 2021.
3. Status terkini, KPKT sedang menyemak draf awal RUU RTA sebelum dihantar kepada Jabatan Peguam Negara (AGC) untuk kelulusan. Seterusnya, RUU Akta Sewaan Kediaman ini dijangka akan dibentangkan di Parlimen pada sesi persidangan pertama tahun 2022.
4. Untuk makluman Ahli Yang Berhormat juga, KPKT melalui Jabatan Perumahan Negara (JPN) telah mengkaji undang-undang berkaitan dari Jerman, United Kingdom dan Australia serta *Rental Housing Act* dari Afrika Selatan. Rang Undang-Undang Akta Sewaan Kediaman yang dicadangkan ini adalah berdasarkan model *Residential Tenancies Act 2010* (New South Wales) Australia kerana akta ini mempunyai undang-undang pembangunan perumahan dan sewaan kediaman yang lengkap serta mampu melindungi kepentingan pemilik kediaman dan penyewa.

Sekian, terima kasih.

**MESYUARAT PERTAMA, PENGGAL KEEMPAT
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

DARIPADA : TUAN BARU BIAN [SELANGAU]

TARIKH : 28 SEPTEMBER 2021 (SELASA)

SOALAN

minta **MENTERI PEMBANGUNAN LUAR BANDAR** menyatakan masih banyak rumah panjang di Sarawak yang belum mendapat bekalan air bersih. Adakah Kementerian mempunyai perancangan untuk membekal air bersih kepada penduduk luar bandar di Sarawak terutamanya di kawasan Parlimen Selangau. Jika ada, bila ianya dilaksanakan.

JAWAPAN

Tuan Yang di-Pertua,

Untuk makluman Yang Berhormat, Kerajaan melalui Kementerian Pembangunan Luar Bandar telah memperuntukkan sebanyak RM2.4 bilion di bawah Rancangan Malaysia Ke-11 bagi pelaksanaan projek Bekalan Air Luar Bandar di Negeri Sarawak. Sepanjang tempoh RMKe-11 dianggarkan sebanyak 10,625 buah rumah telah menerima bekalan air bersih.

Bagi tempoh RMKe-12 tahun 2021, terdapat dua (2) projek sambungan yang telah diluluskan oleh Unit Perancang Ekonomi, Jabatan Perdana Menteri (EPU, JPM) di Parlimen Selangau iaitu Projek Menaiktaraf Loji Air Sekuau dan Projek Bekalan Air Luar Bandar Wilayah Sangan, Bintulu, Sarawak yang apabila siap nanti akan memberi manfaat kepada 15,900 penduduk di kawasan tersebut.

Untuk makluman Yang Berhormat juga, Kementerian sentiasa komited dalam memastikan masyarakat luar bandar sejahtera dalam pelbagai aspek kehidupan meliputi sosial, ekonomi, budaya dan persekitaran melalui Dasar Pembangunan Luar Bandar (2019-2030). Aspirasi Teras Keempat melibatkan usaha melengkapkan liputan prasarana asas yang lengkap di luar bandar. Prasarana yang lengkap dan berkualiti akan menyokong pembangunan ekonomi serta mewujudkan persekitaran kehidupan yang menarik dan kondusif.

Secara dasarnya, bagi kawasan yang belum mendapat liputan bekalan air bersih dan terawat, Yang Berhormat dipohon supaya mengemukakan kepada Unit Perancang Ekonomi Negeri (UPEN) Sarawak untuk disenaraikan di dalam senarai keutamaan negeri dan seterusnya dipanjangkan kepada Kementerian bagi pertimbangan selanjutnya.

**PEMBERITAHUAN PERTANYAAN JAWAB LISAN
DEWAN RAKYAT, MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

DARIPADA : YB TUAN BARU BIAN [SELANGAU]

TARIKH : 28 SEPTEMBER 2021

SOALAN

TUAN BARU BIAN [SELANGAU] minta **MENTERI DALAM NEGERI** menyatakan penyalahgunaan dadah di Sarawak berleluasa dan menimbulkan pelbagai masalah sosial. Kita bimbang kegiatan ini akan merebak ke kawasan pedalaman dan akan merosakkan generasi muda kita. Apakah perancangan Kerajaan dalam menangani isu ini.

JAWAPAN

Tuan Yang Di Pertua,

Dalam menangani isu-isu dadah di Sarawak, Kementerian Dalam Negeri (KDN) melalui Agensi Antidadah Kebangsaan (AADK) sentiasa komited menjalankan pelbagai program pencegahan, rawatan dan pemulihan dan penguatkuasaan termasuk di kawasan pedalaman negeri Sarawak.

Program-program **pencegahan** yang dilaksanakan adalah merangkumi semua peringkat komuniti antaranya program *Family On Alert* (FOA), Tempat Kerja Bebas Dadah (TEKAD) di jabatan-jabatan kerajaan dan syarikat swasta, program Intelek Asuhan Rohani (PINTAR) di sekolah-sekolah rendah, program Sayangi Hidup Elak Derita Selamanya (SHIELDS) di sekolah-sekolah menengah, program *Tomorrow Leader's* di Institusi Pengajian Tinggi Awam/ Swasta (IPTA/IPTS), program Sukses, Matang, Aktif, Rasional, Tanggungjawab (SMART) untuk para belia, program di

tempat ibadah seperti di masjid dan gereja, program *Community Empowerment*, pameran serta ceramah. **Dari Januari 2020 sehingga Julai 2021, sebanyak 194 program pencegahan telah dilaksanakan dengan penglibatan 11,810 peserta dari pelbagai daerah di Sarawak.**

Dalam aspek perkhidmatan **rawatan dan pemulihan**, individu yang terlibat dalam gejala penagihan dadah akan menjalani proses rawatan dan kepulihan dalam institusi atau dalam komuniti. Sehingga Julai 2021, jumlah terkini **klien yang sedang menjalani rawatan dan pemulihan di Pusat Pemulihan Penagihan Narkotik (PUSPEN) Kuching adalah seramai 114 orang manakala jumlah semasa klien pengawasan dalam komuniti seluruh Sarawak dari Ogos 2019 sehingga Ogos 2021 pula adalah seramai 1,801 orang**. Antara sembilan (9) komponen rawatan dan pemulihan yang ditekankan untuk kepulihan klien adalah (i) rawatan perubatan dan kesihatan, (ii) psikospiritual, (iii) bimbingan dan kaunseling, (iv) sokongan sosial, (v) psikopendidikan, (vi) intervensi khas, (vii) latihan kemahiran dan vokasional, (viii) sukan dan rekreasi dan (ix) *Recovery Coach*. Pelaksanaan modul-modul ini dapat membantu klien-klien untuk mencapai kepulihan sepanjang hayat, membina jati diri yang kuat, memberikan semangat baru dan mengelakkan mereka daripada terlibat semula dalam penagihan dadah atau *relapse*.

AADK juga telah mengenal pasti tujuh (7) kawasan berisiko tinggi (KBT) di Sarawak iaitu di Kampung Tabuan Melayu, Matang, Kampung Haji Baki, Kampung Tanjung Bundong, Kampung Baru, Bekenu dan Batu Niah. Dalam aspek **penguatkuasaan dan keselamatan**, AADK komited membersihkan dan menghijaukan KBT di mana **bermula Januari 2020 sehingga Julai 2021, sebanyak 846 operasi telah dilaksanakan dan jumlah saringan positif hasil pemeriksaan ujian air kencing adalah seramai 1,784 orang**. Mereka yang didapati positif sebagai penagih dadah akan diperintahkan oleh mahkamah untuk menjalani rawatan dan pemulihan dalam institusi atau komuniti sebelum diintegrasikan semula ke dalam komuniti setelah tamat menjalani program rawatan dan pemulihan tersebut.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATUK IGNATIUS DARELL LEIKING
[PENAMPANG]**

TARIKH : 28 SEPTEMBER 2021 (SELASA)

SOALAN

DATUK IGNATIUS DARELL LEIKING minta **MENTERI KESIHATAN** menyatakan status pembinaan Klinik Kelas 3 di daerah Penampang yang sepatutnya sudah bermula pembinaan di pertengahan tahun 2021 seperti yang dilaporkan pada sesi Parlimen pada bulan Disember 2020.

JAWAPAN

Tuan Yang di-Pertua,

1. Untuk makluman Ahli Yang Berhormat, Projek Klinik Kesihatan (Jenis 3), Penampang, Kota Kinabalu telah dimohon kepada UPE, JPM semasa RMKe-11 pada 17 dan 18 April 2019 untuk dilaksanakan di bawah Rolling Plan (RP) 4 Tahun 2020.
2. Dalam masa yang sama, brif projek (*Medical Brief of Requirement*) ini mengalami perubahan skop pada pertengahan tahun 2021 iaitu keperluan ruang *Infectious Disease* (ID). Ini berikutan pandemik COVID-19 yang semakin meningkat dan berleluasa, maka semua fasiliti kesihatan yang akan dibina perlu terlebih dahulu dilengkapkan dengan keperluan komponen-komponen rawatan penyakit berjangkit seperti *infectious disease* (ID) *Teleprimary Care – Oral Health Clinical Information System* (TPC-OHCIS) dan CCTV dapat disenaraikan dalam skop projek supaya sebuah fasiliti kesihatan yang komprehensif disediakan bagi menangani pandemik ini.
3. Buat masa ini, pindaan rekabentuk, penyediaan *preliminaries detailed abstract* (PDA) serta pindaan *site plan* bagi Klinik Kesihatan (Jenis 3), Penampang sedang dilaksanakan oleh Jabatan Kerja Raya Malaysia (JKRM). Proses tender akan dilaksanakan sebaik penambahbaikan rekabentuk kesemua jenis klinik kesihatan selesai dalam masa terdekat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN SYED IBRAHIM BIN SYED NOH
[LEDANG]**

TARIKH : 28 SEPTEMBER 2021 (SELASA)

SOALAN

TUAN SYED IBRAHIM BIN SYED NOH minta **MENTERI KESIHATAN** menyatakan pendekatan dan dasar yang diambil oleh Kementerian bagi mengawal penularan varian-varian baru wabak COVID-19 selain bergantung kepada kaedah pemberian vaksin.

JAWAPAN

Tuan Yang di-Pertua,

1. Pendekatan dan dasar yang diambil oleh Kementerian Kesihatan Malaysia (KKM) bagi mengawal penularan varian-varian baharu wabak COVID-19 adalah dengan meningkatkan kawalan kemasukan pengembara di Pintu Masuk Antarabangsa (PMA). Semua pengembara dari luar negara diwajibkan menjalankan ujian pengesanan COVID-19 tiga (3) hari sebelum bertolak ke Malaysia dan hanya mereka dengan keputusan negatif sahaja yang dibenarkan masuk ke Malaysia. Setibanya di Malaysia, mereka perlu menjalani ujian pengesanan COVID-19 menggunakan RT PCR sekali lagi dan diarahkan kuarantine wajib. Selain itu, Kerajaan membuat sekatan kemasukan warganegara dari negara-negara tertentu yang mempunyai penularan jangkitan yang tinggi. Contohnya pada 12 September 2020, Kerajaan telah menyekat kemasukan pengembara dari 23 buah negara.

SOALAN NO : 52

2. Pada 1 Mei 2021, Kerajaan menyekat kemasukan pengembara dari lima (5) buah negara (India, Pakistan, Nepal, Bangladesh dan Sri Lanka) yang dilaporkan mengalami penularan jangkitan *variant of concern* (VOC), varian Delta (B.1.617.2). Berikutan itu, tempoh kuarantin wajib ke atas pengembara dari lima (5) negara ini telah dilanjutkan kepada 21 hari pada 4 Jun 2021. Manakala pengembara dari negara lain telah dilanjutkan tempoh kuarantin daripada 10 hari kepada 14 hari.

Tuan Yang di-Pertua,

3. KKM juga meningkatkan aktiviti pemantauan atau surveyan genomik virus SARS-CoV-2 bagi mengenalpasti varian baharu. Sampel daripada kes positif COVID-19 dalam kluster diambil secara rawak untuk dibuat jujukan genom. Maklumat tersebut digunakan bagi meningkatkan tindakan kawalan dan pencegahan dapat dilakukan dengan segera. Walau bagaimanapun, tindakan kawalan awal dilakukan berdasarkan hasil siasatan dan analisa epidemiologi berkaitan kluster tersebut. Salah satu tindakan yang dijalankan adalah pengasingan kes dan perintah kawalan pergerakan komuniti terlibat bagi memastikan risiko penularan jangkitan dikurangkan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : DATUK SERI DR. HAJI DZULKEFLY BIN AHMAD [KUALA SELANGOR]

TARIKH : 28 SEPTEMBER 2021 (SELASA)

SOALAN

DATUK SERI DR. HAJI DZULKEFLY BIN AHMAD minta **MENTERI KESIHATAN** menyatakan kenapa angka mingguan/harian peratus positif setiap negeri tidak lagi diwar-warkan sepetimana yang berlaku dahulu.

JAWAPAN

Tuan Yang di-Pertua,

1. Kementerian Kesihatan Malaysia (KKM) telah menyediakan data rasmi mengenai pandemik COVID-19 kepada umum melalui GitHub yang boleh diakses di <https://github.com/MoH-Malaysia/covid19-public>. Pada masa ini, hanya data sekunder atau *aggregated* data sahaja yang dikongsikan dengan orang ramai. Semua maklumat termasuk jumlah kes terkini dalam negara dan negeri, kadar penggunaan katil bagi rawatan kes COVID-19 di PKRC, wad dan di unit rawatan rapi (ICU), data kematian serta jumlah ujian pengesahan COVID-19 harian; dimuat naik dan disusun dalam *folder* untuk memudahkan rujukan. Maklumat ini dikemaskini setiap hari agar ia dapat dimanfaatkan oleh pihak yang berminat.
2. Dalam masa terdekat, KKM akan berkongsi data terperinci kes tanpa identiti (nama, nombor kad pengenalan, alamat dan nombor telefon) termasuk kemasukan ke hospital, rawatan kritikal (ICU). Dengan perkongsian data *granular* ini, KKM berharap ia akan meningkatkan kemampuan analisa semua pihak yang berkepentingan dan dapat menggunakan maklumat ini secara bijaksana bagi mencegah penularan jangkitan COVID-19 di Negara kita.
3. Selain dari sumber data di GitHub, data sekunder berkaitan pencapaian aktiviti kawalan dan pencegahan penyakit COVID-19 juga boleh diperolehi melalui:
 - (i) saluran telegram rasmi KKM (<https://t.me/MOHMalaysia>); atau
 - (ii) telegram rasmi CPRC KKM (<https://t.me/cprckkm>).
4. Begitu juga, ia turut boleh diperolehi melalui laman web COVIDNOW di <https://covidnow.moh.gov.my/> dan beberapa agensi Kerajaan lain yang terlibat dalam pengurusan COVID-19 seperti Kementerian Sains, Teknologi dan Inovasi (MOSTI) dan Kementerian Kewangan (MOF). Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN SYED SADDIQ BIN SYED ABDUL RAHMAN [MUAR]

TARIKH : 28 SEPTEMBER 2021 (SELASA)

SOALAN

TUAN SYED SADDIQ BIN SYED ABDUL RAHMAN minta **MENTERI KESIHATAN** menyatakan langkah Kerajaan untuk membantu hospital yang menguruskan kes COVID-19 terutamanya di negeri luar Lembah Klang memandangkan terdapat banyak laporan kesukaran hospital untuk beroperasi kerana :-

- (a) masalah kekurangan kemudahan perubatan kepada pesakit ; dan
- (b) masalah kekurangan tenaga kerja pasukan perubatan dan masalah dana untuk menampung kos peralatan kepada pesakit.

JAWAPAN

Tuan Yang di-Pertua,

1. Kementerian Kesihatan Malaysia melaksanakan usaha untuk memastikan fasiliti kesihatan negara mencukupi untuk menampung pesakit COVID-19 sama ada di Lembah Klang atau di Luar Lembah Klang. Pelan kesiapsiagaan ini telah dirangka berdasarkan unjuran kenaikan kes yang memerlukan rawatan di hospital atau PKRC.
2. Secara keseluruhan terdapat 157 hospital awam merangkumi 146 Hospital KKM, tiga Hospital Angkatan Tentera dan tujuh Hospital Universiti Awam. Daripada 157 hospital awam ini, 127 hospital telah dijadikan sebagai hospital COVID-19 dimana jumlah ini telah meningkat daripada 47 hospital sahaja pada Januari 2021. Daripada jumlah ini, 107 adalah hospital di luar Lembah Klang.
3. Jumlah hospital full COVID-19 juga telah meningkat daripada 5 hospital pada bulan Januari kepada 15 hospital. Daripada jumlah ini, 10 hospital full COVID-19 adalah di luar Lembah Klang. Hospital full COVID-19 ini adalah hospital yang menyediakan perkhidmatan untuk rawatan COVID-19 sahaja dan perkhidmatan-perkhidmatan Non-COVID-19 dipindahkan ke hospital lain.
4. Bilangan katil bagi merawat pesakit COVID-19 bukan kritikal keseluruhan sehingga Ogos adalah sebanyak 18,739, dimana 11,509 katil adalah disediakan di luar Lembah Klang.
5. Bilangan katil ICU untuk kes-kes COVID-19 yang memerlukan ICU keseluruhan adalah 1,580, dimana 992 katil ICU disediakan di luar Lembah Klang. Katil-katil di wad, dewan bedah, unit rawatan harian dan lain-lain lokasi yang bersesuaian turut dinaiktaraf untuk berfungsi sebagai ICU tambahan bagi memastikan pesakit mendapat rawatan sewajarnya.

6. Bilangan keseluruhan PKRC adalah 143 dimana 141 adalah PKRC di luar Lembah Klang. Bilangan katil di PKRC keseluruhan adalah 33,461 dimana 28955 adalah katil PKRC di luar Lembah Klang.
7. Kerjasama awam-swasta juga turut dijalankan dimana hospital swasta turut dilibatkan bagi merawat kes-kes COVID-19 dan sehingga kini terdapat 112 hospital terlibat merawat kes-kes COVID-19.
8. Lebih banyak kes bukan COVID-19 dihantar ke hospital swasta melalui pelaksanaan penyumberluaran bagi menyediakan lebih banyak katil untuk merawat kes-kes COVID-19 di hospital awam. Sehingga kini terdapat 76 hospital swasta terlibat dalam penyumberluaran.
9. Pembinaan hospital lapangan (Field hospital) oleh Angkatan Tentera (ATM) dan MERCY Malaysia seperti Field ICU di Hospital Kepala Batas, Pulau Pinang, Field Hospital di Hospital Sultanah Aminah, Johor Bahru dan Hospital Selayang oleh ATM dan Field Hospital di HTAR dan Hospital Melaka oleh MERCY Malaysia juga membantu hospital-hospital COVID-19 meningkatkan kapasiti bagi merawat kes-kes COVID-19 di Lembah Klang dan di Luar Lembah Klang.
10. Berkenaan keperluan peralatan perubatan, Kementerian Kesihatan Malaysia telah pun menyediakan peruntukan dan memperoleh peralatan perubatan bagi seluruh keperluan hospital di seluruh negara dengan jumlah keseluruhan RM593,074,205 bagi tahun 2020 dan 2021 (sehingga 26 Ogos 2021). Daripada jumlah tersebut, RM187,821,022 adalah disalurkan kepada semua hospital di Lembah Klang dan baki sebanyak RM405,253,183 adalah untuk hospital bukan Lembah Klang.

Tuan Yang di-Pertua,

11. Bagi meningkatkan kecekapan dan keberkesanan hospital dalam mengurus kes COVID-19, strategi berkaitan keperluan sumber manusia dibuat seperti berikut:

- (i) penugasan semula petugas KKM ke negeri dan fasiliti yang memerlukan;

- (ii) menambah petugas secara kontrak yang kini berjumlah 13,302; dan
- (iii) melaksanakan kolaboratif dengan agensi awam lain seperti Angkatan Tentera Malaysia, Jabatan Perkhidmatan Awam, MAMPU, Jabatan Perangkaan, kementerian-kementerian lain dan Pihak Berkuasa Negeri serta mendapatkan kerjasama sukarelawan dari luar Perkhidmatan Awam.

12. Bagi penugasan semula (mobilisasi) petugas kesihatan dan bukan kesihatan secara dalaman dari negeri tertentu ke negeri dan fasiliti yang memerlukan bagi tahun 2020, seramai 1,375 anggota Perubatan dan 276 anggota kesihatan awam dari pelbagai kategori dan skim perkhidmatan telah dimobilisasikan dari Semenanjung dan Wilayah Sarawak ke Wilayah Sabah. Langkah ini bagi menampung keperluan perkhidmatan semasa penularan pandemik COVID-19 di Wilayah Sabah.

13. Selain itu, KKM turut melaksanakan pembelian perkhidmatan daripada sejumlah 200 kaunselor dan doktor swasta bagi menyokong perkhidmatan kesihatan mental dan perawatan perubatan bukan COVID-19 mengikut daerah dan lokaliti.

14. KKM juga berkolaboratif dengan agensi awam lain bagi mobilisasi pegawai di bawah agensi berkenaan. JPA telah memberi kerjasama untuk memobilisasi sejumlah 211 Pembantu Tadbir (Kewangan) untuk melaksanakan tugas kutipan fi di Pintu-Pintu Masuk Utama dan stesen kuarantin di seluruh negara termasuk Wilayah Sabah. Pejabat Setiausaha Persekutuan Sabah juga telah membantu untuk menyediakan 69 orang Pemandu Kenderaan dari agensi awam di Wilayah Sabah bagi menyokong khidmat logistik kesihatan di Wilayah berkenaan.

15. Bagi tahun 2021 (sehingga 20 Julai 2021) seramai 2,210 petugas dalam pelbagai kategori telah dimobilisasikan secara dalaman ke

Kelantan, Sarawak, Wilayah Persekutuan Kuala Lumpur, Hospital Kuala Lumpur, Selangor dan Negeri Sembilan.

16. Selain itu, KKM telah melantik 1,519 petugas kesihatan kontrak tambahan berdasarkan kelulusan agensi pusat untuk ditempatkan di fasiliti kesihatan Selangor, Kuala Lumpur, Negeri Sembilan dan Hospital Kuala Lumpur. Penempatan ini bertujuan bagi memenuhi keperluan tambahan sumber manusia di Lembah Klang agar kes-kes COVID-19 dapat dikendalikan dengan pantas, cekap dan berkesan.

17. KKM juga memanfaatkan 322 tenaga pengajar dan *clinical instructor* dari Institut Latihan KKM untuk membantu di fasiliti KKM, Pusat Saringan COVID-19 dan Pusat Pemberian Vaksin di seluruh negara. Selain itu, seramai 300 pelatih Institut Latihan KKM yang telah divaksinasi terlebih dahulu telah dimobilisasikan bagi membantu Pusat Saringan COVID-19 dan Pusat Pemberian Vaksin dan tempoh mobilisasi ini dijadikan sebagai sebahagian tempoh latihan klinikal.

18. Bagi mempercepat aktiviti pengesanan kontak (*contact tracing*), KKM telah mendapat komitmen daripada Jabatan Perkhidmatan Awam untuk memobilisasikan lebih kurang 1,000 petugas bukan kesihatan tambahan bagi membantu Pejabat Kesihatan Daerah (PKD) di seluruh negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN

DARIPADA : DATO' NGEH KOO HAM (BERUAS)

TARIKH : 28 SEPTEMBER 2021 (SELASA)

SOALAN

DATO' NGEH KOO HAM [BERUAS] minta **MENTERI SUMBER MANUSIA** menyatakan sama ada Kerajaan bersetuju supaya satu kementerian sahaja iaitu Kementerian Sumber Manusia yang akan memproses dan membuat keputusan berkenaan dengan penggajian pekerja asing di Malaysia.

JAWAPAN

Tuan Yang Di Pertua,

Kerajaan juga sentiasa mengkaji dasar, mekanisme permohonan dan pelaksanaan penguatkuasaan berkaitan Pekerja Asing melalui platform spesifik seperti Mesyuarat Jawatankuasa Bersama Menteri Dalam Negeri dan Menteri Sumber Manusia Mengenai Pengurusan Pekerja Asing.

Selain itu, penubuhan One-Stop Centre (OSC) yang dianggotai oleh Agensi Kawal Selia (AKS) dari kementerian-kementerian serta agensi yang berkaitan berperanan sebagai *check and balance* bagi memastikan permohonan majikan berdasarkan keperluan sebenar.

Berkaitan dengan cadangan YB Beruas, Kementerian Sumber Manusia menyambut baik cadangan tersebut dan akan diperincikan serta diperhalusi.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB TUAN KARUPAIYA A/L MUTUSAMI
[PADANG SERAI]**

TARIKH : 28 SEPTEMBER 2021 (SELASA)

SOALAN

TUAN KARUPAIYA A/L MUTUSAMI minta **MENTERI KESIHATAN** menyatakan dengan mengambil perhatian bahawa populasi daerah Kulim semakin meningkat dan kawasan perindustrian baru akan bertambah, tetapi bangunan tambahan untuk Hospital Kulim tidak ada. Apakah perancangan Kementerian pada masa akan datang.

JAWAPAN

Tuan Yang di-Pertua,

1. Kementerian Kesihatan Malaysia sentiasa berusaha untuk mempertingkatkan kualiti penyampaian perkhidmatan kesihatan kepada masyarakat di seluruh negara termasuk daerah Kulim, Kedah.
2. Mengambil maklum akan peningkatan populasi di daerah Kulim dan bagi meluaskan perkhidmatan kesihatan di Hospital Kulim di masa hadapan, Kementerian Kesihatan Malaysia telah mengemukakan cadangan pembangunan Blok Tambahan Hospital Kulim di dalam RP2 RMK-12.
3. Walau bagaimanapun, peruntukan dan pelaksanaan bagi cadangan ini adalah tertakluk kepada kelulusan Unit Perancangan Ekonomi, Jabatan Perdana Menteri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN

**DARIPADA : DATUK WIRA DR. MOHD HATTA BIN
MD. RAMLI (LUMUT)**

TARIKH : 28 SEPTEMBER 2021 (SELASA)

SOALAN

DATUK WIRA DR. MOHD HATTA BIN MD. RAMLI [LUMUT] minta **MENTERI SUMBER MANUSIA** menyatakan berapakah jumlah peluang pekerjaan baru yang dapat diwujudkan mengikut sektor sepanjang tempoh pandemik COVID-19 ini.

JAWAPAN

Tuan Yang Di Pertua,

Perkembangan dan prospek pasaran pekerjaan disokong oleh pelbagai faktor, antaranya termasuklah pertumbuhan ekonomi, aktiviti perdagangan yang rancak, peningkatan projek pelaburan, serta kesediaan tahap kemahiran pekerja mengikut keperluan industri.

Dalam hal ini, untuk merealisasikan strategi menjana dan mengekalkan pekerjaan, selaras dengan matlamat pertama iaitu ‘Kesejahteraan Rakyat’, **Majlis Pekerjaan Negara atau National Employment Council (NEC) telah ditubuhkan** bagi memantau strategi penciptaan peluang pekerjaan dengan memastikan pemuliharan dan rangsangan sektor ekonomi di Malaysia berjaya dilaksanakan secara menyeluruh.

Strategi yang dilaksanakan juga berpandu kepada data dan sepadan dengan permintaan industri semasa, di samping mengambil kira faktor kesejahteraan rakyat serta tahap ketahanan ekonomi negara. Bagi tahun 2021, NEC mensasarkan penawaran sebanyak 500,000 peluang pekerjaan kepada rakyat.

Menerusi NEC, pelbagai inisiatif telah direncana oleh pihak Kerajaan dalam mengekalkan dan mewujudkan peluang pekerjaan baharu untuk rakyat pasca pandemik COVID-19.

Inisiatif ini yang dipantau di bawah lima (5) Pasukan Petugas Khas (*Specialised Task Force - STF*) iaitu STF Human Resource & Entrepreneurship (HRE), STF National Education (NE), STF TVET, STF Real Economy (RE) dan STF DeepTech & FutureJobs (DF).

Kementerian Sumber Manusia (KSM) dan Kementerian Pembangunan Usahawan dan Koperasi (MEDAC) telah dilantik sebagai Pengurus Bersama bagi Pasukan Petugas Khas iaitu *Human Resource and Entrepreneurship* (HRE).

Pasukan Petugas Khas HRE memainkan peranan yang amat penting dalam menyokong peranan NEC melalui beberapa objektif utama iaitu:

- a) untuk meningkatkan penciptaan pekerjaan, memaksimumkan tahap pengekalan pekerjaan;
- b) membuat padanan pekerjaan secara komprehensif bagi mengatasi isu *underemployment*; dan
- c) mengkaji dan merangka mekanisma perlindungan keselamatan sosial bagi pekerjaan sendiri.

Sehingga 9 Julai 2021, Pasukan Petugas Khas HRE telah mencapai KPI sebanyak 73% iaitu 266,742 daripada 367,500 sasaran yang ditetapkan bagi jumlah penempatan pekerjaan dan penciptaan pendapatan.

Antara inisiatif utama di bawah Pasukan Petugas Khas HRE adalah seperti berikut:

- (i) Program ***Upskilling & Reskilling*** di bawah Bajet 2021 melibatkan agensi di bawah Kementerian Sumber Manusia iaitu Pembangunan Sumber Manusia Berhad dan Kementerian Perdagangan Antarabangsa dan Industri. Ia turut melibatkan penyertaan peneraju sektor swasta seperti MDEC, IRDA, NCIA, RECODA, ECERDC dan SEDIA;
- (ii) Inisiatif **PenjanaKerjaya** oleh PERKESO bagi memastikan isu ketidaksepadanan dalam penawaran dan permintaan pekerjaan dan meningkatkan peluang pekerjaan serta kebolehpekerjaan di kalangan pencari kerja tempatan dapat diatasi; dan
- (iii) Meluaskan **jaringan keselamatan sosial** kepada golongan pekerja *informal* untuk mencarum di bawah Skim Keselamatan Sosial Pekerjaan Sendiri (SKSPS).

SOALAN NO: 58

Di bawah pemantauan STF HRE, MITI turut melaksanakan program PENJANA Upskilling & Reskilling MITI & Agensi yang bertujuan untuk meningkatkan kemahiran dan latihan semula guna tenaga tempatan. Menerusi agensi-agensi di bawah MITI seperti MIDA, MARii, HDC, InvestKL dan MSI, program-program ini mensasarkan penempatan pekerjaan atau penjanaan pendapatan baharu kepada kumpulan graduan tempatan, belia, penganggur atau individu yang diberhentikan atau hilang pekerjaan.

Melalui STF TVET, Kementerian Perdagangan Antarabangsa dan Industri (MITI) bersama Kementerian Pengajian Tinggi (KPT) memantau strategi penciptaan peluang pekerjaan dalam bidang TVET yang bertujuan memadankan graduan TVET negara dengan industri yang memerlukan kemahiran teknikal, agar dapat menyokong keperluan perkembangan industri.

Bagi memantau strategi dan mengenalpasti sektor-sektor pertumbuhan ekonomi baru yang berupaya menjana peluang pekerjaan berkemahiran tinggi, MITI dan Unit Perancang Ekonomi (EPU) telah diberi tanggungjawab ini melalui STF RE.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 28 SEPTEMBER 2021 (SELASA)

SOALAN

PUAN HAJAH NATRAH BINTI ISMAIL minta **Menteri Kesihatan** menyatakan, adakah pihak Kementerian Kesihatan akan memantau bekas pesakit COVID-19 yang telah sembah setelah dibenarkan pulang.

JAWAPAN

Tuan Yang di-Pertua,

1. Setiap pesakit COVID-19 yang telah mendapatkan rawatan akan dipantau dan diberikan temujanji selepas discaj daripada hospital terutama bagi yang mengalami komplikasi tertentu atau yang dijangkakan mengalami gejala *long COVID*.

2. Jangkitan COVID-19 adalah disebabkan oleh *Severe Acute Respiratory Syndrome Coronavirus-2* (SARS-CoV-2). Kebanyakan pesakit yang dijangkiti COVID-19 akan pulih dan kembali sihat, namun sebilangan kecil mungkin mengalami keadaan dipanggil “*long COVID*” yang merangkumi sama ada “*ongoing symptomatic COVID*” atau “*post COVID syndrome*”.

Tuan Yang di Pertua,

3. Bagi tujuan pemantauan secara holistik serta komprehensif, Kementerian Kesihatan Malaysia telah membangunkan satu protokol

rawatan yang khusus bagi bekas pesakit COVID-19. Protokol ini dibangunkan oleh satu pasukan yang terdiri daripada pelbagai disiplin kepakaran.

4. Secara amnya, pemantauan bagi semua bekas pesakit COVID-19 yang telah sembah adalah seperti di bawah:

- (i) Pesakit COVID-19 Kategori 4 dan 5 akan dirujuk dan diberikan temujanji di Klinik Pakar yang bersesuaian bergantung kepada diagnosa akhir mereka, sejurus dibenarkan pulang ke rumah.
- (ii) Bagi pesakit yang mempunyai *co-morbidity* atau mempunyai penyakit kronik yang lain seperti darah tinggi, diabetes dan sebagainya, mereka akan diminta untuk meneruskan rawatan susulan di fasiliti kesihatan seperti yang telah dijadualkan sebelum mereka dijangkiti COVID-19. Sekiranya mereka tidak mempunyai rawatan susulan biasa, mereka akan dirujuk kepada pakar tertentu dan diberikan temujanji susulan sebelum dibenarkan pulang ke rumah.
- (iii) Bekas pesakit COVID-19 juga boleh mendapatkan rawatan di fasiliti kesihatan awam / swasta yang berhampiran secara *walk-in* sekiranya mempunyai sebarang gejala.
- (iv) Bagi pesakit yang mengalami gejala dan simptom yang semakin teruk semasa dalam tempoh pemantauan dan memerlukan rawatan segera, mereka akan dimasukan ke hospital bagi mendapatkan rawatan lanjut.

Tuan Yang di Pertua,

5. Sehingga kini, masih banyak perkara yang belum diketahui bagaimana COVID-19 akan mempengaruhi kehidupan manusia dari masa ke semasa. Terdapat banyak penyelidikan yang sedang dijalankan diseluruh dunia bagi memastikan pengurusan dan perawatan bekas pesakit COVID-19 atau *post COVID syndrome* adalah berdasarkan “*evidence based medicine*”.

SOALAN NO : 59

6. Oleh itu, perlu ditekankan bahawa tindakan pencegahan perlu diamalkan bagi mengawal penularan COVID-19 selaras dengan konsep CAPP iaitu cegah dan didik, amal, patuh dan pantau. Ini termasuk pemakaian pelitup muka, mengamalkan penjarakan fizikal, menghindari kawasan yang sesak dan ramai orang, menjaga kebersihan tangan serta mendapatkan vaksinasi.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : DATO' NGEH KOO HAM [BERUAS]

TARIKH : 28 SEPTEMBER 2021 (SELASA)

SOALAN

DATO' NGEH KOO HAM minta **MENTERI KESIHATAN** menyatakan proses yang dilalui oleh Kerajaan dalam pemerolehan vaksin COVID-19 dan bagaimana harga-harga vaksin berkenaan ditentukan.

JAWAPAN

Tuan Yang di-Pertua,

1. Kerajaan Pusat telah melaksanakan pendekatan pelbagai hala (*multi-pronged approach*) bagi membolehkan Malaysia memperolehi jaminan akses kepada bekalan vaksin COVID-19 yang giat dibangunkan di seluruh dunia.
2. Kerjasama strategik antarabangsa sama ada multilateral ataupun bilateral merupakan langkah Malaysia dalam mendukung aspirasi nasional dan usaha solidariti global ke arah memerangi COVID-19. Ia membantu dalam mempelbagaikan pilihan perolehan vaksin untuk negara dan bagi mengurangkan kebergantungan kepada satu sumber sahaja.
3. Rundingan dengan pengeluar-pengeluar vaksin COVID-19 bukan sahaja diteliti dari sudut teknikal seperti ketahanan, kaedah, kestabilan, kontraindikasi, penduduk sasaran, keselamatan, keberkesanan, dos, pendaftaran dan akses, tetapi juga sudut komersial iaitu harga, pemulangan pembayaran, jadual penghantaran, bayaran pendahuluan dan juga logistik. Selain itu, rundingan turut meliputi aspek kerjasama dan nilai tambah kepada pembangunan vaksin negara. Ini termasuklah melakukan proses pengilangan vaksin secara *fill and finish*, penyelidikan dan pembangunan (R&D) serta pemindahan teknologi dan pembuatan (manufacturing) vaksin.
4. Harga vaksin telah dirundingkan oleh pihak Kerajaan dengan pengeluar/pembekal dan proses rundingan dan perolehan vaksin adalah mematuhi berdasarkan Prosedur Operasi Standard (SOP) perolehan vaksin yang telah dikeluarkan oleh Kementerian Kewangan Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN

**DARIPADA : DATO' HAJI MAHFUZ BIN HAJI OMAR
[POKOK SENA]**

TARIKH : 28 SEPTEMBER 2021

SOALAN

**DATO' HAJI MAHFUZ BIN HAJI OMAR [POKOK SENA] minta
MENTERI SUMBER MANUSIA menyatakan :-**

- (a) jumlah rakyat Malaysia yang hilang pekerjaan dari Mac 2020 sehingga Ogos 2021; dan
- (b) berapakah dari jumlah kehilangan tersebut yang berjaya ditempatkan semula di sektor pekerjaan.

JAWAPAN

Tuan Yang Di Pertua,

Merujuk kepada statistik Sistem Insurans Pekerjaan (SIP), jumlah pekerja yang kehilangan pekerjaan bagi tempoh Mac 2020 sehingga 20 Ogos 2021 adalah seramai 140,608 orang pekerja.

Manakala jumlah pekerja yang kehilangan pekerjaan dan ditempatkan semula di dalam pekerjaan bagi tempoh Mac 2020 sehingga 20 Ogos 2021 adalah seramai 58,530 orang. Bagi pencari kerja yang masih belum mendapatkan pekerjaan, setiap pekerja tersebut akan dibantu oleh Pegawai Perkhidmatan Pekerjaan PERKESO untuk sokongan perkhidmatan pekerjaan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN AHMAD FAHMI B. MOHAMED FADZIL
(LEMBAH PANTAI)**

TARIKH : 28 SEPTEMBER 2021 (SELASA)

SOALAN

TUAN AHMAD FAHMI BIN MOHAMED FADZIL [LEMBAH PANTAI] minta **MENTERI DALAM NEGERI** menyatakan bilangan remaja yang masih berada di dalam tahanan sama ada di penjara dan pusat tahanan imigresen sehingga kini.

JAWAPAN

Tuan Yang Di Pertua,

Untuk makluman Ahli Yang Berhormat, berdasarkan kepada statistik Jabatan Penjara Malaysia, jumlah pesalah muda berumur 21 tahun ke bawah sehingga 25 Ogos 2021 adalah seramai **2,881** orang. Daripada jumlah tersebut, 45 orang adalah banduan reman manakala 2,836 orang banduan sabitan.

Manakala di Jabatan Imigresen Malaysia, terdapat seramai **1,490** orang tahanan muda di Depot Imigresen dan Depot Imigresen Sementara di seluruh negara sehingga 25 Ogos 2021.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEMPATBELAS**

PERTANYAAN : JAWAB LISAN

DARIPADA : YB TUAN GOBIND SINGH DEO (PUCHONG)

TARIKH : 28 SEPTEMBER 2021 (SELASA)

SOALAN

TUAN GOBIND SINGH DEO [PUCHONG] minta **MENTERI DALAM NEGERI** menyatakan sama ada satu inkues perlu diadakan dalam kes-kes kematian semasa tahanan polis dan khususnya apakah tindakan di dalam kes-kes kematian A. Ganapathy pada 18 April 2021, S. Sivabalan pada 20 Mei 2021 dan Surendran Shanker pada 27 Mei 2021.

JAWAPAN

Tuan Yang Di Pertua,

Berdasarkan peruntukan undang-undang di bawah Kanun Tatacara Jenayah, inkues akan diadakan untuk menyiasat bila, di mana, bagaimana dan juga sama ada terdapat individu secara jenayah terlibat dalam menyebabkan kematian.

Di bawah Seksyen 333 Kanun Tatacara Jenayah juga menyatakan, Majistret wajib mengadakan siasatan lebih mendalam jika tidak berpuas hati sebab kematian terutamanya dalam kes kematian mengejut. Oleh itu, inkues sesuai diadakan bagi menangkis sebarang persepsi negatif terhadap pihak PDRM dan juga memberikan satu keputusan yang adil dan dapat memuaskan hati semua pihak. Keperluan untuk mengadakan inkues tertakluk kepada hasil siasatan menyeluruh dan lengkap pihak polis.

Tuan Yang Di Pertua,

Merujuk kepada kes A. Ghanapathy, siasatan telah selesai dan telah dirujuk ke Pejabat Pengarah Pendakwaan Negeri (PPN) Selangor dengan cadangan inkues. Pada 12 Julai 2021, keputusan untuk diadakan inkues telah diterima. Susulan itu PDRM telah mendaftar permohonan inkues di Mahkamah Koroner Shah Alam pada 30 Ogos 2021. Manakala bagi kes S. Sivabalan dan Surendran Shanker, siasatan masih diteruskan dan akan dirujuk kepada Peguam Negara untuk arahan selanjutnya.

**PEMBERITAHUAN PERTANYAAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : JAWAB LISAN

DARIPADA : YB TUAN M. KULASEGARAN [IPOH BARAT]

TARIKH : 28 SEPTEMBER 2021 (SELASA)

SOALAN

TUAN M. KULASEGARAN [IPOH BARAT] minta **MENTERI SUMBER MANUSIA** menyatakan status dan pencapaian yang telah dicapai oleh kerajaan di mana Kerajaan telah memperuntukkan RM125 juta melalui KWPSM/HRDF untuk pelaksanaan inisiatif Place and Train di bawah Program Janapreneur yang dijangka akan membuka peluang kepada 30,000 orang dengan jaminan pekerjaan setelah tamat latihan.

JAWAPAN

Tuan Yang Di Pertua,

Kementerian Sumber Manusia (KSM) menerusi Pembangunan Sumber Manusia Berhad (PSMB) telah melancarkan Inisiatif PENJANA HRDCorp sebelum ini dengan objektif untuk menyokong agenda Kerajaan di dalam memulihkan semula ekonomi Negara.

Antara skim yang berjaya di bawah inisiatif PENJANA HRDCorp adalah skim *Place & Train* yang bertujuan untuk melatih dan menyediakan pekerjaan bagi rakyat Malaysia terutama bagi graduan, pelajar lepasan sekolah dan pekerja yang diberhentikan dengan mengambil bahagian dalam kursus latihan kemahiran seterusnya mendapat penempatan pekerjaan.

SOALAN NO : 64

Peruntukan kewangan yang telah diluluskan ialah RM95 juta yang memberi manfaat kepada 18,131 pelatih. Daripada jumlah tersebut, seramai 8,693 pelatih telah menamatkan latihan dan mendapat penempatan pekerjaan.

Bagi meneruskan kesinambungan dalam agenda pemulihan ekonomi tersebut, selaras dengan pengumuman Pakej Perlindungan Rakyat dan Pemulihan Ekonomi (PEMULIH), Kementerian Sumber Manusia menerusi PSMB akan meneruskan pelaksanaan inisiatif yang memfokuskan kepada *Place and Train* dan Penjanaan Pendapatan.

Inisiatif *Place and Train* dan Penjanaan Pendapatan dirangka dengan memfokuskan kepada pemberian latihan peningkatan kemahiran atau latihan semula kemahiran kepada individu yang perlu dilatih sebelum mereka bekerja seterusnya menjana pendapatan.

Inisiatif ini yang dijangka membuka peluang kepada 30,000 orang untuk mengikuti program latihan kemahiran dengan jaminan pekerjaan setelah tamat latihan yang melibatkan RM125 juta peruntukan dan disokong oleh Platform HRDCorp Placement Centre (HPC) serta Jana'Preneur.

PSMB telah memuktamadkan mekanisme bagi pelaksanaan inisiatif ini dan pelaksanaan program ini akan dijalankan setelah menerima peruntukan yang akan disalurkan oleh pihak Kerajaan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : PUAN ALICE LAU KIONG YIENG
[LANANG]**

TARIKH : 28 SEPTEMBER 2021 (SELASA)

SOALAN

PUAN ALICE LAU KIONG YIENG minta **MENTERI KESIHATAN** menyatakan :-

- (a) sama ada rakyat digalakkan membuat COVID-19 antibody test untuk memastikan mereka mempunyai antibodi tersebut dan diberi vaksinasi selanjutnya jika keputusannya adalah negatif; dan
- (b) bilakah Kementerian akan memulakan program pemberian suntikan vaksin dos ketiga (atau *booster dose*) memandangkan negara Amerika Syarikat akan memberi dos ketiga vaksin COVID-19 kepada rakyat mereka mulai 20 September 2021.

JAWAPAN

Tuan Yang di-Pertua,

1. Pertubuhan Kesihatan Sedunia (WHO) masih belum menetapkan piawaian ujian antibodi COVID-19. Oleh demikian, kerajaan Malaysia mengambil pendekatan untuk tidak menjadikan ujian antibodi sebagai ujian rutin selepas vaksinasi COVID-19. Pada masa ini, ujian antibodi COVID-19 hanya adalah digunakan untuk penyelidikan sahaja.
2. YAB Perdana Menteri telah mengumumkan pada 19 September 2021 bahawa kerajaan telah bersetuju untuk melaksanakan pemberian dos ketiga vaksin COVID-19 bagi meningkatkan perlindungan kepada

golongan rentan daripada risiko jangkitan COVID-19. Pemberian dos ketiga vaksin COVID-19 akan dilaksanakan apabila liputan imunisasi populasi dewasa di seluruh negara melebihi 80%.

3. Keutamaan akan diberikan kepada kumpulan yang berisiko tinggi terlebih dahulu seperti anggota barisan hadapan kesihatan, pesakit kurang daya tahan imun (*immunocompromised*), warga tua dengan komorbiditi dan individu yang tinggal atau bekerja di pusat jagaan jangka panjang (*long-term care facilities*).

4. Untuk makluman, dos tambahan terdiri daripada dua (2) kategori iaitu:

a. **Dos ketiga:** bertujuan untuk meningkatkan tahap imuniti individu berisiko tinggi, yang mana dos kedua tidak mencukupi untuk memberi perlindungan terhadap jangkitan COVID-19.

b. **Dos penggalak atau booster dose:** diberikan kepada semua individu untuk meningkatkan tahap imuniti yang menurun dalam tempoh tertentu selepas dos lengkap.

5. Sehubungan itu, panel pakar perubatan dan kesihatan sedang membangunkan satu Garis Panduan Pemberian Dos Tambahan, dan pada yang sama permohonan untuk mendapatkan kelulusan Pihak Berkuasa Kawalan Dadah sedang dilaksanakan.

6. Pemberian dos tambahan perlu mendapat kelulusan Pihak Berkuasa Kawalan Dadah (PBKD) terlebih dahulu sebelum ia dapat dilaksanakan. Sehingga kini, pihak Pemegang Pendaftaran Produk masih belum mengemukakan sebarang permohonan bagi kelulusan penggunaan dos tambahan kepada Biro Pengawalan Farmaseutikal Kebangsaan (NPRA).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN FONG KUI LUN [BUKIT BINTANG]

TARIKH : 28 SEPTEMBER 2021 (SELASA)

SOALAN

TUAN FONG KUI LUN minta **MENTERI KESIHATAN** menyatakan jumlah kutipan kompaun bagi kesalahan melanggar SOP Perintah Kawalan Pergerakan (PKP) dan yang dirujuk ke mahkamah kerana keengganan membayar kompaun yang tinggi dan di luar kemampuan.

JAWAPAN:

Tuan Yang di-Pertua,

1. Untuk makluman ahli-ahli yang berhormat, jumlah bilangan dan nilai kompaun melanggar SOP yang telah dikeluarkan sejak 2020 hingga kini ialah 120,974 kompaun dikeluarkan. Manakala jumlah kutipan kompaun yang diterima sehingga 26 September 2021 ialah RM74.92 juta.

2. Manakala jumlah kes yang sedang dirujuk dan dibicarakan di mahkamah adalah sebanyak 360 kes.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN
DARIPADA : DATO' SERI ANWAR BIN IBRAHIM
[PORT DICKSON]
TARIKH : 28 SEPTEMBER 2021 (SELASA)

SOALAN

DATO' SERI ANWAR BIN IBRAHIM [PORT DICKSON] minta **MENTERI KESIHATAN** menyatakan statistik terkini pesakit positif COVID-19 mengikut jenis-jenis varian dan statistik kematian mengikut pecahan varian, kumpulan umur, jantina dan negeri.

JAWAPAN

Tuan Yang di-Pertua,

1. Sehingga 24 September 2021 sebanyak 1,860 kes jenis varian dilaporkan dengan 1,820 kes *variant of concern* (VOC) dan 20 kes *variant of Interest* (VOI). VOC yang dilaporkan terdiri daripada 1,612 Delta, 214 Beta dan 14 Alpha. Bagi VOI, sebanyak 13 Theta, 4 Kappa dan 3 Eta.
2. Negeri yang tertinggi kes varian dilaporkan adalah Sarawak dengan 1,059 kes, diikuti oleh Selangor dengan 224 kes, Johor 83 kes, Pulau Pinang 64, Sabah 63 kes, WP Kuala Lumpur, Kedah, Pahang 57 kes, Kelantan 39 kes, Melaka 32 dan negeri-negeri lain melaporkan di bawah 30 kes. Sarawak melaporkan kes tertinggi disebabkan Universiti Malaysia Sarawak's *Institute of Health and Community Medicine* (IHCM) menjalankan ujian *genome sequencing* dalam skala besar.

SOALAN NO : 67

3. Sebanyak 75 kes kematian disebabkan oleh varian. Berikut adalah pecahan kes mengikut kumpulan umur:

- (a) 85 tahun ke atas dengan 4 kes (5.4%)
- (b) 80-84 tahun dengan 5 kes (6.7%)
- (c) 75-79 tahun dengan 2 kes (2.7%)
- (d) 70-74 tahun dengan 10 kes (13.4%)
- (e) 65-69 tahun dengan 4 kes (5.4%)
- (f) 60-64 tahun dengan 5 kes (6.7%)
- (g) 55-59 tahun dengan 7 kes (9.4%)
- (h) 50-54 tahun dengan 3 kes (4%)
- (i) 45-49 tahun dengan 8 kes (10.7%)
- (j) 40-44 tahun dengan 4 kes (5.4%)
- (k) 35-39 tahun dengan 8 kes (10.7%)
- (l) 30-34 tahun dengan 7 kes (9.4%)
- (m) 25-29 tahun dengan 3 kes (4%)
- (n) 20-24 tahun dengan 3 kes (4%)
- (o) 5-9 tahun dengan 1 kes (1.3%)
- (p) 0-4 tahun dengan 1 kes (1.4%)

4. Daripada segi jenis varian, sebanyak 68 kes (90.6%) adalah varian jenis Delta dan 7 kes (9.4%) adalah jenis Beta. Sebanyak 41 kes (54.6%) adalah lelaki dan 34 kes (45.4%) adalah perempuan.

5. Kes kematian tertinggi yang disebabkan oleh varian dilaporkan di Kedah dengan 19 kes diikuti oleh Pulau Pinang (10), Wilayah Persekutuan Labuan (9) kes, Wilayah Persekutuan Kuala Lumpur (7), Johor (5) kes, dan negeri-negeri lain dilaporkan di bawah 5 kes.

Sekian, terima kasih.

**MESYUARAT PERTAMA, PENGGAL KEEMPAT,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : TUAN JUGAH ANAK MUYANG @ TAMBAT
[LUBOK ANTU]**

TARIKH : 28 SEPTEMBER 2021 (SELASA)

SOALAN

minta **MENTERI PEMBANGUNAN LUAR BANDAR** menyatakan status Fasa 4 naik taraf jalan balak di sekitar Parlimen Lubok Antu dalam Rancangan Malaysia Ke-12.

JAWAPAN

Tuan Yang di-Pertua,

Sepertimana Yang Berhormat sedia maklum, Projek Menaiktaraf Bekas Jalan-Jalan Balak di Negeri Sarawak Fasa 4 (Bahagian Sri Aman) telah diluluskan pelaksanaannya di bawah Rancangan Malaysia Kesebelas, *Rolling Plan* Pertama, Tahun 2016 dengan kos projek berjumlah RM12.40 juta. Skop kerja bagi projek ini adalah menaiktaraf bekas jalan balak sepanjang 27km di jajaran Sebeliau/Uyau. Status semasa bagi projek ini adalah di dalam peringkat rekabentuk terperinci dan dijangka tender pada bulan Februari 2022.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT**

PARLIMEN KEEMPAT BELAS

PERTANYAAN : LISAN

DARIPADA : TUAN TAN KOK WAI [CHERAS]

TARIKH : 28 SEPTEMBER 2021 (SELASA)

SOALAN

TUAN TAN KOK WAI [CHERAS] minta **MENTERI KESIHATAN** menyatakan apakah rancangan untuk berhadapan dengan varian Delta yang lebih pantas menular memandangkan kemudahan sistem kesihatan sedia ada hampir runtuh dengan peningkatan mendadak kes COVID-19.

JAWAPAN

Tuan Yang di-Pertua,

Rancangan KKM untuk berhadapan dengan varian Delta yang lebih pantas menular adalah dengan memperkuuh dan meningkatkan tindakan kesihatan awam iaitu:

1. Program Vaksinasi

- (i) Vaksin COVID-19 adalah salah satu tindakan kesihatan awam yang berkesan bagi melandai kadar jangkitan COVID-19 pada masa sekarang. Akan tetapi untuk selamat dan mendapat liputan menyeluruh, dua (dos) vaksin adalah diperlukan. Walau bagaimanapun, individu lengkap dua dos bukanlah tidak akan dijangkiti langsung, namun cuma 88 peratus daripadanya tidak mempunyai simptom dan 96 peratus tidak memerlukan kemasukan ke hospital. Oleh itu, langkah ini sekali gus akan dapat mengurangkan kapasiti hospital yang kini berada dalam keadaan genting berikutan jumlah kes yang tinggi terutama di Unit Rawatan Rapi (ICU).
- (ii) Strategi pemberian vaksin juga disegerakan khususnya di kawasan yang mempunyai jumlah kepadatan penduduk yang tinggi bagi membendung penularan virus selain dapat mengelak pembentukan varian baharu. Sehingga 28 Ogos 2021, sebanyak 14.3 juta orang atau 43.8 peratus penduduk di negara ini sudah menerima dua dos lengkap vaksin COVID-19 sejak Program Imunisasi Covid-19 Kebangsaan (PICK) dilancarkan bermula Februari lepas.

2. Pematuhan prosedur standard operasi (SOP)

Rakyat Malaysia sentiasa diingatkan untuk mematuhi (SOP) walau di mana pun mereka berada. Mereka perlu memainkan peranan penting

dalam mengurangkan jangkitan COVID-19 terhadap varian baharu yang bersifat mudah merebak. Oleh itu, KKM sentiasa menasihati orang ramai untuk mengelakkan perkumpulan beramai-ramai di mana penjarakkan sukar untuk diamalkan serta sentiasa memakai pelitup muka yang betul seperti disarankan.

3. Saringan

Orang ramai yang bergejala juga disarankan untuk menjalani ujian swab samada secara kendiri atau di fasiliti kesihatan bagi membuat pengesanan awal supaya tindakan kawalan dan pencegahan dapat dilakukan segera bagi mengelak berlakunya kejadian wabak di kawasan tersebut.

4. Analisa Penujujukan Genom

- (i) Melaksanakan analisis turutan jujukan genom penuh virus SARS-CoV-2 (COVID-19) dengan memberi fokus kepada pemantauan terhadap semua jenis mutasi gen terutama pada anjakan protein yang memainkan peranan penting dalam proses pengecaman reseptor dan proses membran sel (*receptor recognition and cell membrane fusion process*). Sehingga 26 Ogos 2021, jumlah kumulatif kes yang dijangkiti oleh virus SARS-CoV-2 yang dikategorikan sebagai *variant of concern* (VOC) dan *variant of interest* (VOI) adalah sebanyak **956 kes**. Daripada jumlah yang dikesan tersebut, 936 kes adalah VOC manakala 20 kes adalah VOI. Sehingga kini bagi VOC, secara keseluruhannya terdapat sebanyak 713 kes varian Delta, 209 kes varian Beta dan 14 kes varian Alpha manakala bagi VOI terdapat 13 kes varian Theta, empat (4) kes varian Kappa, dan tiga (3) kes varian Eta. Perkembangan ini adalah sejajar dengan situasi di negara lain di mana VOC seperti varian Delta mempunyai kadar kebolehjangkitan yang lebih tinggi.

SOALAN NO : 69

- (ii) Meningkatkan kapasiti penjukan genom, di mana satu konsortium yang melibatkan tiga (3) Kementerian iaitu Kementerian Kesihatan, Kementerian Sains, Teknologi dan Inovasi serta Kementerian Pengajian Tinggi (KKM-MOSTI-KPT) telah ditubuhkan. Konsortium ini yang melibatkan beberapa institusi dan universiti telah menerima peruntukan sebanyak RM3 juta untuk menjalankan penjukan genom SARS-CoV-2 sebanyak 3,000 sampel dalam masa 3 bulan bermula Ogos 2021 supaya bilangan sampel yang dijalankan penjukan genom melebihi 1% daripada semua kes positif. Sebagai perbandingan, kapasiti penjukan genom di beberapa negara ASEAN adalah seperti berikut - Singapura (6.0%), Thailand (0.43%), Vietnam (0.31%), Indonesia (0.11%) dan Cambodia (0.82%). Antara kriteria yang digunakan untuk pemilihan sampel termasuk sampel yang mempunyai nilai kitaran ambang (*cycle threshold value*) kurang daripada 25, sampel daripada kluster positiviti tinggi, kes kematian/BID atau kes ICU.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

**DARIPADA : TUAN KESAVAN A/L SUBRAMANIAM
[SUNGAI SIPUT]**

TARIKH : 28 SEPTEMBER 2021 [SELASA]

SOALAN

minta **MENTERI PERUMAHAN DAN KERAJAAN TEMPATAN** menyatakan status terkini cadangan bagi membina rumah mampu milik di RPT Batu 1, Jalan Lintang untuk menyelesaikan isu setinggan.

JAWAPAN

Tuan Yang di-Pertua,

1. Untuk makluman Ahli Yang Berhormat, Program Perumahan Rakyat (PPR) merupakan program perumahan awam yang dilaksanakan oleh Kerajaan Persekutuan, khususnya bagi membantu golongan setinggan dan golongan berpendapatan di bawah RM3,000 sebulan. Program ini mula dilaksanakan pada tahun 1982 di bawah Rancangan Malaysia Ketiga (RMKe-3) dan dikenali sebagai Program Perumahan Awam Kos Rendah (PAKR). Program ini telah dijenamakan semula sebagai **Program Perumahan Rakyat (PPR) pada tahun 2002**, sehingga ke hari ini.

2. Untuk makluman Ahli Yang Berhormat juga, terdapat 3 Program Perumahan Rakyat (PPR) yang telah siap dibina di Perak iaitu:

- (i) PPR Buntong (416 unit);
- (ii) PPR Kamunting (260 unit); dan

(iii) PPR Batu 2 $\frac{1}{2}$ (240 unit).

3. Setakat ini, Kementerian Perumahan dan Kerajaan Tempatan (KPKT) belum mempunyai perancangan untuk membina PPR di RPT Batu 1, Jalan Lintang. Sekiranya terdapat keperluan di lokaliti tersebut, KP KT memohon kerjasama pihak Kerajaan Negeri untuk mengenal pasti lokasi PPR yang bersesuaian serta cadangan untuk tapak PPR berkenaan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN CHARLES ANTHONY A/L SANTIAGO
(KLANG)**

TARIKH : 28 SEPTEMBER 2021 (SELASA)

SOALAN

TUAN CHARLES ANTHONY SANTIAGO [KLANG] minta **MENTERI DALAM NEGERI** menyatakan perkembangan siasatan kes kematian dalam tahanan A Ganapthy dan Sivabalan Subramaniam, Surendran Shankar dan Umar Faruq Abdullah. Adakah Kerajaan sudi melaksanakan suatu Siasatan Awam (public inquiry) yang diketuai oleh SUHAKAM dan EAIC terhadap kes-kes tersebut.

JAWAPAN

Tuan Yang Di Pertua,

Merujuk kepada kes A. Ghanapathy, siasatan telah selesai dan telah dirujuk ke Pejabat Pengarah Pendakwaan Negeri (PPN) Selangor dengan cadangan inkues. Pada 12 Julai 2021, keputusan untuk diadakan inkues telah diterima. Susulan itu PDRM telah mendaftar permohonan inkues di Mahkamah Koroner Shah Alam pada 30 Ogos 2021. Manakala bagi kes S. Sivabalan, Surendran Shanker dan kes Umar Faruq Abdullah, siasatan masih diteruskan dan akan dirujuk kepada Peguam Negara untuk arahan selanjutnya.

Tuan Yang Di Pertua,

Berdasarkan peruntukan undang-undang di bawah Kanun Tatacara Jenayah, inkues akan diadakan untuk menyiasat bila, di mana, bagaimana dan juga sama ada terdapat individu secara jenayah terlibat dalam menyebabkan kematian. Di bawah Seksyen 333 Kanun Tatacara Jenayah juga menyatakan, Majistret wajib mengadakan siasatan lebih mendalam jika tidak berpuas hati sebab kematian terutamanya dalam kes kematian mengejut. Keperluan untuk mengadakan inkues tertakluk kepada hasil siasatan menyeluruh dan lengkap pihak polis.

Sebarang cadangan untuk mengadakan siasatan awam adalah tertakluk kepada keperluan dan juga hasil siasatan yang menyeluruh bagi memastikan keadilan dapat dicapai.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DR. KELVIN YII LEE WUEN
[BANDAR KUCHING]**

TARIKH : 28 SEPTEMBER 2021 (SELASA)

SOALAN

DR. KELVIN YII LEE WUEN [BANDAR KUCHING] minta **MENTERI KESIHATAN** menyatakan status vaksinasi mereka yang meninggal disebabkan COVID-19 berdasarkan sama ada telah menerima dos 1 atau 2 dan beberapa hari selepas dos terakhir.

JAWAPAN

Tuan Yang di-Pertua,

1. Sehingga 22 September 2021, **bilangan kematian COVID-19** di Malaysia adalah seramai **24,565 orang** iaitu bersamaan dengan **1.15% dari jumlah kes positif COVID-19**.
2. Merujuk kepada data kematian COVID-19, daripada 31 Mac 2021 (berdasarkan daripada tempoh vaksinasi lengkap dari tarikh pemberian vaksin fasa pertama bermula di Malaysia):
 - i. **23.0%** (5431 kematian) adalah ***partially vaccinated***,
 - ii. **7.5%** (1751 kematian) adalah ***fully vaccinated***
3. Jika dibandingkan dengan **populasi Malaysia yang telah mendapat dua dos vaksinasi sehingga 22 September 2021** (iaitu 18,986,347 individu), kematian yang berlaku disebabkan oleh jangkitan COVID-19 dalam kalangan yang mendapat vaksinasi lengkap adalah **0.013%** bersamaan **130 orang** daripada sejuta populasi yang lengkap divaksinasi.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL EMPAT
PARLIMEN KEEMPAT BELAS**

PERTANYAAN : LISAN

DARIPADA : DATO' ABDULLAH SANI BIN ABDUL HAMID [KAPAR]

TARIKH : 28 SEPTEMBER 2021 (SELASA)

SOALAN

DATO' ABDULLAH SANI BIN ABDUL HAMID minta **MENTERI KESIHATAN** menyatakan berapa angka sebenar pesakit COVID-19 dari kluster tempat kerja bagi kategori pembuatan (kilang).

JAWAPAN

Tuan Yang di-Pertua,

Bermula daripada 25 Januari 2020 sehingga 1 September 2021, sejumlah 1,301 kluster tempat kerja dengan 165,826 kes bagi kategori pembuatan (kilang) telah dilaporkan oleh KKM. Daripada jumlah tersebut, sebanyak 53 kluster dengan 34,043 kes telah dilaporkan bagi tahun 2020 dan 1,248 kluster dengan 131,783 telah dilaporkan bagi tahun 2021. Untuk makluman, kes dalam kluster kategori pembuatan (kilang) merangkumi 37.7 peratus daripada jumlah kes dalam kluster yang dilaporkan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

DARIPADA : YB WONG HON WAI (BUKIT BENDERA)

TARIKH : 28 SEPTEMBER 2021

SOALAN

TUAN WONG HON WAI [BUKIT BENDERA] minta **MENTERI DALAM NEGERI menyatakan:-**

- (a) Berapa jumlah permohonan kewarganegaraan Malaysia di bawah Perkara 15A Perlembagaan Persekutuan untuk tahun 2015-2021 dan berapa yang telah diluluskan mengikut tahun; dan
- (b) apakah status permohonan Cik Angeline May Soon, No. Permohonan 07041011-20160318-11331743, No. Rujukan KDN: 168734 untuk kewarganegaraan Malaysia di bawah perkara 15A Perlembagaan Persekutuan.

JAWAPAN

Tuan Yang Di-Pertua,

Berdasarkan rekod Jabatan Pendaftaran Negara (JPN) bagi tempoh dari tahun 2015 hingga 2021, statistik jumlah permohonan kewarganegaraan Malaysia di bawah Perkara 15A Perlembagaan Persekutuan adalah sebanyak 33,094 permohonan. Daripada jumlah tersebut, sebanyak 4,534 pemohon telah dianugerahkan kewarganegaraan dan sebanyak 2,396 permohonan tidak diluluskan.

Manakala Permohonan kewarganegaraan di bawah Perkara 15A Perlembagaan Persekutuan bagi Angeline May Soon, No. Permohonan 07041011-20160318-11331743, No. Rujukan KDN: 168734 adalah masih dalam proses untuk pertimbangan. Pemohon juga boleh membuat semakan status permohonan kewarganegaraan melalui e-mel atau telefon ke Kementerian atau Jabatan Pendaftaran Negara (JPN).

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS, TAHUN 2021**

PERTANYAAN : JAWAB LISAN

**DARIPADA : TUAN NIK NAZMI BIN NIK AHMAD
(SETIAWANGSA)**

TARIKH : 28 SEPTEMBER 2021 (SELASA)

SOALAN

TUAN NIK NAZMI BIN NIK AHMAD [SETIAWANGSA] minta **MENTERI SUMBER MANUSIA** menyatakan apakah fungsi dan kejayaan Majlis Pekerjaan Negara.

JAWAPAN

Tuan Yang Di Pertua,

Untuk makluman Yang Berhormat, berdasarkan maklumat yang diperolehi dari Kementerian Kewangan Majlis Pekerjaan Negara atau NEC dibentuk selaras dengan intipati dalam pembentangan Belanjawan 2021 oleh YB Menteri Kewangan pada 6 November 2020, di bawah matlamat pertama yang bertujuan untuk memastikan kesejahteraan rakyat melalui strategi ketiga iaitu menjana dan mengekalkan pekerjaan.

Majlis ini merupakan tadbir urus tertinggi dalam penetapan dasar, pelaksanaan serta pemantauan strategi dan inisiatif Kerajaan khusus dalam penciptaan pekerjaan serta menangani isu pengangguran. Penubuhan Majlis ini juga sejajar dengan hasrat Kerajaan dalam memastikan pemulihan dan rangsangan sektor ekonomi di Malaysia berjaya dilaksanakan dengan mengambil kira faktor kesejahteraan rakyat dan ketahanan ekonomi negara.

SOALAN NO: 75

Majlis ini dianggotai oleh Menteri-Menteri Kabinet berkaitan dengan inisiatif Kerajaan khusus untuk penciptaan pekerjaan serta menangani isu pengangguran dan turut disertai wakil sektor swasta, industri serta ahli akademik dalam menyumbang kepada usaha untuk pengwujudan pekerjaan. Bagi tahun 2021, Kerajaan berhasrat untuk mewujudkan 500,000 peluang pekerjaan melalui Majlis ini.

Sehingga 10 September 2021, NEC berjaya merekodkan lebih 376,169 penempatan pekerjaan melalui 27 Inisiatif yang dilaksanakan oleh Kerajaan. Secara keseluruhan pencapaian adalah sebanyak 75.2% telah berjaya dicapai dari sasaran keseluruhan sebanyak 500,00 penempatan pekerjaan.

Manakala 97,000 perkerjaan baharu telah berjaya diwujudkan melalui pelaburan dalam negara dan 76% daripadanya adalah dalam kategori mahir dan separuh mahir.

Kerajaan akan terus komited untuk memastikan penciptaan pekerjaan sebanyak 500,000 bagi tahun 2021 akan dapat dicapai pada suku tahun keempat tahun ini.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : TUAN RAMKARPAL SINGH A/L KARPAL SINGH
(BUKIT GELUGOR)**

TARIKH : 28 SEPTEMBER 2021 (SELASA)

SOALAN

TUAN RAMKARPAL SINGH A/L KARPAL SINGH [BUKIT GELUGOR] minta **MENTERI DALAM NEGERI** menyatakan sebab-sebab Ahli Parlimen pembangkang dihalang oleh polis daripada memasuki bangunan Parlimen pada 2 Ogos 2021 dan siapa yang telah memberikan arahan tersebut kepada pihak polis.

JAWAPAN

Tuan Yang Di Pertua,

Merujuk kepada pemberitahuan oleh Setiausaha Dewan Rakyat melalui surat bertarikh 31 Julai 2021, mantan YAB Perdana Menteri telah memaklumkan bahawa persidangan Mesyuarat Khas Penggal Ketiga Parlimen ke-14 pada Isnin, 2 Ogos 2021 ditangguhkan ke suatu tarikh yang akan ditetapkan kelak.

Penangguhan ini dibuat adalah selaras dengan penilaian risiko oleh Kementerian Kesihatan yang mengesahkan bahawa Parlimen Malaysia merupakan lokaliti berisiko untuk berlakunya penularan jangkitan COVID-19. Oleh demikian, adalah menjadi tanggungjawab pasukan Polis Diraja Malaysia (PDRM) selaku pasukan yang menguatkuasakan Akta Pencegahan dan Pengawalan Penyakit Berjangkit 1988 [Akta 342].

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATIN PADUKA DR. TAN YEE KEW
[WANGSA MAJU]**

TARIKH : 28 SEPTEMBER 2021 (SELASA)

SOALAN

DATIN PADUKA DR. TAN YEE KEW [WANGSA MAJU] minta **MENTERI KESIHATAN** menyatakan sama ada Kementerian bercadang untuk menggantikan aplikasi MySejahtera dengan aplikasi yang baru memandangkan ia telah gagal dalam fungsinya.

JAWAPAN

Tuan Yang di-Pertua,

1. Pada masa ini, Kerajaan tidak bercadang untuk membina aplikasi baharu bagi menggantikan aplikasi MySejahtera. Ini memandangkan aplikasi MySejahtera telah mempunyai kapasiti untuk penambahan pelbagai fungsi bagi penambahbaikan aplikasi ini. Jika ada keperluan, aplikasi MySejahtera boleh dinaik taraf untuk memenuhi keperluan semasa tanpa perlu untuk membangunkan alternatif aplikasi yang baru.
2. Untuk makluman Tuan Yang di-Pertua, aplikasi MySejahtera telah diimplementasi sejak April 2020 di mana Kerajaan melihat aplikasi ini sebagai aplikasi yang unggul dan rasmi. Sehingga kini terdapat 28,783,661 pengguna unik MySejahtera di seluruh negara. Terdapat pelbagai fungsi utama dalam MySejahtera seperti *check-in*, Pengesahan Profil Pengguna bagi program ePenjana, paspot digital kesihatan, pengawasan, *contact tracing*, vaksinasi, dan sijil vaksin digital. Bagi fungsi *check-in* sehingga kini, secara purata terdapat 23 juta *check-in* data setiap hari. Fungsi Survelan dalam MySejahtera boleh mengenal pasti kontak secara automatik dengan menggunakan keupayaan *artificial intelligent* (AI) dan ianya adalah sangat penting dalam pemulihan ekonomi.
3. MySejahtera juga mempunyai fungsi *Hotspot Identification Dynamic Engagement* (HIDE) iaitu fungsi mengenal pasti individu yang terdedah kepada individu positif COVID-19. Sehingga 25 Ogos 2021, data kluster HIDE yang diperolehi daripada MySejahtera adalah sebanyak 1,744 kluster, dimana 99 adalah kluster besar, dan 1,645 kluster kecil.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MOHD. SALIM SHARIF
[JEMPOL]**

**TARIKH : 22 SEPTEMBER 2021 (
SELASA)**

SOALAN

DATO' HAJI MOHD. SALIM SHARIF minta **KEMENTERIAN KESIHATAN** menyatakan perkembangan terkini kajian tindakan mandatori terhadap golongan antivaksin yang boleh mempengaruhi pencapaian Program Imunisasi COVID-19 Kebangsaan (PICK).

JAWAPAN

Tuan Yang di-Pertua,

1. Bilangan golongan antivaksin di Malaysia adalah rendah. Berdasarkan hasil kajian pada bulan April 2021 oleh Bahagian Pendidikan Kesihatan, kadar penerimaan vaksin COVID-19 oleh penduduk Malaysia ialah 85% manakala yang tidak setuju menerima vaksin hanyalah 5%. Namun, malangnya terdapat segelintir masyarakat yang terpengaruh dengan dakyah antivaksin, yang menakut-nakutkan masyarakat dengan kisah-kisah yang didakwa akibat pengambilan suntikan vaksin, walaupun dakwaan tersebut tidak ditentukan kesahihannya.
2. Buat masa ini, tindakan perundangan yang melibatkan individu yang mempengaruhi atau menghasut orang lain untuk tidak mengambil vaksin boleh dikuatkuasakan dengan menggunakan akta-akta sedia ada seperti Kanun Keseksaan atau Akta Hasutan.

3. Pelbagai inisiatif dilaksanakan oleh Kerajaan bagi menggalakkan penerimaan vaksin COVID-19 di kalangan masyarakat. Antaranya ialah:

- (i) Kerajaan memberikan kemudahan kepada penerima vaksin lengkap, seperti dibenarkan untuk makan di restoran, dibenarkan menyertai aktiviti solat di masjid dan surau atau aktiviti sembahyang di Rumah Ibadat Selain Islam (RISI), dan pasangan suami isteri jarak jauh dibenarkan untuk merentas daerah dan negeri.
- (ii) Kerajaan memudahkan penerimaan vaksin oleh masyarakat dengan menjalankan aktiviti *outreach* ke kawasan kampung dan pedalaman, serta menjalankan aktiviti pemberian suntikan vaksin di rumah bagi individu yang terlantar. Pemberian vaksin juga dilaksanakan secara *walk-in* di beberapa kawasan. Bagi industri dengan tenaga kerja yang besar, pemberian vaksin dilaksanakan di tempat kerja. Penambahan pusat pemberian vaksin (PPV) juga dilaksanakan di kawasan tertentu, bagi meningkatkan bilangan individu yang boleh diberi suntikan vaksin dalam sehari.
- (iii) Kementerian Kesihatan meneruskan usaha advokasi dan memberi penerangan mengenai kepentingan pengambilan vaksin COVID-19 kepada masyarakat, di samping menambahbaik dan memperluaskan pelaksanaan Program Imunisasi COVID-19 Kebangsaan bagi menggalakkan penerimaan vaksin COVID-19 oleh masyarakat di setiap pelusuk negara ini.
- (iv) Inisiatif yang dilaksanakan ini telah menunjukkan hasil yang memberangsangkan. 85% penduduk dewasa di Malaysia telah menerima sekurang-kurangnya satu dos, manakala 65% penduduk dewasa telah lengkap menerima suntikan vaksin. Sasaran Program Imunisasi COVID-19 Kebangsaan dijangka boleh dicapai tanpa perlu mewajibkan imunisasi COVID-19.

Tuan Yang Di-Pertua,

4. Langkah mewajibkan suntikan vaksin COVID-19 ke atas seluruh rakyat Malaysia merupakan cadangan inisiatif terakhir yang sedang diteliti oleh Kementerian Kesihatan.

5. Selain cadangan menggunakan Akta Pencegahan dan Pengawalan Penyakit Berjangkit 1988 (Akta 342) bagi mewajibkan pengambilan suntikan vaksin COVID-19 ke atas seluruh penduduk Malaysia, Kementerian Kesihatan turut meneliti beberapa alternatif lain untuk meningkatkan penerimaan vaksin COVID-19, iaitu:

- (i) Pilihan ‘Opt Out’ untuk tidak mengambil vaksin bagi individu yang tidak mahu mengambil vaksin dan bersetuju untuk tidak menikmati kemudahan-kemudahan yang diberikan kepada penerima vaksin COVID-19 lengkap;
- (ii) Mewajibkan individu lengkap pengambilan vaksin COVID-19 sebagai syarat untuk melakukan aktiviti tertentu seperti memasuki fasiliti awam (premis makan, kompleks beli belah, premis-premis kerajaan, universiti, perpustakaan dan sebagainya) dan aktiviti sosial (bersukan dan sebagainya);
- (iii) Cadangan mewajibkan pengambilan vaksin dalam sektor tertentu sahaja seperti sektor kesihatan, sektor keselamatan, sektor pendidikan dan sektor perkhidmatan melalui peruntukan Akta Keselamatan dan Kesihatan Pekerjaan 1994 [Akta 514].

6. Cadangan-cadangan yang dimaklumkan ini perlu dipertimbangkan oleh Jemaah Menteri terlebih dahulu.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' MOHD. NIZAR BIN HAJI ZAKARIA
[PARIT]**

TARIKH : 28 SEPTEMBER 2021 (SELASA)

SOALAN

DATO' MOHD. NIZAR BIN HAJI ZAKARIA [PARIT] minta **MENTERI KESIHATAN** menyatakan:

- (a) bagaimanakah Kerajaan akan memastikan tidak berlakunya penularan mutasi COVID-19 seperti varian Lambda setelah memberi kebenaran pengembara luar negara menjalani kuarantin di rumah; dan
- (b) apakah langkah persediaan Kerajaan bagi memastikan Varian Lambda ini tidak menular di Malaysia.

JAWAPAN

Tuan Yang di-Pertua,

1. Bagi memastikan tidak berlakunya penularan mutasi COVID-19 seperti varian Lambda setelah memberi kebenaran pengembara luar negara menjalani kuarantin di rumah, langkah-langkah berikut dilaksanakan di pintu masuk antarabangsa (PMA) negara, iaitu:

- (i) hanya membenarkan kemasukan pengembara disahkan negatif COVID-19 dengan laporan ujian makmal RT-PCR yang dilakukan 3 hari sebelum berlepas;

- (ii) menjalankan saringan demam dan gejala seperti batuk dan sesak nafas;
- (iii) melakukan swab ke atas pengembara di PMA pada hari ketibaan bagi pengesahan jangkitan COVID-19 dengan menggunakan ujian RT-PCR;
- (iv) mewajibkan kuarantin selama 14 hari bermula dari tarikh kemasukan ke Malaysia, sama ada ia dilakukan di rumah, tempat kediaman atau stesen kuarantin, mengikut polisi semasa dan syarat-syarat yang ditetapkan;
- (v) tempoh kuarantin 14 hari ini akan dilanjutkan selama 7 hari lagi (menjadikan jumlah kuarantin 21 hari) sekiranya terdapat keperluan berdasarkan hasil penilaian risiko terhadap pengembara tersebut yang dijalankan pada hari ke-14; dan
- (vi) ujian makmal pada hari ke-10 bagi individu dengan kuarantin selama 14 hari dan ujian pada hari ke-18 bagi individu yang perlu menjalani kuarantin selama 21 hari

Tuan Yang di-Pertua

2. KKM sentiasa bersiap siaga bagi menghadapi peningkatan kes COVID-19. Antara perkara utama yang perlu ditingkatkan adalah pertambahan sumber. Sebagai intervensi jangka pendek, fasiliti kesihatan swasta serta pengamal perubatan swasta dilibatkan secara aktif bagi meningkatkan kapasiti pengurusan kes COVID-19, sementara rancangan menambah bilangan hospital serta pertambahan jumlah petugas kesihatan dari berbagai kategori dilakukan. Mobilisasi sumber daripada agensi KKM dan bukan KKM dilakukan bagi membantu dalam memberi rawatan, menjalankan siasatan kes dan kontak serta pengurusan data di negeri atau daerah terbabit. Kapasiti PKRC dan wad yang terhad pula diatasi dengan melaksanakan pemantauan kes COVID-19 kategori 1 dan 2 yang memenuhi kriteria yang ditetapkan, untuk menjalankan pengasingan di

rumah dan dipantau di CAC (COVID-19 Assessment Centre). Pemantauan status kesihatan harian pesakit turut dijalankan secara virtual; melalui CAC Virtual.

3. Survelan genomik virus SARS-CoV-2 ditingkatkan dengan menambahkan kapasiti untuk menjalankan ujian *whole genome sequencing* bagi pengesanan awal VOC. Keutamaan pengambilan sampel adalah daripada kes-kes yang dikesan di kawasan dengan kadar jangkitan yang tinggi atau peningkatan kes yang mendadak dalam masa yang singkat.
4. Bagi tujuan meningkatkan kapasiti tersebut, satu konsortium MOH-MOSTI-MOHE telah ditubuhkan. Agensi yang terlibat adalah Institut Penyelidikan Perubatan (IMR), UMBI-UKM, Universiti Malaysia Sarawak (UNIMAS), *Faculty of Medicine Universiti Malaya*, TIDREC Universiti Malaya, Universiti Teknologi Mara (UiTM) dan Malaysian Genomic Institute. Sebanyak RM3 juta telah diperuntukkan kepada tujuh (7) agensi di bawah konsortium tersebut untuk melakukan sekurang-kurangnya 3,000 *whole genome sequencing* dalam masa tiga (3) bulan. Peruntukan khas diperlukan bagi memastikan kesinambungan surveyan genomik ini dapat dilakukan selepas tempoh tersebut.
5. KKM sentiasa meningkatkan usaha untuk mencapai sasaran 80% imunisasi penduduk Malaysia, termasuk pemberian vaksinasi kepada bukan warganegara. Pemberian vaksin ini juga bagi meningkatkan liputan vaksinasi untuk mencapai imuniti kelompok yang dapat mengurangkan bilangan kes dengan gejala teruk yang memerlukan rawatan di hospital ataupun di unit rawatan rapi (ICU). Justeru, bekalan vaksin perlu dipastikan mencukupi.
6. KKM sedang meneliti keperluan memberi dos tambahan kepada penerima vaksin bagi memastikan kesan imuniti berpanjangan. Selain itu, pemberian vaksin kepada kumpulan umur di bawah 18 tahun juga telah dilancarkan pada 20 September 2021 bagi memastikan lebih ramai individu

dilindungi daripada mendapat gejala teruk di samping mengurangkan risiko kematian.

7. Pemeriksaan komuniti sentiasa ditekankan dan ditingkatkan kerana mereka merupakan barisan hadapan, selepas 18 bulan negara berdepan dengan COVID-19. Ia meliputi pematuhan SOP dan arahan yang ditetapkan oleh Kerajaan serta pembudayaan norma baharu. Komuniti juga perlu diperkasakan bagi memantau keselamatan, kesihatan dan kebajikan ahli komuniti terutama kes COVID-19 positif dan kontak rapat yang diperintahkan menjalani pengasingan, pengawasan dan pemerhatian di rumah.
8. Pekerja dan majikan di pelbagai sektor juga diperkasakan bagi memantau sendiri status kesihatan mereka. Ia termasuk menjalankan ujian kendiri pengesanan jangkitan COVID-19 menggunakan RTK antigen (Ag). Sekiranya positif COVID-19 dan sedang menjalani pengawasan dan pemerhatian di rumah, mereka perlu segera mendapatkan rawatan di fasiliti kesihatan sekiranya gejala bertambah teruk tanpa menunggu pihak kesihatan datang mengambil mereka.
9. Pemantauan dan penguatkuasaan juga dipertingkatkan di kawasan berlaku peningkatan kes COVID-19, bagi memastikan orang ramai sentiasa mematuhi SOP dan mengamalkan norma baharu. Aktiviti pemantauan dan penguatkuasaan ini melibatkan pelbagai agensi penguatkuasa yang telah diberi kuasa di bawah Akta Pencegahan dan Pengawalan Penyakit Berjangkit 1988 [Akta 342]. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN YUSUF BIN ABD. WAHAB
[TANJONG MANIS]**

TARIKH : 28 SEPTEMBER 2021 (SELASA)

SOALAN

TUAN YUSUF BIN ABD. WAHAB minta **MENTERI KESIHATAN** menyatakan adakah terdapat keperluan untuk vaksin COVID-19 dos yang ketiga atau booster shot seperti yang tular dalam banyak penerbitan media massa sekarang. Bilakah jangkaan dos ketiga ini akan dilakukan dan bagaimanakah kaedah pelaksanaannya.

JAWAPAN

Tuan Yang di-Pertua,

1. YAB Perdana Menteri telah mengumumkan pada 19 September 2021 bahawa kerajaan telah bersetuju untuk melaksanakan pemberian dos ketiga vaksin COVID-19 bagi meningkatkan perlindungan kepada golongan rentan daripada risiko jangkitan COVID-19. Pemberian dos ketiga vaksin COVID-19 akan dilaksanakan apabila liputan imunisasi populasi dewasa di seluruh negara melebihi 80%.
2. Keutamaan akan diberikan kepada kumpulan yang berisiko tinggi terlebih dahulu seperti anggota barisan hadapan kesihatan, pesakit kurang daya tahan imun (*immunocompromised*), warga tua dengan komorbiditi dan individu yang tinggal atau bekerja di pusat jagaan jangka panjang (*long-term care facilities*).
3. Untuk makluman, dos tambahan terdiri daripada dua (2) kategori iaitu:

SOALAN NO : 80

- a. **Dos ketiga:** bertujuan untuk meningkatkan tahap imuniti individu berisiko tinggi, yang mana dos kedua tidak mencukupi untuk memberi perlindungan terhadap jangkitan COVID-19.
 - b. **Dos penggalak atau booster dose:** diberikan kepada semua individu untuk meningkatkan tahap imuniti yang menurun dalam tempoh tertentu selepas dos lengkap.
5. Sehubungan itu, panel pakar perubatan dan kesihatan sedang membangunkan satu Garis Panduan Pemberian Dos Tambahan, dan pada yang sama permohonan untuk mendapatkan kelulusan Pihak Berkuasa Kawalan Dadah sedang dilaksanakan.
6. Pemberian dos tambahan perlu mendapat kelulusan Pihak Berkuasa Kawalan Dadah (PBKD) terlebih dahulu sebelum ia dapat dilaksanakan. Sehingga kini, pihak Pemegang Pendaftaran Produk masih belum mengemukakan sebarang permohonan bagi kelulusan penggunaan dos tambahan kepada Biro Pengawalan Farmaseutikal Kebangsaan (NPRA).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN WONG LING BIU [SARIKEI]

TARIKH : 28 SEPTEMBER 2021 (SELASA)

SOALAN

TUAN WONG LING BIU minta **MENTERI KESIHATAN** menyatakan berapa banyak sukarelawan terlibat di pelbagai pusat COVID-19 yang berkaitan dan berapa pekerja sementara diambil semasa pandemik COVID-19.

JAWAPAN

Tuan Yang di-Pertua,

1. Kementerian Kesihatan Malaysia (KKM) telah bekerjasama dengan Badan-badan Bukan Kerajaan (NGO) dan sukarelawan individu sejak Mac 2020 bagi menangani pandemik COVID-19. Bantuan sukarelawan telah digerakkan ke fasiliti-fasiliti kesihatan termasuk Bilik Gerakan, Pejabat Kesihatan Daerah, COVID-19 Assessment Center (CAC) dan juga Pusat Pemberian Vaksin(PPV).

2. Berdasarkan rekod KKM, bagi tahun 2021 (sehingga 5 September 2021), jumlah keseluruhan bantuan sukarelawan adalah seramai 3,852 bagi membantu KKM dalam menangani pandemik COVID-19. Perincian adalah seperti berikut:

- (i) seramai 522 sukarelawan NGO dan sukarelawan individu bagi tempoh Mac hingga Disember 2020; dan
- (ii) seramai 3,330 sukarelawan NGO dan sukarelawan individu.

3. Bagi meningkatkan kecekapan dan keberkesanan KKM dalam mengurus kes COVID-19, strategi berkaitan keperluan sumber manusia dibuat seperti berikut:

- (i) memobilisasi petugas KKM ke negeri dan fasiliti yang memerlukan;
- (ii) mengoptimumkan petugas kontrak sedia ada; dan
- (iii) melaksanakan kolaboratif dengan agensi awam lain seperti Angkatan Tentera Malaysia, Jabatan Perkhidmatan Awam, MAMPU, Jabatan Perangkaan, kementerian-kementerian lain dan Pihak Berkuasa Negeri.

4. Berdasarkan rekod KKM juga, hingga 25 Ogos 2021, seramai 4,035 personel MyStep telah dilantik bagi membantu pelaksanaan tugas pentadbiran/bukan klinikal.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : DATO' HAJI AHMAD NAZLAN BIN IDRIS [JERANTUT]

TARIKH : 28 SEPTEMBER 2021 (SELASA)

SOALAN

DATO' HAJI AHMAD NAZLAN BIN IDRIS [JERANTUT] minta **MENTERI KESIHATAN** menyatakan status keperluan pelaksanaan dos ketiga (booster dose) dan vaksin heterologous (campuran vaksin) setelah mendapat syor dari pakar menerusi Mesyuarat Jawatankuasa Khas Jaminan Akses Vaksin COVID-19 (JKJAV).

JAWAPAN

Tuan Yang di-Pertua,

1. YAB Perdana Menteri telah mengumumkan pada 19 September 2021 bahawa kerajaan telah bersetuju untuk melaksanakan pemberian dos ketiga vaksin COVID-19 bagi meningkatkan perlindungan kepada golongan rentan daripada risiko jangkitan COVID-19.
2. Keutamaan akan diberikan kepada kumpulan yang berisiko tinggi terlebih dahulu seperti anggota barisan hadapan kesihatan, pesakit kurang daya tahan imun (*immunocompromised*), warga tua dengan komorbiditi dan individu yang tinggal atau bekerja di pusat jagaan jangka panjang (*long-term care facilities*). Pemberian dos ketiga vaksin COVID-19 akan dilaksanakan apabila liputan imunisasi populasi dewasa di seluruh negara melebihi 80%. Bagi tujuan tersebut, panel pakar perubatan dan kesihatan sedang membangunkan garis panduan pelaksanaan pemberian dos ketiga dan pada yang sama permohonan untuk mendapatkan kelulusan Pihak Berkuasa Kawalan Dadah sedang dilaksanakan.
3. Data keberkesanan vaksin dos penggalak sama ada secara homologos atau heterologos masih terhad. Oleh itu, bagi memastikan kesinambungan agenda ini, KKM telah merangka strategi dan satu jawatankuasa di peringkat kebangsaan telah dibentuk bagi meneliti perkara tersebut termasuk merangka pelan implementasi yang sistematik dan mampan. Jawatankuasa ini di anggotai oleh pakar-pakar pelbagai bidang dan sektor.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN SIM CHEE KEONG
[BUKIT MERTAJAM]**

TARIKH : 28 SEPTEMBER 2021 (SELASA)

SOALAN

TUAN SIM CHEE KEONG [BUKIT MERTAJAM] minta **MENTERI KESIHATAN** menyatakan tarikh tempahan, kos, dan jumlah dos untuk setiap vaksin yang telah diluluskan untuk kegunaan negara.

JAWAPAN

Tuan Yang di-Pertua,

1. Tarikh tempahan bagi setiap jenis vaksin adalah berbeza berdasarkan kaedah atau proses tempahan yang ditetapkan oleh pengeluar vaksin atau COVAX Facility. Secara umumnya, tempahan bagi sesuatu jenis vaksin berkuat kuasa sebaik sahaja *term sheet* atau Surat Setuju Terima (SST) ditandatangani. Proses ini telah bermula sejak dari November 2020 sehingga Mei 2021.

2. Secara keseluruhannya kerajaan telah menempah sebanyak 87.9 juta dos vaksin dengan anggaran kos sebanyak RM4.64 billion yang meliputi kos vaksin serta logistik vaksin. Perincian jenis, bilangan dos dan tarikh tempahan vaksin adalah seperti berikut:

SOALAN NO : 83

BIL .	PENGELUAR	TARIKH <i>TERM SHEET</i> DITANDATANGANI	BIL. DOS
1.	COVAX Facility (AstraZeneca)	<p>24 November 2020 <i>(Optional Purchase Arrangement & Shareholder Confidentiality Agreement</i> bersama COVAX Facility)</p> <p>23 Mac 2021 (MoU bersama UNICEF - AstraZeneca)</p> <p>30 Mac 2021 <i>(Indemnity & Letter of Acceptance for the Cost Estimate</i> - AstraZeneca)</p>	6.4 juta (2 dos/seorang)
2.	Pfizer & BioNTech (BNT162b2)	24 November 2020 (<i>Term Sheet</i>)	44.8 juta (2 dos/seorang)
3.	AstraZeneca / University of Oxford (AZD1222)	21 Disember 2020 (Surat Setuju Terima)	6.4 juta (2 dos/seorang)
4.	Sinovac Biotech Ltd./Pharmaniaga Lifescience Sdn. Bhd. (CoronaVac)	26 Januari 2021 (<i>Term Sheet</i>)	20.4 juta (2 dos/seorang)
5.	CanSino Biologics Inc. (AD5-nCOV)	29 Januari 2021 (<i>Term Sheet</i>)	3.5 juta (1 dos/seorang)
6.	Gamaleya (Sputnik V)	26 Januari 2021 (<i>Term Sheet</i>)	6.4 juta (2 dos/seorang)
JUMLAH			87.9 juta dos

Nota:

- i) Data dikemaskini hingga 13 September 2021.
- ii) Gamaleya – Tertakluk kepada kelulusan pendaftaran vaksin yang diterima daripada NPRA dan PBKD.

3. Memandangkan Kerajaan Malaysia terikat dengan *Non Disclosure Agreement* (NDA) iaitu syarat kerahsiaan yang ditetapkan syarikat pengeluar vaksin, maklumat-maklumat terperinci setiap perjanjian tidak boleh didedahkan kepada umum termasuklah harga vaksin. Walau bagaimanapun, kos perolehan bagi setiap jenis vaksin telah dijelaskan dalam Prosiding Jawatankuasa Kira-Kira Wang Negara (PAC), Mesyuarat Khas Parlimen Keempat Belas yang diadakan pada 2 Ogos 2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN SIM CHEE KEONG
[BUKIT MERTAJAM]**

TARIKH : 28 SEPTEMBER 2021 (SELASA)

SOALAN

TUAN SIM CHEE KEONG [BUKIT MERTAJAM] minta **MENTERI KESIHATAN** menyatakan berapa anggaran baki bekalan vaksin selepas 100% populasi divaksinasi, jenis vaksin, tarikh luput, kos simpanan dan rancangan Kerajaan untuk bekalan tersebut.

JAWAPAN

Tuan Yang di-Pertua,

1. Secara keseluruhannya kerajaan telah menempah sebanyak 87.9 juta dos vaksin melalui enam (6) pembekal vaksin iaitu COVAX Facility (AstraZeneca), AstraZeneca, Pfizer, Sinovac, Cansino dan Gamaleya. Pembekalan keseluruhan vaksin dijangka selesai pada suku kedua tahun 2022.
2. Kuantiti vaksin yang telah dibuat perolehan adalah meliputi 142.82% populasi Malaysia. Sekiranya 100% populasi Malaysia berjaya divaksin, akan terdapat baki bekalan vaksin dengan anggaran kuantiti yang boleh meliputi 42.82% populasi penduduk. Baki bekalan vaksin ini dicadang untuk digunakan sebagai dos tambahan serta vaksinasi golongan remaja berumur 12 tahun ke atas. KKM telah mengumumkan bahawa vaksinasi remaja dilaksanakan mengikut keutamaan seperti berikut:
 - i) Remaja berumur 12 tahun dan ke atas yang mempunyai ‘comorbid’ di hospital dan klinik kesihatan yang merawat mereka; dan
 - ii) Remaja berumur 16 dan 17 tahun tanpa mengira status kesihatan.
3. Bagi penyimpanan vaksin, KKM telah menyediakan fasiliti Pusat Simpanan Vaksin (PSV) yang mencukupi mengikut jumlah bekalan berkala yang dihantar oleh pihak pembekal. Lazimnya bekalan vaksin yang dihantar akan mempunyai tempoh luput yang mencukupi dan dipantau mutu oleh Pihak Berkuasa Kawalan Dadah (PBKD) dan Bahagian Regulatori Farmasi Negara (NPRA).

Sekian, terima kasih.